

5.5.191

5 G. 5.

11

46

D.6.



THEOCRITI  
BIONIS ET MOSCHI

*IDYLLIA OMNIA*

A BERNARDO ZAMAGNA

RHACUSINO


LATINIS VERSIBUS EXPRESSA.



SENIS

EX TYPOGRAPHIA PAZZINIANA

CIO. MDCC. LXXXVIII.



# JOANNI BOSDARIO BLASII FILIO

PATR. RHACUSINO & ANCONITANO

JOSEPH PAZZINI CARL

*I*bi uni, NOBILISSIME ADO-  
LESCENS, opus hoc, quod ab Avun-  
culo tuo BERNARDO ZAMAGNA susceptum,  
ac summa cum laude perfectum est, Ti-

\* ij bi.

*bi, inquam, deberi facile intellexi, ex quo mihi contigit, ut quæ Vir in omni literarum genere versatissimus in Latium deduxerat, Theocriti, Moschi, ac Bionis venustissima Idyllia typis meis ederentur. Plerique enim omnes adolescentes ea potissimum de causa ad amœniores literas animum adplicant, ut eorum ætas alatur, utque secundis rebus ornamentum, adversis vero solatium, ac perfugium parent. Tibi autem ad liberales disciplinas excolendas potiora suppetunt argumenta, & stimuli adduntur, quum ab his sapientissimi hominis exercitationibus, tamquam a domestico exemplo exciteris. Illum paucis ab hinc annis probitate, ac morum suavitate singularum animos sibi devincientem, atque humaniores literas maximo plausu tradentem nostra hæc Senarum civitas mirata est, & quidem decus hoc sibi additum jure lætabatur. Quis enim facilius ea præcepta, & exempla ex*  
*Græ.*



*Græcis fontibus haurire, & lautius dispo-  
nere poterat, quibus juvenes in hisce stu-  
diis rite instituuntur, acris quædam ju-  
dicandi vis adjungitur, ingenium mirifi-  
ce acuitur, & uberior in dicendo copia  
suppeditatur? Igitur quo pluris tantum  
virum faciebat, eo magis doluit ob quam-  
dam rerum commutationem sibi præ-  
reptum. At cum te tot inter ex universa  
Italia delectos juvenes primum ad omnem  
virtutem, & humanitatem informandum,  
deinde vero Philosophicis, & Mathema-  
ticis disciplinis imbuendum videt; sibi gra-  
tulari, & in te uno acquiescere videtur.  
Nam cum in eo totus sis, ut quidquid  
in literarum studiis absolutum est, veluti  
tuum facere tantopere cures, non dubi-  
tat, quin Collegium Ptolemæum ei, qui  
tanto sibi fuerat ornamento, officiorum  
vicissitudinem sit aliquomodo redditurum.  
Jam vero Tute ipse intelligis quantum  
in literis sis profecturus, si eo, quo  
pol-*

polles ingenio , Latina cum Græcis  
conjugere , & scias , & possis ; & quan-  
tum adjumenti capturus , si ad ea scri-  
pta animum convertes , quæ Filio a So-  
rore carissimo , itemque universæ poste-  
ritati celeberrimus Autor commendavit .  
Qui cum opera Græcorum poetarum ,  
quos ad imitandum æmulandumque sibi  
proposuerat Maro , Latinis versibus ele-  
gantissime concinnanda aggrederetur , &  
uberrimam studiosæ juventuti segetem in-  
de provideret Homeri primum Odysseam  
( Cunicianæ Iliadis Sororem meis præ-  
lis excusam ) , deinde Hesiodum , ac po-  
stremo Theocritum , Bionem , atque Mo-  
schum incredibili omnium expectatione ,  
ac plausu evulgavit . Et quonam succes-  
su , Deum immortalem hæc omnia præsti-  
tit ! Ut tantum de interpretatione Theo-  
criticæ verba faciam , nonne aurea illa sim-  
plicitas , nativique lepores , quos in Ar-  
chetypo admiramur , ita ad eam traducti  
feli-

*feliciter sunt, ut nati in Latio, non inserti videantur? Neque unam tantum rerum utilitatem præstantissimus vir, sed etiam verborum venustatem est persequutus, nec solum animi, verum & aurium voluptati egregie consuluit. Ex hac igitur lucubratione perspectum tibi erit in primis, quomodo Virgilianæ Eclogæ Græco hoc pulvere conspersæ sint. Statim enim ac eas attente perlegeris, atque animo comprehenderis, ubi cum Idylliis Theocriti, Bucolicorum principis, comparaveris, optime intelliges, quæ Latinus abs Græco decerpserit, in suamque rem contulerit. Animadvertes scilicet illum pauca admodum ab uno, eodemque Idyllio mutuari solitum, eaque non uno in loco, neque in rem unam usurpare, ita ut non tam imitari, quam ex integro effingere, ac producere videatur. Neque vero minorem capies animi voluptatem, cum ad Bionis, & Moschi carmina ingenii aciem intenderis.*

*Hic*

*Hic parem cum Theocrito canendi facultatem, quemadmodum & patriam, tibi videbitur naſtus; illum vero alterum ex Triumviris compellabis.*

*Sed quid ego Te ultra moror? Uberius quidem hæc, & alia scitu dignissima ab optimo præceptore rite doceberis. Igitur, quod mihi restat, Te rogo atque obtestor, ut librum hunc, qui certe tuus esse debuit, oblatum a me dicatumque humaniter excipias, & assuescas jam optimarum disciplinarum Patronus, Autor, atque Assertor vocari.*

# TYPOGRAPHUS *LECTORI.*



**N**ON omnia, quæ hoc volumine continen-  
tur, Idyllia publici juris nunc primum fiunt.  
Prodiere aliqua diversis temporibus. Maxima  
vero pars in nuptiis Caroli Albani Præfecti Sa-  
cræ Domus FERDINANDI AUSTRIACI cum Ita-  
lica eleganti versione Cl. Aloysii Bucchettii,  
qui & eruditum adjecit proœmium, & lucu-  
lentissimas enarrationes. Nunc tandem vir exi-  
mius Zamagna, absolutis jam, quæ ad Bio-  
nem, Moschumque pertinebant, omnium quo-  
que Theocriti Idylliorum versionem perfecit,  
simulque universa dare in lucem constituit, ut  
trium optimorum Græcorum, qui Bucolica scri-  
pserunt, nova interpretatione, eaque integra,  
Latium ditaretur. Quum vero Idyllia maximi  
haberet, quæ celeberrimus Cunichius Latina  
fecerat, nimirum I. II. IV. VIII. XVIII. XXI. &  
XXVIII. ea retinenda censuit, inque suam edi-

tionem adoptanda, tamquam ornamento futura.  
Illud tantum sibi licere duxit, ut quæ ex iisdem fuerant data opera a Cunichio omissa restitueret, ac suppleret; Quod quilibet videre poterit, qui Senensem hanc editionem cum Mediolanensi instituerit conferendam. Vale.

THEO-



# THEOCRITI

## IDYLLIUM I.

*Thyrsis & Æpolus amice inter se colloquuntur, donisque ab Æpulo propositis, Thyrsis expromit cantilenam de Daphniæ amore contabescente.*

THYRSIS, ÆPOLUS.

DULCE sonant auræ, dulce hæc fonti adsita pinus,  
 Æpole, dulce sonat tua fistula, digna secundæ  
 Mænalium post Pana ferat quæ præmia palmæ.  
 Hircum si feret ille, capra donabere; capram  
 Si feret ille, horna donaberis ipse capella,  
 Horna, quæ nondum peperit, quæ dulcior esu est.  
 Æ. Dulce tuum, pastor, carmen mage, garrula quam quæ  
 Aeria de rupe superne huc liquitur unda.  
 Munus ovem referent si Musæ, munus habebis  
 Agnum; si malint agnum sibi ducere Musæ,  
 Munus ovem niveam referes tu, dona secunda.  
 T. Vis bone. per nymphas, vis Æpole, stratus in herba  
 Heic clivo in molli, fragiles ubi verna myricas  
 Ventilat aura, leves de more inflare cicutas?  
 Dum canis, ipse tuas pascam tibi rite capellas.  
 Æ. Non fas est medio, non fas inflare cicutas,  
 Thyrsi, die; magnum metuo nam Pana: labore  
 Venandi fessus nunc Pan cubat; asper, acerbus  
 Pan, sedet in summis cui bilis naribus atra.  
 Hanc potius, quando nosti, bone Thyrsi, dolores

A

Daphnidis, agrestisque tenes fastigia musæ,  
Hanc concede ulmum subter, simulacra Priapi,  
Fontanas contra & nymphas; pastoribus apta  
Heic sedes, heic & quercus; heic, Thyrsi, canentem  
Audiero nunc te si carmen, quale canebas  
Pastorem Lybiæ contra Chromin; hanc tibi capram  
Ter mulgere dabo: binos alit ubere fœtus;  
Bina simul niveo complet mulctralia lacte.  
Addam alte insculptum calicem; ceraque liquente  
Collutum, instructumque ansis exstantibus, ipso  
Nuper calatum qui se testatur odore;  
Cui virides hederæ, cui luteolus amaranthi  
Hæret flos labro in summo, croceoque virentes  
Capreoli fœtu serpunt ludente corymbo.  
Interius sculpta est, opus admirabile, formæ  
Præstanti mulier, peploque induta fluente,  
Reticuloque comas flaventes vinctæ: minaci  
Ore viri duo stant propter, torvumque tuentes  
Alternis frustra jurgantur. despicit illa  
Atque hunc atque illum ridens, nec jurgia curat:  
Ipsi autem duro correpti pectus amore  
Ignem oculis jactant tremulis, frustra que laborant.  
Hos juxta scabro in scopulo piscator ad undam  
Curvus per cautes festinat retia ducens.  
Ille laboranti similis: namque omnia membra  
Contendit nisu ingenti, colloque tumentes  
Ostendit venas, senior; sed digna juvena  
Firma viri se vis cano sub vertice prodit.  
Vinea non longe gravidis rubet aucta racemis,  
Quam juxta parvus servat puer, & sedet ipsam  
Ad sepem. heic geminæ vulpes, quarum alterâ vites  
Pec medias cursans maturas deripit uvas;



Insidias peram ad pueri struit altera, nec se  
Missuram incautum dicit prius, omnia furtim  
Quam voret, ac misero fletum & jejunia linquat.  
Ille autem e culmo captandis pulcra locustis  
Septa struit junco neſtens, nec pera, nec uvæ  
Jam subeunt animo, textu sed gaudet inani.  
It calicem hac illac per totum mollis acanthus;  
Plurimus upilio veniens quem visere gestit,  
Qui tibi miranti suspendet lumina, Thyrsi.  
Nauta tulit calicis pretium Calydonius, orbem  
Ingentem pressi lactis, pinguemque capellam.  
Necdum etiam labro tetigi, sed conditus omni  
Labe caret. quem ferre tibi facilisque volensque,  
Dulcis amice, dabo, referas modo amabile carmen.  
Invideo tibi nil: agedum, bone; carmina quando  
Non umbris, credo, immemori servabis & orco.  
T. Incipe bucolicum, dulcis Musa, incipe carmen.

Thyrsis ego ex Ætna, ætnæi Thyrsidis hæc vox.  
Quæ loca, dum misere Daphnis tabescit, habebant  
Quæ loca vos, Nymphæ? Pindusne, an Thessala Tempe?  
Nam neque tum visæ vitrei sub gurgite Anapi,  
Non Ætna in viridi, sacra nec in Acidis unda.

Incipe bucolicum, dulcis Musa, incipe carmen.  
Illum etiam Thoes, secla & flere luporum,  
Illum etiam sylva torvus leo flevit ab alta.

Incipe bucolicum dulcis Musa, incipe carmen.  
Multæ illi ante pedes vaccæ, taurique jacentes,  
Multæ illi vitulæ, multæ adgemuere juvencæ.

Incipe bucolicum, dulcis Musa, incipe carmen.  
Primus Atlantiades veniens de monte: quis, inquit,  
Daphni, quis indigno miserum male perdit amore?

Incipe bucolicum, dulcis Musa, incipe carmen.

A ij

Pastores venerē, boum venerē magistri,  
 Venit & upilio; quæ te sic, Daphni, rogantes,  
 Quæ miserum torquent curæ? venitque Priapus,  
 Cur &, ait, misere tabescis, Daphni? per umbras  
 Te nemorum, te per fontes, tua nympha requirit.

Incipe bucolicum, dulcis Musa, incipe carmen.  
 Te petit illa: nimis tu cura ægrescis acerba  
 Perditus. ante boves servabas, ducere capras  
 Nunc bonus heu dicere: hic namque irascitur ardens,  
 Quum videt hirsuras hircis subsidere capras  
 Mollihus in pratis, quod non caper ipse sit ortus.

Incipe bucolicum, dulcis Musa, incipe carmen.  
 Tuque videns passim ridentes suave puellas  
 Suspiras, non ipse choro quod mixtus eodem es.

Hæc illi: at pastor nil contra, mæstus acerbo  
 Indulgens magis atque magis moriturus amor.

Incipe bucolicum, dulcis Musa, incipe carmen.  
 Venit ab Idalio ridens Venus; illa dolosum  
 Nescio quid ridens, at corde irata sub alto,  
 Atque ait: at certe jactabas nuper amorem  
 Cessuram tibi, Daphni: malo nunc cedis amor.

Incipe bucolicum, dulcis Musa, incipe carmen.  
 Cui Daphnis graviter suspirans: Cypri cruenta,  
 Cypri infesta hominum generi, sæva, improba Cypri,  
 Ergo mihi totus sol occidit? ast erit ipsum  
 Intra orbem Daphnis dolor & grave crimen amor.

Incipe bucolicum, dulcis Musa, incipe carmen.  
 Pastor ubi fertur Cypri, pete protinus Idam,  
 Anchisenque....: illic quercus, heic densa cyperus,  
 Atque apibus cava dulce sonant alvearia circum.

Incipe bucolicum, dulcis Musa, incipe carmen.  
 Pulcher adhuc tibi carus Adonis: pascit & agnas,

Et lepores figit, sequiturque horrentia lustra.

Incipe bucolicum, dulcis Musa, incipe carmen.  
Rursus adi propius Diomedem, & dicito: Daphnin  
Pastorem vici Daphnin; contendito mecum.

Incipe bucolicum, dulcis Musa, incipe carmen.  
O Thoesque, lupique, ursique, horrentia dumis  
Occultant quos tesqua, valete: haud amplius usquam  
Cernetis Daphnin per sylvas & nemora alta.  
Tuque Arethusa vale; fontesque & flumina, pulcrum  
Quæ pulcra fluitis lympa prope Tymbridis amnem.

Incipe bucolicum, dulcis Musa, incipe carmen.  
Daphnis ego, huc pastum duxi qui ad gramina vaccas;  
Daphnis ego, huc potum duxi qui ad flumina tauros;

Incipe bucolicum, dulcis Musa, incipe carmen.  
O Pan Pan, gelidi seu nunc juga celsa lycæi,  
Sive altum lustras nunc Mœnalon, huc ades, o Pan,  
Trinaerium ad litrus. Helices rex ardua linque  
Saxa, Lycaonidæ mirum & dīs linque sepulcrum.

Desine bucolicum jam Musa, o desine carmen.  
Nunc violas jam ferre, rubi; ferro, aspera spinæ;  
Fundite juniperi narcissos pulcra comantes:  
Cuncta secus fiant. extincto Daphnide, pinus  
Det pira; quæsitos cervi raprate molossos;  
Montanæque ululæ philomelam vincite cantu.

Desine bucolicum jam Musa, o desine carmen.  
Sic fatus fessum posuit caput: at Venus ulnis  
Collapsam excepit, voluitque attollere, frustra  
Jani frustra. nam cuncta illum fatalia fila  
Defecere, nigram periiit Styga, mersus & atro es  
Gurgite vir musis, vir amabilis ille Napæis.

Desine bucolicum jam Musa, o desine carmen.  
At tu da capram, calicem da mi, Æpole: mulgens

Libabo Musis . Musæ salvete ; iterum mi  
 Atque iterum salvete : alias meliora canemus .  
 Æ. Thyrsi , tibi formosa merum mel compleat ora ;  
 Dulcibus & vescare favis atque attide ficu ,  
 Vincis & argutas suavi nam voce cicadas .  
 En calicem : ambrosium sentin , quem jactat , odorem ?  
 Quippe suis lavisse putes in fontibus Horas .  
 Huc ades , o Cissætha ; agesis Thyrsi , hanc tibi mulge .  
 O capræ , saltu ne ludite , ne malus in vos  
 Luxuriam solitam jam nunc exerceat hircus .

## IDYLLIUM II.

## PHARMACEUTRIA .

*Saga quædam Delphidem , a quo se relictam & prodi-  
 tam esse dolet , beneficiis flectere ac demum reduce-  
 re conatur .*

Ocyus huc lauros fer , Thestyli , fer mihi filtra ;  
 Pocula purpureæ circumda hæc vellere lanæ ,  
 Perfidus ut magicæ vim sentiat artis amator ,  
 Qui me nondum etiam duodena luce revisit ,  
 Nec de me quidquam , sim viva , an mortua , curat ,  
 Nec perstans foribus malus obstrepit . illum amor egit  
 Cum venere , avexitque alio pernicipibus alis .  
 Cras Timageti visam festina palæstram ,  
 Ludit ubi , faciamque vafro convicia : cantu  
 Nunc magico experiar si possim flectere . sed tu  
 Interea purum fulgero , Delia ; sacro  
 Carmine te affabor primam , dea ; teque sub alta

Regnantem tellure, Hecate, quam sæva canum vis  
Horret per tumulos vadentem atrumque cruorem.  
Salve Hecate, incæptumque favens dea magna secunda.  
Nostra hæc ut Circes ne cedant pocula succis,  
Ne vel Medæ, ne vel flayæ Perimedæ.

Duc, Iynx, duc ipsa mihi tu ad limina Delphin.  
Uruntur salsæ fruges. age Thestyli, sparge,  
Sparge molam; infelix, abiit quo mens tua longe?  
An miseram me tuque tibi facis improba ludum?  
Sparge simul, simul & dic: spargo Delphidis ossa.

Duc, Iynx, duc ipsa mihi tu ad limina Delphin.  
Delphis me malus urit; ego hanc in Delphide laurum.  
Laurus ut hæc magnum crepuit, flammataque in ignem  
Continuo versa est, cinerem nec cernimus ipsum;  
Sic totum indomitus Delphin male torreat ardor.

Duc, Iynx, duc ipsa mihi tu ad limina Delphin.  
Igne liquefacio ceram hanc en auspice diva.  
Sic, dea, sic nostro liquatur Delphis amore.  
Rhombus ut hic rapido se turbine verset ahenuş,  
Attonitus sic ille meo se in limine verset.

Duc, Iynx, duc ipsa mihi tu ad limina Delphin.  
Furfuris hoc libo tibi, Delia; flexeris ipsa  
Infernumque adamanta, & si quid durius ipso est.  
Audistine? canes ululant: dea furva propinquat;  
In triviis dea furva: æs æs age, Thestyli, pulsa.

Duc, Iynx, duc ipsa mihi tu ad limina Delphin.  
Nunc placidum late silet æquor, nunc silet aura;  
Non silet hæc sed cura meo sub pectore gliscens.  
Namque virum deserta voco & male prodita, qui me  
Sic viduam casta nuper pro virgine fecit.

Duc, Iynx, duc ipsa mihi tu ad limina Delphin.  
Ter libo, dea magna, ter hæc non irrita dico;

A iiij

Jam, quocumque calct, jam deserat immemor ignem;  
Non minus, ignoto quam Diæ in littore Thesea  
Oblitum perhibent flavam crines Ariadnen.

Duc, Iynx, duc ipsa mihi tu ad limina Delphin.  
Arcasin hippomanes planta est, gustata furore  
Quæ subito stimulat montes armenta per altos.  
Sic Delphin videam insanum similemque furenti  
Ex nitida huc rapido cursu adventare palæstra.

Duc, Iynx, duc ipsa mihi tu ad limina Delphin.  
Delphidis ex ima lapsa est hæc fimbria veste:  
Hanc ego divelloque manu, doque ignibus. eheu,  
Heu, crudelis amor, nostro de pectore totum  
Hausisti, veluti fluvialis hirudo, cruerem.

Duc, Iynx, duc ipsa mihi tu ad limina Delphin.  
Cras tibi pharmaca nigra feram, tritamque lacertam,  
Thestyli. nunc succos hosce accipe, & illine limen  
Illius inspergens: limen quod prodita servo,  
Cui teneor constricta, licet me negligat ille;  
Et spue, dicque spuens: en spargo Delphidis ossa.

Duc, Iynx, duc ipsa mihi tu ad limina Delphin.  
Illa abiit; sum sola. meas nunc unde querelas  
Ordinar? hanc miseræ quis mi cladem intulit auctor?  
Sacram canistra ferens Eubulis venit Anaxo  
Huc ad nos, Triviæ in lucum; visenda ferarum  
Magna ubi pompa ibat; quas inter fulva læna.

Disce mei caussas, disce, o bona luna, furoris.  
Theucharileque adeo nutrix me thressa vocavit,  
Mortua jam, tum cara mihi vicina, paratæ  
Spectaculum ad pompæ. quam dis invisæ sequebar  
Byssos culta fluente, genæ pallam Clearistæ.

Disce mei caussas, disce, o bona luna, furoris.  
Dum via qua ducit, gradior prope tecta Lyconis,

Formosum Delphin, formosumque Eudemippum  
Aspicio e nicida redeuntes forte palæstra:  
Mollis helichryso flaventior ore nitebat  
Lanugo, puram vincebant pectora lunam.

Disce mei caussas, disce, o bona luna, furoris:  
Ut vidi, ut perii malesana! ut saucia curis  
Pectus eram! cœpitque vicens tabescere formæ  
Protinus ille nitor; nec pompæ jam super ulla  
Cura fuit, nec quæve domum sim, quæve reversa  
Commemini; morbo sed conflictabar acuto  
Bis quinas luces, bis quinas languida noctes.

Disce mei caussas, disce, o bona luna, furoris.  
Oraque pallebam thapso magis, & mihi toto  
Paullatim crinès de vertice lapsus abibat.  
Dira artus macies adduxerat, ossaque tantum  
Duraque restabat cutis ægræ. cujus ad ædes  
Non misera adrepsi? quæ me non multa precantem  
Vidit anus, morbos docta excantare morantes?  
Nil cuncta expertæ melius fuit. hora fluebat  
Interea fugiens incassum præpete lapsu.

Disce mei caussas, disce, o bona luna, furoris:  
Tunc famulæ verum retegens, age Thestyli, dixi,  
Morbo aliquam fer opem: totam nam Myndius urit  
Me miseram malus ille puer. quin compita gressu  
I subito, servaque meantem sæpe palæstram  
Ad Timageti: longa illic otia degit.

Disce mei caussas, disce, o bona luna, furoris.  
Atque ipsum invenies ubi solum, te tua, furtim  
Dic, Simætha vocat, subitoque huc ducito tecum.  
Hæc ego mandaram. celerans iter illa nitentem  
Nostra egit Delphin in testâ. at lumine vidi  
Ut propius superantem ipsum jam limina portæ;

Disce mei causas, disce, o bona luna, furoris;  
 Obrigui nivibus mage tota; ac plurimus uda  
 Sudor iit de fronte, aura ceu taeta pruina  
 Liquitur austrina; poteram nec dicere quidquam,  
 Solvere nec vocem, quantam, quum somnia turbant,  
 Ad matrem pueri clamantes tollere suerunt:  
 Sic gelidæ penitus rigui assimilis crystallo.

Disce mei causas, disce, o bona luna, furoris.  
 Ille autem crudelis, ubi me vidit amantem,  
 Lumina defixit terra, solioque resedit;  
 Tum residens: Simætha, inquit, prævertere tantum  
 Tu me adeo voluisti ultro, quantum ipse venustum  
 Antevolans liqui nuper post terga Philinum,  
 Te coram ut veniamque, tuis & sedibus adstem.

Disce mei causas, disce, o bona luna, furoris.  
 Atqui ego venissem, jucundum testor amorem,  
 Aut tribus aut quatuor sociis comitatus, eadem  
 Venissem nocte hæc servans canentia bacchi  
 Mala sinu, circum & redimitus tempora fronde  
 Herculeæ, ornaret levibus quam purpura vittis.

Disce mei causas, disce, o bona luna, furoris.  
 Quod si in tecta forem admissus, tibi dulce fuisset  
 Spero equidem; neque enim mihi vel contendere cursu,  
 Vel quisquam sese valeat componere forma.  
 Et si labra labris potuissem inferre, quiessem  
 Munere contentus parvo, sin forte fuisset  
 A foribus longe pulsus, nec tela nec ignes  
 Cessarent, gemerentque effracto cardine postes.

Disce mei causas, disce, o bona luna, furoris.  
 Nunc fateor Veneri grates me reddere primum,  
 Dein tibi post Venerem debere, quod igne retractum  
 E medio invitas tua sponte ad limina, diro



Jam jam æstu exustum, mulier. quippe improbus ille  
Sævit amor gravius liparæo sæpe calore.

Disce mei caussas, disce, o bona luna, furoris.  
Ille aetas furiis patrio discedere gnatas  
E thalamo intactas, docuitque relinquere sponsas  
Conjugis elusi necdum bene frigida strata.

Dixit: ego facile dicenti credula, dextra  
Correptum juvenem mecum in penetralia traxi;  
Mutuaque exarsit confestim in corpore flamma,  
Oraque flagrabant dulci mussantia voce.  
Neve diu teneam te dictis, optima luna,  
Maxima res aeta est, votorum fine potitis.  
Post illo nec me culpavit tempore Delphis,  
Ipsa nec illum, hesternam ad lucem. at cara Philistæ  
Atque Melixonis veniens huc mater in altum  
Quum veherent cælum rosæ Titanidos axem  
Oceano e rutilo, nondum orto sole, jugales,  
Multa inter fando miseræ hæc narravit: amore  
Captum alio Delphin; puerine, an forte puellæ,  
Incertum. tantum sæpe inter pocula dixit  
Plena mero miscere, malus quo flagrat, amorem,  
Et fugere, & raptim solitum sua visere tecta  
Floribus ac semper multis halantia sertis.  
Hæc mihi narravit non mendax hospita. ad ædes  
Terque quaterque meas prius adventare solebat,  
Doricaque heic pyxis posita illi sæpe relicta est.  
Nunc vero necdum duodena est luce reversus;  
Immemor anne etiam nostri nova gaudia servat,  
Deliciasque odit primas? quare ipsa fugacem  
Experiar philtris juvenem reprehendere. quod si  
Læserit heu rursus, Parcas immitia testor  
Numina, tabescetque, fores pulsabit & orci;

Talia in hac nobis latitant mala pharmaca cista,  
Assyrius quæ me docuit miscere viator.

At tu candida salve, & equos dea tinge sub alto  
Oceano: ipsa feram, cœpi quos ferre, dolores.  
Salve luna nitens candenti corpore, vosque  
Salvete o placidæ comites vaga sidera noctis.

### IDYLLIUM III.

#### CAPRARIUS seu AMARYLLIS.

*Pastor quidam Amaryllidis amore correptus cum eadem  
conqueritur, quod male ejus amori puella respondeat.*

**D**ELICIAS sequar ipse meas Amaryllida: capræ  
Per juga pascuntur lascivæ, ac Tityrus una est.  
Tityre pasce capras, & pastas fontis ad undam  
Ante alios dilecte age Tityre, & inter agendum,  
Namque caper Lybicus cornu ferit ille, caveto.

O formosa Amarylli, quid ah non sponte sub antrum  
Invitas, velut ante, tuum crudelis amantem?  
An tibi nunc odii sum causa? et simus, & esse  
Jam videor propius mento deformis adunco  
Nympha tibi? laqueo coges me perdere vitam.  
Ecce decem tibi mala fero: sunt arbore lecta,  
Qua legere & voluisti. iterum cras altera carpens  
Lecta feram; tantum tu nostras aspice curas.  
Atque utinam nunc factus apis tua murmure raueo  
Ingrediar sub lecta, interque halantia lapsus  
Gramina tecum hederæ filicisque in tegmine ludam!  
Nunc scio, quid sit amor: numen grave. pressa lænæ  
Ille hausit quondam puer ubera; mater & ipsum

Eduxit querceta inter, qui vulnere sævo  
Me crucians imos flamma depascitur artus.  
O blanda obtutu, penitus lapis, o mea nigro  
Nympha supercilio, ne me complexibus arce,  
Osculer ut caram: sunt dulcia & oscula vana.  
Ni facias, mens est subito discerpere sarta,  
Mollia pallidulis hederæ quæ plexa corymbis,  
Atque apio bene olente, tibi servo. hei mihi luctus  
Quam gravis incubuit! tu nil miserere querentis?  
Nudus ab aërio scopuli jam vertice in æquor  
Insiliam, observat thynnos ubi proximus Olpis;  
Et si non moriar, casu lætabere nostro.  
Novi equidem: nam tristis ego dum nuper ad artes  
Me solitas verti, cupiens, num fida maneres,  
Noscere, non pressum strepitu dedit omina læta  
Telephilon, sed lenta manu male tabuit herba.  
Dixit & Agræo, dum forte legebat aristas  
Messorum elapsas manibus, non inscia vates  
Vera monens cribro, toto me corde perire  
Heu miserum, nullam tibi nostri in pectore curam.  
Ipse capram geminos enixam corpore fœtus,  
Albentemque tibi servo. Mermnonis habendam  
Hanc sibi jamdudum nigra orat Erithacis: illi  
Et dabo, tu vanum quoniam sic improba ludis.

En oculus dexter saliit mihi: numquid eamdem  
Prospiciam? hac tereti modulabor carmina pinu  
Innixus, si forte meos si forte dolores  
Respiciat; neque enim est totos adamantina sensus.

Hippomenes, caram voluit quum vincere nympham,  
Poma manu retinens plantis pernicious omne  
Emensus spatium est. Atalanta ut vidit, ut arsit,  
Ut penitus toto concepit pectore amorem!

Duxit & ex Othri vates armenta Melampus  
 In Pylon; inque manus cessit formosa Bianti  
 Illa parens genitura decus clarum Alpheisbeam.  
 An non & pascit niveas in collibus agnas  
 Dum puer, in furias Venerem sic egit Adonis,  
 Ut gremio complexa nec ipsa in morte relinquat?  
 Felix indomito pressus languentia somno  
 Lumina & Endymion; felix, o candida nympa,  
 Ipse etiam Jasion, lætus qui munera sensit,  
 Quanta nefas ulli sperare audita profano.

Heu caput indoluit; nil curas? carmina ponam,  
 Stratus & heic jaceam. vivi projecta vorabunt  
 Membra lupi; id suavi sparget tua guttura melle.

## IDYLLIUM IV.

## PASTORES.

*Colloquuntur inter se Battus caprarius & Corydon bubulcus armento custos relictus ab Ægone, quem Milo ad certamen Olympicum secum abduxerat.*

BATTUS, CORYDON.

**H**Æ, Corydon, vaccæ cujæ sunt? anne Philondæ?  
 C. Non; verum Ægonis: pascendas mi dedit Ægon.  
 B. Dic mihi, ubi cunctas clam sero vespere mulges?  
 C. Ipse senex vitulos submittit, & omnia servat.  
 B. Quonam abiit subito linquens armenta bubulcus?  
 C. Pulcra virum Milon Alphæi ad flumina duxit.  
 B. Ecquando ille oleum vidit, duramque palæstram?  
 C. Dicitur Alcidæ magno par viribus esse.  
 B. Me quoque dicebat mater Polluce priorem.

- C. Bisdenasque abiens agnas tulit, atque ligonem.  
B. Egerit in rabiem Milon genus acre luporum.  
C. Illum optant gemitu complentes rurâ juvencæ.  
B. O infelices! pastor malus obtigit illis.  
C. Certe infelices; jam gramina carpere nolunt.  
B. Huic vitulæ jam sola super sunt ossa; cicadas  
Ut perhibent, num rore illam victare putandum est?  
C. Non hercle. Æsarum nunc illam propter amœnum  
Pasco, nec fœni cesso præbere maniplos;  
Nunc viridis ludit sylvosâ in valle Latymni.  
B. Ille etiam taurus macer est. obtingere talem  
Lampriadum cupio genti, Junonia sacra (cuiquam  
Quum celebrant; namque est mala gens, non commoda  
C. Et tamen ad Stomalimnum agitur, Physicque virentis  
Ad juga, Næthique in saltus, cuncta ubi rident  
Ægipyro Cnizaque & odorifera Melitæa.  
B. Ægon ah male caute! ibunt armenta sub orcum,  
Insanis dum tu palmæ infelicis amore;  
Atque situ sordet, quam struxit nuper, avena.  
C. Non sordet, nymphas testor: nam liquit habendam  
Ille mihi, Pisas abiens, inflare cicutas  
Doctus ego: cæto & Glauces & carmina Pyrrhi;  
Laudo florentenique Crotona. urbs clara Zacynthos  
Scilicet, Eoumque Lacinion; olim ubi solus  
Octoginta Ægon fertur jentasse placentas;  
Atque pede arreptum traxit de monte juvencum  
Ille suæ donans Amaryllidi, magna puellæ  
Clamarunt: risit lætanti corde bubulcus.  
B. O formosa Amarylli, tui non immemor umquam  
Battus erit cineris, crudeli heu perdita letho;  
Pulcra Amarylli, meis fato es mihi rapta capellis  
Carior: heu miserum quo fors mala perculit istu!

- C.* Dulcis Batte, decet confidere: crastina surget  
Lux melior; vivo spes plurima, nulla sepulto.  
Nunc ciet, effusus nunc sistit Juppiter imbres.  
*B.* Fido equidem... vitulos age deorsum: cernis olivæ  
Ut viridis carpunt ramos? heus, cede, Leparge.  
*C.* Cede, Cymetha, istinc ad montem perge. nec audis?  
Juro Pana, malo machabere, nā procul istinc  
Abscedis. viden, ut repit male rursus eodem?  
O utinam, quo terga dolem tibi, fustis adesset.  
*B.* Cerne Jovem, Corydon, per magnum: fixa sub imum est  
Nam mihi spina pedem. proh carduus asper ut alte  
Vulnus agit! male sit vitulæ: dum totus in illa  
Sum, pressi vepres: aciem contende; videsne?  
*C.* Næ næ illam arripui summis pulcre unguibus: eccam.  
*B.* O Pan magne, virtum domat en res quantula quantum!  
*C.* Nudus Batte pedes montes ne incede per altos:  
Rhamnique Aspalatique altis in montibus horrent.  
*B.* Dic age mi Corydon; oculis nigrantibus illam  
Noster amat numnam senior, velut ante, puellam?  
*C.* Et nimium certe: modo lenta per otia vidi  
Heic prope vicinum ludentes molliter antrum.  
*B.* Maſte animis, lascive: inter numerabere Panas,  
Aut Satyros, subter queis sunt exilia crura.

## IDYLLIUM V.

## VIATORES.

*Comatas Caprarius, & Lacon ovium pastor obvii sibi  
invicem conviciantur primo; deinde, positis pigno-  
ribus, cantu certant, Morsone iudice adbibito, qui  
Comatan victorem declarat.*

## COMATAS, &amp; LACON.

**H**EUS fugite o Sybaritam illum Lacona, capellæ;  
Hesterna qui luce meum furatus amictum est.  
L. Necdum a fonte, agnæ? non furem cernitis illum,  
Garrula cui nuper Syrix mea rapta, Comatan?  
C. Quam syringa? habuisti ecquando, o serve, sonantem  
Tu syringa? tibine tui Corydonis avenam  
Non erat infanti sat sibila rauca ciere?  
L. Quam dedit ipse Lycon. quem vero, o liber, amictum  
Hic tibi pellitum Lacon tulit, ede Comata?  
Nec domino Eumaræ pellis, qua indormiat, ulla est.  
C. Quem varium dederat Crocylus mihi, tempore nymphis  
Quo fecit capra. jam tum, o perverse, dolebas  
Invidus, ac furto fecisti denique nudum.  
L. Non varia Lacon te pelle Calæthidis iste  
Exiit, Aëtrum per Pana: aut Crathin in ipsum  
Deferar aërio scopuli de vertice præceps.  
C. Nec tibi, flumineas adjuro, o amice, Napæas,  
Quæ faciles sint usque mihi, syringa Comatas  
Abstrulit, aut umquam furto hoc lætatus abivit.  
L. Si credam, possim mala Daphnidis aspera ferre.

At si vis, hædum deponere: haud ulla Deorum  
 Vis vetat. Experire; heges dum velle, canentem.  
 C. Palladâ sus cærtare jubet. viden<sup>1</sup>, hædus in herba  
 Ille cubat. tu agnum bene pastum delige contra.  
 L. Quâ fuerint hæc æqua, o vulpes, pignora nobis?  
 Quis setas molli pro vellere tondeat? aut quis  
 Pro tenerâ mulgere velit canis ubera capra?  
 C. Quisquis, ut ipse putas, cantando hunc vincere posse  
 Cominus, argutam contra mala vespâ cicadam,  
 Sit licet ille impar hædus, non deficit hircus.  
 L. Ne propera; neque enim posito miser ureris igne.  
 Suavius heic oleæ sylvestri innixus in umbra  
 Egelida sub fronde canes. heic mollia circum  
 Gramina lymphæ strepit, resonant & acanthida dumi.  
 C. Haud propero: doleo multo magis ipse, quod audes  
 In me oculos tu contra attollere, quem puer olim  
 Dum fueras, docui demens. en gratia tandem  
 Quo recidit? tua fâta, canes i pasce luposque.  
 L. Abs te audire aliquid potui vel discere, dignum  
 Quod foret? o turpis nequidquam, atque invidè tantum.  
 C. Tum quum te pronus... memini clamasse dolentem:  
 Balabantque capræ, balantesque hircus adibat.  
 L. Altius haud illo subeas, gibbose, sepulcro:  
 Jamque ades huc: faciam, postremum carmine certes.  
 C. Haud isthuc veniam: heic quercus, viridisque cyperus,  
 Heic argutâ cavis resonant examina truncis,  
 Et gemini saliant fontes, inque arbore summa  
 Dulce canunt volucres. heic gratior umbra, nec isti  
 Assimilis; pinusque nuces vicina ministrat.  
 L. Si venias, heic strata preme magis mollia somno  
 Vellera, pejus olent, quam tu, graveolentia ab hircis  
 Illa tibi detracta erosio tergora setis.



Tum nivei lactis magnum cratera Napæis  
Constituam, plenumque alium prædulcis olivi.  
C. At si tu venias, viridanti stratus in herba  
Heic filicem calcabis. erunt & tergora subter  
Strata capellarum magis agnis mollia multo.  
Oſto autem statuam lactis carchesia Pani,  
Cymbiaque hyblæo totidem spumantia melle.  
L. Isthinc jam certes mecum licet. incipe carmen  
Bucolicum; quandoque placent, querceta tenero.  
Sed iudex quis erit? foret heic o forte Lycopas!  
C. Nil opus est illo, qui proximus ecce laborem  
Exercet, valido diffindens robora ferro,  
Inspicansque faces, (Morson est ille) vocemus.  
L. Haud renuo. C. quin ipse voces. L. huc hospes adesse  
Ne pigeat paullisper, & auscultare canentes.  
Nos inter certamus, uter sit carmine primus:  
Nec mihi tu faveas, Morson dilecte, nec illi.  
C. Sic, Morson, sic per Nymphas: non ulla Comatan  
Gratia, non ulla hunc ipsum Lacona sequatur,  
Has, quas cernis oves, Sybarites Thurius illi  
Tradidit; Eumaræ, duco quas ipse, capellæ.  
L. Num te aliquis petiit, nosterne, illius an esset  
Grex ovium? nimium per divos, pessime, garris.  
C. Vera quidem verax loquor omnia, nec male quidquam  
Glorior. ut subitas mordax assurgis in iras!  
L. Eja age, si quid habes, nunc incipe. vivus in urbem  
Hic sine jam redeat. quam fundis multa, Comata!  
C. Musis carus ego magis ipso Daphnide canto:  
Spem gregis his geminas maſtavi rite capellas.  
L. Et me Phæhus amat. sua Phæbo victima pinguis  
Pascitur en aries: jam Carneæ sacra propinquant.

- C. Hasce duas præter, reliquæ peperere gemellos:  
 Mulgentem & cernens Nympha inquit: siccinæ mulges?  
 L. Caseolis prope bisdenos Lacon calathiscos  
 Implet io; puerumque fovet per florea prata.  
 C. Malo me Clearista petit, compellere capras  
 Dum propero; & subito fugit ipsa, & sibilat ore.  
 L. Me Cratidas meus ignis agit sæpe obvius acres  
 In furias: ludunt flavi per colla capilli.  
 C. Anne rosis certare cynosbatos, aut anemone  
 Audeat? illæ altis florentes sepibus halant.  
 L. Nec montana quidem fas est componere poma  
 Glandibus. hæc flavent, illigno hæ cortice lædunt.  
 C. Parta meæ Nymphæ sunt munera. namque notavi  
 Heic ego juniperi vicina in sede palumbes.  
 L. Tondebo quum molle pecus, qua fulgeat olim,  
 In vestem Cratidæ nigrantia vellera mittam.  
 C. Ite, per acclivem balando & pascite collem.  
 Heic ubi stant thamarisci. oleastro heus parcite, capræ?  
 L. A quercu procul hac fuge, Conare, tuque Cymætha:  
 Pascite, pascit ubi simul ipsa Phalarus, ad ortum.  
 C. Est sinusque mihi cyparissinus, est opus ingens  
 Praxitelis crater; quæ servo dona puellæ.  
 L. Ipse canem, qui curat oves, & strangulat acri  
 Ore lupos, puero donabo, ut terreat ursos.  
 C. O mihi quæ saltu super alta hæc septa, locustæ,  
 Luditis; ah teneras morsu ne lædite vites.  
 L. Cernitis; hunc uro non lenis ut ipse; cicadæ  
 Sic & vos stimulis messoris urite vestris.  
 C. Caudatas odi vulpes, quæ dura Miloni  
 Damna ferunt, uvam populantes vespere sero.  
 L. Odi & ego turpes scarabeos, usque Philondæ

Qui miseri sicq; vastant, fugiuntque per auras.

C. Nonne subit, quum te tenui? tuque actus in orbem  
Labraque stringebas, quercumque amplexus habebas?

L. Haud subit: at contra meminij bene, quæ tibi quondam  
Solverit Eumaras, tua purgans verberare terga.

C. Anne vides, Morson? jam quidam irasqitur; ito,  
Ac subito veteres squillas evelle sepulcris.

L. Quemdam & ego pupugi, Morson, tuque aspicias: ita,  
Erue pubenrem cyclaminum propter Halenta.

C. Himera lacte fluat pro lymphis; Crathis & ipse  
Purpureus vino rubeat; det juncus amomum.

L. Et mihi melle fluat Sybaritis; & hauriat urna  
Mane novo virgo pro flumine roscida mella.

C. Ægilos & cithisus nostris sunt pabula capris,  
Arbuteasque premunt frondes, ulvaeque recumbunt.

L. Nostræ at oves pascuntur suave virens apiastrum,  
Assimilemque rosis hederam, quæ plurima floret.

C. Jam nec amo Alcippen: nam non dedit oscula capris  
Auribus, ipse tuli nuper quum dona palumbum.

L. Eumeden ego amo: nam mi puor oscula fixit  
Ambrosia mage grata, dedi quum nuper avenam.

C. Non fas, o Lacon, philomelam cedere picis,  
Non upupis cyenos. tu frustra jurgia quæris.

M. Desine jam pastor. me judice dona, Comata,  
Tu cape, quumque litans musis mactaveris agnum,  
Morson lætitiæ careat ne parte, memento.

C. Polliceor per Pana. fremat balatibus altis  
Hircorum jam turba procax, atque ipse cachinnum

Ingentem tollam contra Lacona, quod agnum  
Hunc retuli victor; quin saltu & sidera tangam.

Cornigeræ gaudete meæ vos cura capellæ,

Cras ego vos omnes Sybaritide fonte lavabo.

Tu vero, qui sæpe feris cornu, Albule, si quam  
Attigeris prius, agna cadat quam víctima musis,  
Plesteris. rursum salit improbus, ecce: Comatas,  
Ni feriam, non sim; hæmque Melanthius, opto:

## IDYLLIUM VI.

## AD ARATUM,

*Dametas & Daphnis bubulci armenta pascentes cantilenam incipiunt: alter ad Polyphemum canit de Galatea; alter nomine Polyphemi respondet ad ea, quæ prior dixerat.*

**D**AMOETAS una Daphnisque bubulcus, Arate,  
Compulerant armenta. Erat alter rufus, & alter  
Vix tenera, spargens roseas lanugine malas.  
Proiecti vitreas vicini fontis ad undas  
Lucis in æstivæ mediis fervoribus ambo  
Alterni hæc cecinere. prior sic cœpit ad auras,  
Ut prior & voluit cantu contendere Daphnis.

En jactis, Polypheme, gregem tibi candida pomis  
Nympha petit Galatea vocans male dulcibus aptum  
Ignibus, hirsutos pascis qui montibus hircos,  
Tu miser, heu celerem miser o! non aspicias ipsam;  
Sed residens dulci modularis arundine carmen,  
Rursus at illa canem, viden', ut petit improba, quæ te  
Subsequitur custos pecoris? maris æquora cernens  
Illa latrat: placidi latrantem cærulea ponti  
Currentemque ima referunt in litoris ora.  
Ah cave, ne in siccum dum prodit, crura puellæ

Insiliens teneræ lædat, ne vulneret artus.

Illā quidem lascivit amans, teque urit, acanthus

Ipse velut, rapidis quem torruit ignibus æstas;

Et fugit optantem, fugientem atque optat amantem,

Ac lapidem movet omnem extremaque fraudibus aude;

Quid facias? magno, Polypheme, videntur amorī

Pulcra etiam non pulcra; trahit suā quemque cupido.

Hæc Daphnis. tali est Damocles voce sequutus.

Vidi equidem, per Pana, gregem quum subdola pomis

Nymphā meum peteret. non me furivā latere,

Nec valuit lumen dilectum hoc, fronte quod unum

Et servo, servemque utinam; licet aspera vates

Damna canens, tristes olim denunciaret iras.

Telemus; ille suis ferat hæc procul omina patris.

Ipse etiam curis acuens præcordia nymphæ

Cernere dissimulo venientem, alioque teneri

Ignē vaser fingo, jactantem illa audit, & intus

Uritur, o Pean, ægrā & tabescit ab undis

Prosiliciens furiata; & ovilia lustrat & antra

Undique, si quam aliam videat sub rupe puellam;

Quin docui latrare canem. Quum nuper amabam,

Gannitum edebat super armos ora supinans.

Sæpius hæc cernens facientem, nuncia, spero,

Mittet; ego postes inverso cardine claudam,

Donec jurarit, thalami florentia strata

Sponte paraturam mihi in ipsa hac litoris acta,

Nec sum adeo informis, ceu dicunt, nuper in unda

Me vidi, placidi quum starent æquore fluctus;

Formosæ malæque aderant, formosæque harba,

Formosusque sub alta oculus, me iudice, fronte;

Candebant nivei pario mage marmore dentes.

Neve mihi noceat mala lingua, aut fascinus ullus;

In gremium ter sponte spui, ceu jusserat olim  
 Illa monens longæva Cotyttaris, Hippocoontis  
 Messores inter quæ carmina grata canebat.

Hæc dicens socio Damætas oscula fixit,  
 Atque dedit syringa; data est huic fistula contra.  
 Fistula Damætæ, syrinx sua Daphnidi sumpta.  
 Et simul insonuere. Sono quo protinus iætæ  
 In numerum saliere per herbida prata juvenæ:  
 Neuter abit victor, sat utrique est æmula fama.

## IDYLLIUM VII.

### THALYSIA SIVE ITER AD SACRA CERERIS.

*Narrat Theocritus in hoc Idyllio, ut a Phrasidamo &  
 Antigene invitatus cum aliquot sociis iverit ad Ce-  
 veris sacra, occurreritque Lycida Cydoniensi ex  
 Creta, fortasse in insula Co.*

**I**NSE in Halenta olim procul urbe atque Eucritus una  
 Ivimus: ac socius nobiscum venit Amyntas  
 Tertius. Antigenes Cereri nam sacra parabat,  
 Et pariter Phrasidamus, uterque & patre Lycopæo  
 Et bonus, a Clytiæ deducti stirpe nepotes,  
 Magnanimi & Chalconis, ea est si gloria, primus  
 Qui gelida de rupe, genu connixus utroque,  
 Ætherias fontem Burhinum eduxit in auras,  
 Durum opus aggressus. Circum frondentibus alni  
 Stant ramis, ulmique comis umbracula texunt  
 Dulce viatori rabido lenimen in æstu.  
 Necdum etiam cursu mediam perfecimus alta

Urbe viam, necdum Brasilæ apparere sepulcrum  
Cœperat, extemplo venit ecce Cydonius hospes  
Obvius, Aonidum non inscius ille sororum.  
Nomen erat Lycidas, vitæque caprarius: huic se  
Omnia tam similem, gressumque, habitumque, ferebat,  
Nosceret ut primo, quicumque aspexerit, ore.  
Namque humeris pellem setosam exstantibus hircæ  
Ex alto suspendit, adhuc & lacte recenti,  
Et pingui sero olentem. antiquum pectora subter  
Hispidæ firmabant stringentia cingula amictum;  
Inque manu curvis sine arte oleagina nodis  
Virga aderat. suavi tum risu labra decenter  
Movit, & adversum cernens hæc edidit ultro.

Quo media te luce pedes, quando ipsa lacertos  
Occultant virides spineta, nec atra querelis  
Circum busta vagæ tremulis Corydallides errant,  
Ducunt, Simichida? positæ ad convivia mensæ,  
Ullius an civis calcanda ad præla vocatus  
Sic properas? pulsi pedibus resonantque lapilli,  
Subsiliuntque in crura: omnis strepit impete vallis.  
Dixerat. Huic referens: fama est, carissime, dixi,  
O Lycida, nullum sumptis contendere avenis  
Pastoremque tibi & messorum posse; nec artem  
Invideo; lætor potius, quod laude secundus  
Ipse etiam spero modulando æquare canentem.  
Causa viæ Ceres alma, epulum cui rite sodales  
Instituunt sollemne, atque annua munera solvunt  
Primitias frugum. namque illis optima diva  
Hordea largifico dedit auctu, & grandia vicit  
Horrea. nos autem, communis euntibus ista  
Quando via est nobis & lux, quid dicimus ambo,  
Quod valeat suavi dulcedine spargere mentem?

Me quoque Musarum sacrum os, me dulcia dicunt  
 Carmina pastores meditari; at credulus illis  
 Non ego, non equidem fido, Nam vincere nondum  
 Sicelidam aut Samium sperem illum, aut voce Philetam,  
 Rauca velut certans argutis rana locustis.  
 Sic ego; sic placide subridens ille reponit.  
 Hanc age sis virgam ne respue; vera profaris  
 Omnia, denisum haud fallax Jove germen ab ipso.  
 Odi & ego, speret quicumque attollere cælo  
 Oromedontæis æquales arcibus arces  
 Posse faber, Chioque audax quicumque poëta  
 Musarum nequidquam ales contendere certet.  
 Quin nos bucolicum, quando hæc sunt otia, cantum  
 Incipiamus. ego referam breve carmen, amice,  
 Quod modulans nuper vicino in colle notavi.

Ageanastra ferant Myrilenæ ad litora fluctus  
 Cærulei placide vectum, sive Auster ab hœdis  
 Occiduis impellet aquas, sive asper Orion  
 Oceani pronus crura alto in gurgite tinget,  
 Si Lycidam flammis miserum male Cypridis ictum  
 Solverit; urit enim miserum, gravis urit amantem.  
 Halcyones undas & late cæcula sternant,  
 Dispellantque notos, eurique sonantia flabra,  
 Qui pelago ex imo fluitantes evehit algas:  
 Halcyones, glaucis Nereo genitore puellis  
 Ante alias volueres quæ caræ in gurgite vivunt,  
 In scopulis parvos properent componere nidos,  
 Dum puer & celerat securus, & ostia plenis  
 Jam subiens velis optato in litore ludit.  
 Illa luce caput molli redimitus anetho,  
 Seu viola, seu forte rosa, Pteleatica ad ignem  
 Vina bibam streatus, dum flammis torret adustas



Castaneasque fabasque aliquis crepitantibus, alte  
Stabit & exstructus ferulis apioque virenti  
Et cnyza bene olente torus; plenusque lyæo  
Ingens crater erit, quem nos siccabimus imas  
Ad fæces. tu cura aderis potantibus una,  
Teque, puer, solum te pocula nostra sonabunt.  
Inflabunt calamos pastores, alter Acharneus,  
Atque Lycopites alter. tum Tityrus ipse  
Cantabit propius, Xenean ut Daphnis amabat,  
Ut miser in solis errabat montibus, utque  
Errantem moto lugebant vertice quercus,  
Ac platani, riguis quas educat Himera lymphis.  
Ille autem in lacrymas ibat, ceu liquitur Hemo  
Tabida nix, vel Atho, Rhodopeve, aut Caucaso alto.  
Addet, ut ipse cava quondam caprarius arca,  
Stultitia domini, fuerit conclusus, & illum  
Florigeræ dulci pascebant nectare vivum  
Intus apes ultro subeuntes; musa quod olli  
Dulcisona ambrosio leviter manabat ab ore.  
O felix; tu longum hæc non ingrata tulisti,  
Et clausa in cedro latuisti; & melle, Comata,  
Pastus apum totum durasti sospes in annum.  
Montibus his utinam nunc o! mihi vivus adesses;  
Ipse tibi niveas juga per frondentia capras  
Servarem musisque tuis cantuque beatus;  
Tu modulans alterna nigræ sub tegmine fagi,  
Aut picea stratus sub opaca dulce sonares.  
Hæc fatus subito tacuit, cui talia contra  
Rursus ego: simas ducentem in collibus agnas  
Me quoque Pierides docuerunt carmina multa,  
O Lycida, quæ fama Jovem tulit ardua ad ipsum.  
Hoc tamen e multis mage amabile, quod tibi lectum

Incipiam. tu vero audi, o dilecte Camœnis.

Simichidæ non lævus Amor bene sternuit: ipse  
Myrtea amat, quantum cupidæ ver dulce capellæ.  
Sed miser, ante omnes frustra mihi carus Aratus,  
Vulnus alit venis altum, totusque sub imo  
Pectore tabescit. Scit Aristes optimus ille,  
Quem cithara ad tripodem dum personat, ipse canentem  
Audit; & exsultans numeros miratur Apollo;  
Qualis amor, quantus desederit ignis ad ossa.  
O Pan, Pan, Homoles cui pulcra cacumina parent,  
Hunc mihi tu serves. illi concedat in ulnas  
Sponte sequens, mollis placeat seu forte Philinus,  
Seu quicumque furor. propria hæc si munera præstes,  
Non tua, Pan, rigidis configant ilia squillis,  
Ac latera Arcadiæ pueri, quum pinguibus extis  
Mensa caret, stimulantque acrem jejunia ventrem.  
Sin ferus abnueris, totos tibi morsibus artus  
Diripiant; figantque ungues, somnumque petenti  
Urticas, quibus ipse cubes, supponere certent.  
Nec minus Edonum pascens in montibus, Hebrum  
Ad gelidum medio sub frigore, proxima torpet  
Arctos ubi concreta gelu; medioque sub æstu  
Æthiopum fines extremaque litora lustres,  
Ad Blemyum scopulos, Nilus nequit unde videri.  
Vos vero Hyetidis, dulces & Byblidis undas  
Linquentes, quotquot flavæ sacra templa Diones  
Et colitis, malis & suave rubetis. Amores,  
Purpureis similes, certantes figite telis,  
Figite formosum duro sub corde Philinum,  
Quando est nulla mei cura infelicis amici.  
Sit licet ille apio mage pomo mollis, & oro  
Eximius, doleat jam victus, & æstuet æger;

Femineique ebori conclament voce per urbem:  
Flos utinam flos iste tibi, quo, sæve, superbis,  
Jam pereat, formosæ Philinæ. haud amplius ullæ  
Excubiæ suberunt nobis, nec trita nocebit  
Semita, nunc alium solis prænuncius ales  
Excitet, & languor contractos torqueat artus;  
His alium potius, quam nos, nunc denique curis  
Perdat; & ille Molon male fractus membra palæstra  
Hac pereat. nos alma quies juvet, atque anus adsit,  
Sollicitos quæ, rite spuens, procul arceat æstus.

Hæc cecini, musisque mihi ceu munus ab ipsis  
Demissum, dat habere pedum, Pixamque profectus  
Flexit iter læva Lycidas. ego, & Eucritus una  
Ad sedes Phrasidami, & Amyntichus, ivimus. illic  
In nemore umbroso requievimus, uvida junco  
Gramina ubi molli, frondesque e vite recentes  
Instravere toros. super alni ulmique comantes  
Lenæ caput circum Zephyro ludente movebant,  
Nympharumque cadens vicina e rupe sonabat  
Fons vitreis diffusus aquis: læte alta cicadis  
Argutis dumeta, proculque impulsa strepebant  
Raucisonis alia ranis de parte rubeta.  
Nec Corydi cessant, nec Achanthides; ipsaque turtur  
Suave gemens iterat questus sublimis ab ulmo,  
Flavaque se circum fundunt exanina fontem.  
Omnia ver fugiens referebant, omnia messem;  
Sed poma autumnum matura. voluta jacebant  
Ante pedes passim pira multa, & mala rubenti  
Cortice candebant circum. ramisque gravatis  
Cereæ nigranti pendebant pruna colore.  
Quadrimo quæ vina cado tunc hausimus! o vos  
Castalides, colitis juga quæ parnassia, nymphæ,

Dicite, tale Pholi num quondam nectar in antro  
 Phyllirides statuit Chiron ad pocula magno  
 Alcida? num tale ad Anapi rauca fluente  
 Pastorem Polyphemum illum, qui grandia montis  
 Fragmina in æquoreas jaciebat desuper undas,  
 Læticia insueta captum saltare coëgit?  
 Quale fuit vestro nobis tum munere, nymphæ,  
 Reclusum, Cereris propter potantibus aram  
 Frugiferæ. cujus magno sylvestria acervo  
 Arma utinam rursum defigam: Diva papaver,  
 Et gravidas manibus quassans ridebit aristas.

## IDYLLIUM VIII.

*Alternis carminibus inter se certantes inducuntur a  
 Theocrito Menalcas pastor & Daphnis bubulcus.  
 Caprarium quemdam adhibent judicem; isque Da-  
 phnidi victoriam adjudicat.*

MENALCAS, DAPHNIS, ÆPOLUS.

**D**APHNIDI formoso, dum pascit per juga tauros,  
 Upilio, ut perhibent, occurrit forte Menalcas.  
 Imberbes ambo. rufi ambo, dicere carmen  
 Docti ambo, & graciles labro percurrere avenas.  
 Ut Daphnin vidit, cœpit prior ista Menalcas.  
*M.* Daphni boum custos, certa sis carmine mecum:  
 Prona mihi res est te, quam volo, vincere cantu.  
 Hæc prior ille; statim retulit cui talia Daphnis.  
*D.* Lanigeri gregis o custos, argute Menalca,  
 Non, si te rumpas, cantu me viceris umquam.  
*M.* Vin' certare igitur, posito sed pignore, mecum?

*D.* Et certare volo, renuo nec ponere pignus.

*M.* Pignoris ergo, satis quod sit, quid ponimus ambo?

*D.* Ipse quidem vitulum: ru agnum non matre minorem.

*M.* Agnum ego non ausim deponere: nam mihi sævus

Est pater, & mater non mitis; vespere ad unum

Qui numerant omnes fœtis cum matribus agnos.

*D.* Quidnam igitur spondes? pretii quid victor habebit?

*M.* Est mihi pulchra novem calamis compacta cicuta,

Nexu cera pari quam supra jungit & infra.

Hanc possum; nequeo res despondere paternas.

*D.* Et mihi pulchra novem calamis compacta cicuta est.

Nexu cera pari quam supra jungit & infra.

Illam nuper ego struxi; hic digitus tibi testis,

Quem doleo, diffissa mihi quem læsit arundo.

Sed quis erit, nostræ certent quo iudice musæ?

*M.* Caprigeri pecoris custos nempe ille vocari

Huc poterit, canis allatrat cui candidus hædos.

Jamque vocant pueri, paret dicto ille vocantum.

Jamque canunt pueri; iudex sedet ille canentum.

Ducta sorte, prior cœpit cantare Menalcas;

Alterno excepit Daphnis tum carmine carmen

Bucolicum. prior est sic orsus voce Menalcas.

*M.* Divini saltus & flumina, si qua Menalcas

Vobis grata suis lusit arundinibus,

Pascite oves illi: nec pabula Daphnidi desint,

Quandocumque suas egerit huc vitulas.

*D.* Jucundi fontes & gramina, si philomelæ

Exæquat Daphnis carmina daulidos,

Pingua sint armenta illi; sit pingue Menalcæ,

Huc si forte olim venerit ille, pecus.

*M.* Vernat ager, campique virent, atque ubera lacte

Plena tument, saturæ luxuriant pecudes,

Qua se cumque tulit Phyllis; unde illa recessit,  
Pastor, & enecto gramine squallet ager.

*D.* Capra & ovis geminos dant fœtus, nectare cellas  
Complet apis, ramos altius arbor agit,

Qua se cumque tulit Milon: unde ille recessit,  
Aridus aridulo cum bove pastor agit.

*M.* O caper, o nemore in magno qui pascitis hædi,  
Ocyus ad gelidas currite fontis aquas,

Ille ubi nunc cessat; Miloni & dicite: Proteus  
Est deus; æquorcos pavit at ipse greges.

*D.* Non mihi regna peto Pelopeia, non mihi quantum est  
Auri, non rapidis ocyor esse notis:

Sed canere heic tecum; tecum hinc de rupe videre  
Errantesque greges & mare trinacrium.

*M.* Triste malum arboribus nimbi sunt, fontibus æstas,  
Alitibus laqueus, retia testâ feris:

Triste viro crudelis amor. Scis, Juppiter, ipse,  
Quam gravis admota sæviat ille face.

Hæc pueri alterno luserunt carmine. carmen  
Postremum arguta sic orsus voce Menalcas.

*M.* Parce meis hædis, lupe, matribus o lupe parce;  
Parce mihi, multas qui pello ad pascua parvus.

O Lampure canis, qui te sopor obruit altus?  
Turpe cani dormire altum, pastore pusillo.

Pascite oves tenerum gramen, nec parcite pulcre  
Impleri; surgent rursus, quas carpit, herbæ.

Pascite dum cunctis turgescant ubera lacte;  
Pars queat ut prodesse agnis, pars pressa reponi.

Desierat: cœpit suavi quum Daphnis ab ore.

*D.* Dulcis vox vitulæ, dulcis quem proflat ab ore  
Spiritus, & vituli vox dulcis, voxque juvenæ.

Dulce per æstatem, placidis ubi murmurat undis

Rivus

Rivus aquæ, stratum sub dio carpere somnos.

Illicibus decori sunt glandes, dulcia malis

Poma, sui vaccis vituli, vaccæque bubulco.

Hæc alternantes pueri : dein Æpolus infit.

Æ.Daphni, tibi ante omnes dulce os, jucundaque vox est;

Malim audire tuas, quam lingere mella, camœnas.

Utraque debetur tibi fistula : victor utramque

Accipe. contigerit quod si te, Daphni, magistro

Mi quoque bucolicum meditari & discere carmen;

Pulcrum erit hæc cornu mutilo tibi capra minerval,

Lactis inexhausto complet quæ flumine mulctram.

Exiliit plausis manibus puer; ut salit ante

Hinnuleus, visam longo post tempore, matrem.

Indoluit, flevitque alter; qualis nova nupta

Flere solet caræ complexu avulsa parentis.

Ex illo Daphnis pastorum primus habetur

In numero, ductaque superbit Najade nympha.

## IDYLLIUM IX.

*Pastor quidam Daphnin & Menalcam hortatur ad cantum : qui duo bubulci postquam jussi cantum absol-  
verunt, & ipse Pastor breviter canit.*

PASTOR, DAPHNIS, & MENALCA,

**I**NCIPE tu carmen, suavi prior incipe voce  
Bucolicum mihi, Daphni: sequere deinde, Menalca;  
Dum vitulos tempus submittere matribus instat,  
Et nondum fœtis saturos inducere tauros.  
Interea campis armenta vagentur, & una  
Luxurient, passim teneras pascentia frondes

C

Tuta per herbosos saltus. jamque incipe carmen,  
 Daphni, prior: referet certans tibi voce Menalcas:  
*D.* Dulce sonat vitulus, sonat ipsa & dulce juvenca,  
 Dulce & avena sonat, latusque in gramine pastor,  
 Dulce & ego. gelidam mihi strata cubilia surgunt  
 Propter aquam: supra niveis direpta juvencis,  
 Quos notus aërio scopuli de vertice præcepit  
 Impulit arbuteos gaudentes carpere fœtus,  
 Tergora stant. tantum vero ferventiâ curo  
 Tempora ego, quantum pueri sua verba parentum.

Sic cecinit Daphnis, retulit sic deinde Menalcas:  
*M.* Ætna mihi mater: formosum in rupe cavatâ  
 Antrum habito; largeque solent quot somnia ferre  
 Vana viris, tot opes habeo. multæque capellæ,  
 Multæ & oves ludunt; quarum mihi vellera sternô  
 Sub capite ac pedibus. quernum torrentur ad ignem  
 Viscera; dissectæ vincunt brumalia fagi  
 Frigora: quæ metuo, quantum sine dentibus horret  
 Duras quisque nuces, adsint si mollia liba.  
*P.* Hos ego laudavique pares; & munera utrique  
 Digna dedi. quondam patrius quam stipite recto  
 Sponte eduxit ager teretem, quam nec faber ipse  
 Sustineat culpâre, dedi tum Daphnidi clavam:  
 Pulcrâ autem concham, cujus sub rupe repertæ  
 Icaria secui vivos ego protinus artus  
 In quinas partes sociis sat quinque, Menalcæ.  
 Ille datam accepit, sonituque implevit acuto.

Bucolicæ o nymphæ gaudete, & promitte carmen,  
 Quale sonans olim cecini pastoribus illis:  
 Ne mala jam summa noceat tibi pustula lingua.  
 Formicæ formica, cicada & amica cicadis,  
 Accipitri accipiter; nobis ante omnia mûsæ,



Quarum plena domus læto mihi carmine semper  
 Tota strepat. non blanda quies, non purpureum ver  
 Dulcius os aperit subito; nec floribus ipsæ  
 Tam lætantur apes, quam Musis lætor amicis  
 Semper ego. gaudent, facili quos lumine, Musæ,  
 Aspicitis; quos non, Circes mala pocula lædunt.

## IDYLLIUM X.

## OPERARI I.

*Duo agricolæ, vel potius messorēs inducuntur collo-  
 quentes, Milon alter, & alter Battus: Milon Bat-  
 tum ignavia accusat, causamque exposcit. Battus  
 se excusat, culpamque in Amorem rejicit. Deinde  
 canunt inter opus.*

MILON, BATTUS.

**F**ESTINE o nimium messor, quæ cura fatigat  
 Sollicitum? jam nec recto procedere sulco,  
 Ut prius, heu pergis; nec messem falce recurva  
 Cum sociis una reseca; sed lenta novali  
 Agna velut, cui spina pedem transfixit acuta,  
 Tarda gregem sequitur, tua vix vestigia torques.  
 Qualis eris, medios ubi sol accenderit æstus,  
 Nunc primam incipiens quum non depascis aristas?  
*B.* O Milon, duri Milon de fragmine saxi  
 Membra gerens, numquamne optantem absentis imago  
 Ulla animum torsit? *M.* numquam: messoribus ulla  
 Hunc ipsum an præter sedeat mala cura laborem?  
*B.* Numquam igitur te sævus amor vigilare coëgit?

C ij

*M.* Nec coget : non exsta canes contingere sperent .

*B.* Infelix ego amo , jam labitur altera , Milon ,

A decima lux orta , heu vulnere fixus acerbo !

*M.* In pleno tibi vinâ cado , quæ dulcia sicces ,

Cernò equidem : contra mihi vile & deficit acetum .

*B.* Immò inculta mihi stant omnia : squallet agellus

Ipsas ante fores non ullo semine lætus .

*M.* Dic age , dic , sævo quæ torqueat igne puella ?

*B.* Illa urit miserum Polybotæ filia , nuper

Quam canere audisti messoribus Hippocoontis .

*M.* Sonti numen adest . Quæ longum optata petebas

Vota tenes : tecum vates requiescet agrestis .

*B.* Carpere men' cæptas ? atqui non lumine solus

Plutus eget ; cæcus quoque Amor . ne grandia fare .

*M.* Grandia nec fabor . tantum hei tu pone manipulum ,

Atque aliquos jam nunc age cantus incipe nymphæ .

Sic erit iste labor levior tibi ; carmina & ante

Dulcia fundentem lætæ novere Camænæ ,

*B.* Musæ Pierides , teneram vos dicite nympham ,

Dicite : pulcra deæ , quæ tangitis , omnia fiunt .

Bombyce formosa , Syram te nomine dicunt ,

Exustamque genas æstu , gracilemque ; sed ipsa

Concolor & melli mihi flavo , concolor auro .

Et nigræ violæ sunt , & nigri hyacinthi

Inscriptique notis ; tamen illi in serta leguntur

Ante alios flores , nec cedunt frondis honore .

Capra levis citysum , capram lupo acer , aratrum

Grus sequitur : tu sola furor mihi , sola voluptas .

O tenuit quam Cræsus , opum vis afforet illa ,

Ante Paphi dominam nostrum nunc staret uterque

Aureus . ipsa manu calamos , & poma teneres ,

Sive rosam ; starem contra velatus amictu

Purpureo, vinctusque novis ego crura cothurnis,  
 Bombyce o mihi cara, pedes tibi lævibus alben  
 Astragalis similes; tenuis vox gutture manat  
 Ambrosio; blandos quis possit dicere mores?  
 M. Heus hic quam longo latuit nos tempore vates  
 Dulce canens? modulans quam scite & verba notavit,  
 Et numeros? frustra non illi barba nigrescit,  
 Carmina tu clari Lytiersæ hæc accipe contra.

Alma Ceres spicis redimita, his campus aristis  
 Floreat usque novis, ac fertilis horrea vincat.  
 Stringite, qui metitis, vos stringite rite maniplos,  
 Ne veniens aliquis, quam segnis inertia, dicat,  
 Hos tenuit? domini perlit male perditæ merces.  
 Ad Borean sectos frugum convertite culmos,  
 Vel Zephyrum: turgens nam sic pinguescit arista,  
 Qui teritis frumenta, die ne carpite somnos  
 In medio: melius paleas tum ventilat aura  
 E stipula ardenti volitantes. mane laborem  
 Incipiat messor, quum frondea lustra relinquunt  
 Cassitæ; repetunt eadem quum vespere sero,  
 Desinat; ardenti paullum requiescat in æstu.  
 Cernitis, o pueri, facilis quam munere divum  
 Vita data est ranis? haud illæ pocula eurant  
 Irriguos latices fundentia: sufficit humor,  
 Quem madidæ exsudent ultro, servantque lacunæ.  
 Tu vero, cui cura penum, mensamque parare,  
 Ah nimium ne parcus ad ignem apponere vescas  
 Lenticulas trepides. sine, flammis rite madescant;  
 Neve manum lædæ resicans in frusta cuminum.

Hæc decuit gecinisse viros, qui sole laborem  
 Sub rabido evercent, matri narrare sed istum,  
 Q vesane, malum, læsto dum surgit, amorem,

## IDYLLIUM XI.

## CYCLOPS.

*Theocritus Niciam medicum Milesium in hoc carmine alloquitur, nullumque esse ait contra Amorem præsentius remedium, quam Musas, earumque carum; idque docet exemplo Cyclopis Polyphemi.*

**N**ov alio melius medicamine triste nec ungi,  
 Nicia, nec spargi me iudice vulnus Amoris,  
 Pieridum dulci valeat quam carmine. lenis  
 Ista quidem tactu medicina & suavis; at æque  
 Inventu haud facilis. scis, credo, edoctus in arte  
 Pæonia, carusque novem tu rite camænis.  
 Ducebat leviter sic vitæ incommoda Cyclops  
 Ille vetus Polyphemus in ipso hoc litore, nympham  
 Perditus æquoream juvenis quo tempore amabat  
 Vix circum rara signans lanugine malas.  
 Non crispans in fronte comas, non poma, rosamve  
 Ipse ferens; sed enim male totis actus amabat  
 Heu furiis: cura hæc fuit una, at cetera ludus.  
 Sæpe assueta greges rediere ad ovilia soli  
 E viridi pastu, spumoso in litore nympham  
 Dum canit, & luctu tristis tabescit acerbo  
 Ipsius auroræ rutilo surgentis ab ortu  
 Vulnus alens. Erycinæ potens quo pectora fixit  
 Lethiferam condens alto sub corde sagittam.  
 Hoc tamen, invenit curis lenimen: in antro  
 Aërio residens, ac subdita cæcula spectans

Suavidico tales fundebat gutture questus.

Candida, quid miserum, Galatea o, spernis amantem?  
 Lacte mihi puro mago candida, mollior agno,  
 Sævior & vitulo, sylvestri & acerbior uva,  
 Ipsa venis, quum dulcis habet mea lumina somnus;  
 Et subito fessos idem quum deserit artus,  
 Forte lupum ceu visat ovis, fugis ipsa vocantem.  
 Tempore jam ex illo cœpi te captus amare,  
 Venisti ut primum nostra cum matre hyacinthos  
 Carpere purpureos optans in montibus istis;  
 Monstrabam dux ipse viam, lætusque præibam.  
 Numquam ego post valui requiescere: nunc neque possum;  
 Heu semel aspecta; tu vero haud improba curas.  
 O formosa, scio, cur me sic territa vitas:  
 Productum geminas hinc atque hinc fronte sub auræ  
 Setosumque supercilium, villosaque barba  
 Displicet, atque unum curva inter tempora lumen,  
 Et patulæ simæque super labra hispida nares,  
 Talis at ipse cavis niveas in vallibus agnas  
 Mille sequor: multum mage dulci nectare suava  
 Lac mihi mulgetur, nec plena æstate recentes  
 Caseoli, extremo desunt nec frigore, & udo  
 Autumno: stant usque graves circum calathisci,  
 Canto, ceu nullus Cyclopum in montibus hisce;  
 Te celebrans, te dulce meum, pulcherrima, malum  
 Voce vocans, seramque ægrum conquestus amorem  
 Sæpius in noctem. tibi, nymphea o candida, cerys  
 Bis quinas unamque super per gramina pasco,  
 Fœcundas omnes, quæctas jam fœtibus omnes;  
 Quatuor & œculos venanti in rupe repertos  
 Ursorum capulos ego servo, tu modo in antrum  
 Nymphea veni, majora feres & munera tecum.

Scrupea cærulei feriant sine litora fluctus;  
Dulcius hoc mecum requiesces nocte sub antro.  
Heic & odoriferæ lauri, & teretes cyparissi,  
Nigrantesque hederæ, dulcisque in vitibus uva.  
Et manat riguis nemorosæ e rupibus Ætnæ  
Unda mihi, gelidam quam puræ ad pocula stillant  
Inter saxa nives. quis amet post talia pontum  
Incolere, aut glaucis non ultro hæc præferat undis?  
Quod tibi si horridulus videor, sunt robora nobis  
Dissecta e quercu, calido latet abditus ignis  
Sub cinere; ardescens per te non perdere flammis  
Hanc animam, non ipsum oculum, quo dulcius uno  
Nil habeo, renuam. cur ah! non mater habentem  
Squammea me peperit curvatis brachia pinnis,  
Ut subiens tua testa tuas levis osculer ungas,  
Ni potius vis ora? tibi vel candida ferrem  
Lilia, vel lento rubicunda papavera collo.  
Omnia nec possem ferre una: hæc frigora sera,  
Illa sub ardenti veniunt felicius æstu.  
Jamque animus fert, nympha, ipsas & nare per undas  
Discere, si veniat quis nostra ad litora nauta:  
Sic vobis quid dulce ferat domus æquore, noscam.  
Huc ades, o Galatea: undoso e gurgite frontem  
Exere, & oblitus residens, ceu lentus & ipse,  
Ne propera tua regna abiens invisere sedes.  
Heic potius placeat per gramina ducere mecum  
Lætæ gregem, atque ovium pressare tumentia palmis  
Ubera, & expresso miscere coagula lacti.  
Heu mater, me sola heu mater perdidit; ipsam  
Saucius incuso. de me est nil dulce loquuta,  
Nec dixit, quod amo; licet illa & sæpe querentem,  
Et magis atque magis tenuatum corpore cernat.

Jam nunc afflictumque caput, pariterque dolere  
 Crura pedesque ambos dicam mihi, tristis ut ipsa  
 Indoleat, tam tristis ego quum tempora duco.  
 O Cyclops Cyclops, quo te malus abstulit error?  
 Quin rediens utinam calathos vel texere junco,  
 Frondea vel teneris ovibus virgulta parares  
 Sternere; quam satius cura hæc te digna deceret!  
 Præsentem mulge: quid quæ fugit, anxius usque  
 Insequeris? fors & formosior altera cedit  
 Parta tibi Galatea. jubent me ludere multæ,  
 Et canere, & secum requiescere nocte puellæ:  
 Ipsæ etiam rident, segnis quod vota petentum  
 Haud moror; in terris etiamnum vivere dicor.  
 Sic melius Musis ægrum solatus Amorem  
 Lenibat Cyclops, quam si aurea dona dedisset.

## IDYLLIUM XII.

## A I T E S.

*Amatorium est hoc breve Idyllium, nec caret simplici  
 quadam venustate. In eo autem amator quidam de-  
 siderat, ut ejusdem amicus pari ipsum amore sem-  
 per prosequatur. Jonica plerumque dialecto scrip-  
 tum est.*

VENISTI, puer alme, aurora ut tertia fulsit  
 Post totidem noctes venisti? perdit amantes  
 Ah nimium properata vel una in luce senectus.  
 Quanto ver bruma, quanto mage suavia prunis  
 Poma placent, quantoque suo villosior agno

Præstat ovis, quanto ter nupta matre vigescit  
Virgo pulcra magis, quantoque est hinnulus acri  
In cursu vitulo citior, philomelaque quanto  
Dulcisono potior cantu sese evehit omnes  
Inter aves; tanto mihi gratior omnibus unus  
Deliciis tu grate venis. vestigia lustrans  
Ipse tua, ardenti fessus ceu sole viator  
Frondifera quercus ramosa umbracula fagi,  
Te solum optabam, solum te voce vocabam,  
O concors utinam nobis aspiret utrisque  
Dius amor, seris ut dulce nepotibus olim  
Simus uterque inter felicia gaudia carmen,  
Unanimes vixere duo olim fœdere juncti  
Alterno juvenes; unum, quis dicat Amyclis  
Eispnilon, patriæ de nomine vocis amicum,  
Thessalioque alium de more appellet Aÿten,  
Scilicet æquali fixum præcordia amore;  
Nam simili ardebant flamma. tunc aurea certe  
Secla hominum viguere, ubi amatus amabat amantem,  
Edite Saturno sic & pater adnue nobis,  
Ut memoret nos fama æterna vigentibus annis,  
Et mihi bis centum post secla Acherontis ad undas  
Nunciet: ille tuus sociique amor almus in ore  
Cunctorum est, juvenumque in primis. vota secundent  
Hæc mea Cælicolæ, placitoque o! numine fident.  
Interea meritis celebrans te laudibus ulla  
Non ego mendacis metuam vestigia linguae  
Visa super naso. namque etsi læseris olim,  
Continuo noxam duplicato fœnore reddis  
Innocuam; potiusque juvas bis carus amantem;  
Semper ego referens abs te dona aucta recedo.  
Nisæ & Megaræ cives, Neptunia pubes,



Vivite felices, quo! soli ex omnibus illum  
 Cecropium cumulasitis honore Dioclea, quondam  
 Cui fuerunt lusus puerorum & munera curæ.  
 Ipsius ad tumulum primi sub tempore veris  
 Collecti certant pueri, quis doctus ab arte  
 Oscula ferre sciat melius. qui dulcia labris  
 Labra mage applicuit, florenti tempora sermo  
 Vincit abit, caræque ostentat præmia matri.  
 Felix o tali quisquis certamine iudex  
 Assidet! ille quidem Ganymedi multa venusto  
 Vota facit; labroque tenus jam lydius optat  
 Esse lapis, rutili quo bractea fulva metalli  
 Sæpe fabro vigili, ne sit vitiata, probatur.

## IDYLLIUM XIII.

## HYLAS.

*Hoc XIII. Idyllum inter Theocritæa est item scriptum  
 ad Niciam: docemur autem, non solis hominibus  
 Amorem imperitare, verum etiam heroibus.*

**H**AUD tenerum nobis, ni mens me fallit, Amorem,  
 Nicia, progenit solis, quicumque deorum  
 Protulit indomitum; nec nobis pulcra videntur,  
 Quæ visu sunt pulcra, unis, mortalibus ægris  
 Scilicet, ignarisque dies quid crastina portet.  
 Ille etiam Amphitryone satus, fortissima proles,  
 Cui cessit Nemeæ terror, dilexit amatum  
 Victus Hylam nivea cirros in fronte plicantem;  
 Et genitor velut ipse suum docet omnia gnatum,

Edocuit, qua doctus erat, qua clarus in arte.  
 Numquam erat a caro puero procul, altus agebat  
 Vel media sol luce rotas, vel candida bigis  
 In croceis cælum fulgens aurora petebat,  
 Vel tenebris nox atra polum spargebat, ubi omnes  
 Respiciunt avium queruli sua culmina fœtus,  
 Quos mater tremulis invitat desuper alis.  
 Tantus amor pueri, tantusque insederat ignis  
 Anxifero sub corde! ille autem exempla sequutus  
 Grandia florentes æquabat laudibus annos.  
 Sed quando Æsonides auratum ad vellus Jason  
 Tenderet, ac late totis ex urbibus irent  
 Delecti juvenes; Jaolci ad mœnia venit  
 Ipse etiam auxilio properans durissimus heros  
 Filius Alcmenæ Mideatldis heroinæ.  
 Atque illum comitatus Hylas conscendit in Argo  
 Velivolam; quæ sola nigras Symplegadas inter  
 Innocuo fugit lapsu, Phasimque profundum  
 Ingressa est, liquidos volitans super edita fluctus,  
 Ceu Jovis ales. iniquæ ex illo tempore cautes  
 Instabiles quondam, fixa radice, steterè.

Jamque ubi formosum terris os Plejades ortæ  
 Monstrabant, pinguesque aderant in saltibus agni  
 Extremo sub vere; omnis flos pubis achivæ  
 Maturavit iter cursus memor; altaque fusi  
 Herôes ad transtra ratis, spirantibus austris  
 Per tres usque dies, celeremque ferentibus Argo,  
 Hellespontiaci subierunt gurgitis oras,  
 Et portu sedere Propontidos, arva Cianum  
 Pinguis qua fortes invertunt vomere tauri.

Emicat in litus pubes, cœnamque sub ipsa  
 Nave parat propius venienti vespere; & una

Accubere toris multi communibus: ingens  
 Nam viridi sese tendebat gramine pratum.  
 Butomon hinc foliis pars carpere certat acutis,  
 Et conferre: secant alii, rapiuntque cyperum.  
 At flavus discedit Hylas, dulcemque requirit  
 Fontis aquam, latices Alcidæ ad pocula, & ipsi  
 Laturus Telamoni, ambo qui semper eadem  
 Consuevant socii dulces considerare mensa.  
 Urna manu in pueri stat ahenea: jamque repertum  
 Sub tumulo fontem declivi conspicit. herbæ  
 Undique funduntur variæ, totumque coronant  
 Cæruleumque chelidonium, viridansque adiantum,  
 Pubentesque hederæ frondes, crispataque agrostis.  
 In medio nymphæ ducebant fonte choreas,  
 Insomnes nymphæ, miseris metuenda colonis  
 Numina, & Eunice, Malisque, & pulcra Nychea  
 Ambrosium referens obtutu veris honorem.  
 Ergo haurire parans magnam demiserat urnam  
 Heu puer infelix; nymphæ quum protinus onines  
 Complexæ manibus subter traxere paventem:  
 Namque omnes Amor unus agit, furor omnibus idem  
 Argivum in puerum. nigrantes pronus in undas  
 Ille cadit cælo veluti quum stella sereno  
 In mare præcipitat rutilans, nautisque magister,  
 Ponite, conclamat, rite arma; en aura secunda.

At puerum nymphæ lacrymantem mollibus instant  
 Vocibus affusæ solari, udoque fovere  
 In gremio acceptum; dum contra exterritus amens  
 Alcides, nondum redeuntem lumine cernens,  
 Continuo scythicumque arcum furibundus & acrem  
 Corripuit clavam, dextra quam semper habebat;  
 Exhibetque acer; puerum ter nomine carum

Ingeminans, quantum potuit contendere vocem.  
Ter clamavit, Hyla; ac sonitum puer audiit imo  
Gurgite ter missum, tenuisque exivit ab undis  
Reddita vox, spatio ceu longo adveſta sonaret,  
Ipsa foret vicina licet. tum faucibus asper  
Ille leo veluti siccis, si quando rudentem  
Audiit hinnuleum longe, cervice comantes  
Attollitque jubas, notoque erumpit ab antro  
Sese epulis cupiens quamprimum explere paratis.  
Sic puerum quærens auditum, sentibus aspra  
Perque loca Alcides fertur, perque invia lustra  
Turbidus, ac tota late regione vagatur,  
Heu nimium miseros, torret queis pectora flammis  
Sævus Amor! quos ille vagus circum undique saltus,  
Quæ juga lustravit demens & Jasone & omni  
Posthabita cura? jam prono in litore stabat  
Navis, & antennis suspendere vela parabant  
Jam nautæ, media frustra dum nocte morantem  
Alcidem expectant, qui quo furor intus agebat,  
Ibat inops animi. tanto Deus ilia fixit  
Vulnere, acidalio telum jaculatus ab arcu.  
Sic formosus Hylas æternæ munere vitæ  
Lætus ovat: socii Alciden nec carpere dictis,  
Nec cessant culpæ, citam quod turpiter Argos  
Spumea calcantem ter denis æquora transtris  
Deseruit profugus, pedibusque ad Phasidis oras  
Venit, & immanes ad inhospita nomina Cholcos.

## IDYLLIUM XIV.

*Civium potius est, quam pastoritium hoc carmen, in quo Æschines amico Thyonico narrat, ut eum Cynisca uxor Lupo cuidam adolescenti in amore posthabuerit, effugeritque e domo. Quamobrem & mittere se decrevisse dicit.*

ÆSCHINES, & THYONICUS.

**T**E jubeo multum salvere, Thyonice. *T.* salve, Æschine. *Æ.* quam serus? *T.* Sic est. quæ cura fatigat? *Æ.* Haud agitur recte. *T.* quidni? macrescis, & ore Barba inculta horret, squallentque in fronte capilli. Talis Pithagoræ de Secta huc venerat hospes, Pallidus, exutusque pedes: jactabat Athenis Se genitum, sed dona magis cerealia avebat. *Æ.* O bone, tu ludis. sed me formosa Cynisca Dedecorat. jam jamque furo, vix deficit hilum, In medio. *T.* talis tu semper es, Æschine; lenis, Mox asper, cupiens recta omnia. dic tamen, ista Quæ nova cura tibi, quæ tanti caussa doloris? *Æ.* Argivus meus hospes, egoque. & Thessalus ille Apis equum domitor, Cleonicus & impiger armis Rure meo læti potum consedimus una. Mastaram pullosque duos, niveoque madentem Lacte suem, vinumque illis prædulce relevi Byblinum, odoriferum, quadrimum, ut nuper ab ipso Diffusum prælo. cochleæ bulbique salaces Haud deerant, nimium dulcis potantibus esca, Jamque in processu pariter convenimus omnes,

Suave merum cyathis ut quisque capacibus ultro  
 Hauriat, & nomen prodat, cui vina propinēt.  
 Ergo hilares potamus, & alta voce sonamus,  
 Quod placitum cuicumque. nihil dicebat at illa  
 Me præsente. fuit quis nostro in pectore sensus?  
 Non loqueris? subitoque, lupum num videris, alter  
 Dum poscit de more jocatus; & arsit, & ore  
 Ipsius ardenti tædas incendere posses.  
 At Lupus ille, Labæ Lupus est de sanguine cretus  
 Vicini, longusque, tenerque; idemque videtur  
 Formosus multis. insigni ardebat amore  
 Illius, idque mihi tulerat clam fama per aures;  
 Quærere sed renui, nequidquam tantus inanem  
 Ore gerens barbam hanc. postquam vero bene poti  
 Nos quatuor socii fuimus, tum Thessalus ille  
 De nostro cantare Lupo, sermone paterno,  
 Nescio quod carmen cœpit malus. illa repente  
 Ingemuit gravius, quam sexto parvula in anno  
 Nata petens caræ gremium genitricis & ora.  
 Tunc ego, quem duco te nosse, Thyonice, pugnum  
 In faciem, rursusque alium correptus ab ira  
 Impegi; fugit illa, sinus collecta fluentes,  
 Erumpitque foras. sic o tibi, pestis acerba,  
 Haud placeo? carusne sinu magis alter inhæret?  
 I licet, atque alium foveas lasciva per umbras,  
 Illi hæ poma tuæ lacrimæ ceu grandia manant.  
 Ipsa, velut, nidis quæ fida loquacibus escam  
 Intulit, extemplo quærens nova pabula hirundo  
 Evolat e tecto; se strato e tegmine raptim  
 Proripuit, biforesque inverso cardine valvas,  
 Qua rapidi duxere pedes, furibunda reliquit;  
 Utque vetus fert fama, in sylvam & taurus abivit,

Jam

Jam luces bisdenæ, octoque, novemque, decemque  
Rursum aliæ fluxere; hodie est lux denique nata  
Undecima: huic geminas super adde, & tempora mensis  
Efficies bini, quo nos disjungimur ambo,  
Threicio nec more comam de fronte totondi.  
Illa Lupi nunc tota; Lupo fert gaudia nocte.  
Nos Megaræ sine honore, sine ullo & nomine cives  
Degimus heu miseræ semper ludibria sortis.  
Quod si etiam obniti, contra & durare valerem,  
Cura foret levior; sed nunc de mure quod ajunt,  
Dulcis amice, picem gustavimus, & quod amoris  
Sit lenimen, adhuc nos ultra haud nosse fatemur,  
Solliciti. qui natam Epichalci Simus amabat  
Æquævus meus ille, ut dissita classe petivit  
Litora, mutatus rediit. per cæcula & ipse  
Ibo alacer: nec primus ero. nec miles in armis  
Ultimus; in mediis numerabor forte maniplis.  
T. Ut cupis ipse, tibi sic cedant omnia vota,  
Æschine. si certum est alias hinc tendere ad oras,  
Didit opes large Ptolemæus, libera curat  
Pectora nec quisquam tantum. Æ. sed cetera qualis?  
T. Lenis, & Aonidum studiosus, amabilis, ultra  
Spem jucundus, amicum noscit, & ipsum  
Plus inimicum etiam. multis dat multa rogatus,  
Qualia fas regem largiri: nec tamen illum  
Sollicitare novis decet usque ad munera votis,  
Æschine. quare adeo placeat si fibula, summam  
Dextro humero chlamydem quæ rite coërceat, & si  
Rectus utroque audes pedè contra irrumpere scutum  
Militis adversi pelago pete fida Canopi  
Litora. paullatim canescere tempora cuncti

Incipimus, serpitque genis mox fusa senectus  
In niveis: quum genua virent, tunc apta labori.

## IDYLLIUM XV.

*In hoc Idyllio quædam Syracusia mulieres inducuntur  
inter se colloquentes, & festum Adonidis invisura.  
Multis personis constat Idyllium, estque totum  
drammaticum, nativa quædam simplicitate maxi-  
me commendandum.*

GORGŌ, EUNŌA, PRAXINŌE, ANUS, HOSPEs,  
ALTER HOSPEs, & VATES.

**P**RAXINŌE-NE domi? *E.* tam sera, o candida Gorgo?  
Sola domi est. *P.* mirum, vel nunc venisse: moraris,  
EunŌa? da sellam, pulvinumque. *E.* omnia præsto.  
*P.* Ergo sede. *G.* o fortem! quæ salva evadere quivi,  
PraxinŌe, præ turba, & curribus undique fuis.  
Cuncta sonant ocreis, chlamydatæ & murmure pubis;  
Ipsa autem via multa; hinc longo tramite disto.  
*P.* Extremum hunc terræ fatuus tenet ille recessum;  
Antra magis, quam tecta: simul ne sæpe coire  
Possimus nos inter, acerba atque invida pestis.  
*G.* Talia parce tuo de conjuge, cara Dione,  
Heic puero præsentē. viden', te ut lumine cernit?  
*P.* Fide, o Zopyrion, carum genus: haud mea patrem  
Dicta petunt, *G.* Sensit, sic me Proserpina servet,  
Sensit cuncta puer. Pater est pulcherque bonusque.  
*P.* Ille pater paullo ante (licet nam dicere cuncta  
Facta quidem paullo ante) nitrum dum forte volebam  
Consuetum & fucum, tulit ipse cœmpta nigrantis



Grana salis, cubitis jam denis longior artus.

G. Sic etiam meus ille, lues nummum, Dioclides

Septenis evulsa canum de corpore drachmis,

Non ovium, corrosa emit mihi vellera quinque,

Purgamenta, meras sordes, duplicemque laborem.

Verum age formosamque stolam cape, & aurea nescit

Fibula quam late, pallam. juvat ire superbas

Divitis ad sedes Prolemæi regis, Adonin

Visuras, cui pulcra novæ spectacula pompæ

Dicitur insueto luxu regina parare.

P. Cuncta domo in ditis sunt ditia. quæ tibi visa,

Et quæ dicta, mihi quæ nil vidi, omnia narra.

G. Ire quidem nunc præstat: inertibus otia semper.

P. Eunoa, fer lymphas; medioque infundere cures

Vase tenus. depone. ipsæ quoque mollia feles

Strata volunt. necdum o semper morosa moveris?

Lymphas, fer propere lymphas, queis indiget usus

Ante alia. ut portat? da protinus: heus male tantam

Fundis aquam; tunicam cur totam spargis, inepta?

Desine. ceu Superi voluere, en fonte rigavi

Membra satis. magnæ jam cistæ ubi clavis? eandem

Ocyus huc. G. nimium decet hæc te vestis, amica,

Fibula quam circum sinuosam plexibus ornat.

Dic, pretio quo texta jugo tibi venit ab ipso?

P. Ne memores, Gorgo: plus mna, fermeque duabus

Argenti puri. vix non affixa labori

Ipsam etiam posui vitam super. G. at bene cessit.

P. Næ: recte dixti. fer pallam, & pone decenter

Flammeolum. non te ducam, mi nate: foris stat

Larva, ac mordet equus. tu flecto quamlibet orans,

Haud patiar fieri claudum. jam denique eamus.

Heus, Phrygia, accipiens puerum fac ludat, & istam

D ij

Hinc catulam revoca, portamque occlude domörüm.  
 Proh Superi! quæ turba? ecquando hæc agmina, & arte  
 Qua liceat transiré malum? glomerantür ut atræ  
 Formicæ humeró expertes. sunt plurima recte  
 Gestá tibi, Ptolemæe, pater postquam altá petivit  
 Astrá Deüm: nemo subiens offendit inertem  
 Fraude viátorem, patriüm male subdólus astüm  
 Exercens velut anté, víri quüm turpibús usi  
 Insidiis se inter similes rixaque procaces  
 Omnibus instabant nocuös intexere lusüs:  
 De nobis quid erit? jam túrmæ regis equéstrës  
 Huc properant. calces cavé, amice. en rectus ad aútas  
 Ille salit jam rufus. ut asper, & intitus ira est!  
 Eunóa, non fugies? equitem dabit ille vel ipsüm  
 Exitio. o factum egregie, quod natus in æde:  
 G. Práxinõe, hunc fide: sumus post agmina retró;  
 Jam cämpum petiere. P. ánimum simul ipsa recepi.  
 Námquæ duo hæc timui puerili semper ab ævo, (quat  
 Anguem, & equum. circum fesónans multa ecce propin-  
 Turba iterum: celeremus. G. ab aula, o mater? A. ab aula:  
 G. An penetráre licet? A. tonando Pergama Graji,  
 O mata; attigerunt: conantibús bñnia cedunt.  
 G. Cessit ánus, tripode ex ipso ceu fata loquútá:  
 Omnia nóverunt vetulæ: nóveré vel ipse  
 Júpiter in thalamum Juhonem ut duxit amátam.  
 Aspice, pro foribus quanto furit agmine turba?  
 P. Immensa, o Gorgo: mihi dextram porrige; tuquæ  
 Eunóa, prende manus Eutyichidos, & simul olli  
 Here affixa, usquam ne longe abrepta recedas.  
 Omnes confertim subeamus. ubi Eunóa? adhære.  
 Me miseram, Gorgo! scissum est a vertice velum  
 In geminas partes. serva, tibi Jupiter adsit,

O bone vir, pallam. *H.* vix possim; nec minus ipso  
 Servabo. *P.* quam magna ruentum est unda? sues ceu  
 Præcipientes trudent. *H.* confide: evasimus undam,  
*P.* Dii tibi dent semper posthac felicibus uti  
 Auspiciis, qui nos juvisti, & providus ultro,  
 Et facilis. promittitur nobis en Eunoa: rumpe,  
 Infelix, vim vi. bene sit: qui limina sponsæ  
 Claudis, ait, cuncti sunt intus. *G.* suspice primum,  
 Quam tenui hæc filo contexta aula coruscant,  
 Praxinoe; quam pulcra; putes opera esse deorum,  
*P.* O Pallas! quæ fila manus tam dædala nerunt  
 Lapideæ, tales quis pinxit ab arte colores  
 In variis late formis? stant omnia viva  
 Ante oculos, motuque ipso gestire videntur  
 Non texta, at potius spirantia; magna deorum  
 Munere mens homini, magna est super addita virtus,  
 Ipse autem quam pulcher in alto tegmine fultus  
 Argento e niveo, prima lanugine spargens  
 Ora, jacet, stygiis etiam dilectus in umbris,  
 Ter nimium dilectus, & exoptatus Adonis.  
*A.H.* Desinite, o miseræ: quid tam garrulibus auræ  
 Rumpitis? ipsa etiam vobis jam garrula turtus  
 Cedit; cur patula voces sic ducitis ore?  
*G.* Heus tu, quisve, vel unde? an si garrire voluptas,  
 Non liceat? ancillas potius parere iubeto.  
 Tunc Syracusiis audes dare jussa? Corinthus,  
 Hoc etiam ut noseas, nos prima a stirpe Corinthus  
 Protulit, illa eadem quæ fortem Bellerophonem.  
 Nos veteris patriæ loquimur sermone, neq; unquam  
 Doricæ dedecuit sermonis gratia Doros.  
*P.* Haud erit, o mellita, teor, qui talia nobis  
 Imperet, excepto tantum uno, non mihi cura

Ulla tui; nec dicta moror, nec munera posco.  
G. Praxinoe jam cara sile. cantabit Adonin,  
Cantabit sapiens Argiæ filia Vates,  
Quæ quondam & Sperchin lugendo præmia cepit.  
Dulce parat pulcrumque aliquid: proludit ab arte.  
V. Quæ regis Idalium Golgonque o maxima diva  
Sublimemque Erycem gaudens Venus aurea ludo,  
O tibi nunc qualem plantis tardantibus Horæ  
Tartarei subter nigranti Acherontis ab unda  
Post annum retulere sacra ad sollemnia Adonin;  
Horæ, diis tardæ magis omnibus, omnibus Horæ  
Quæ tamen & veniunt optatæ, & præmia portant.  
Cypri, Dioneæ matris pulcherrima proles  
Tu Divûm in numero Berenicen diva locasti  
Ambrosiæ instillans, ut fama, in pectora succos.  
Quare etiam nunc grata tibi, quæ nomine gaudes  
Multiplici, templisque novis, nata ipsius almæ  
Tyndaridi Arsinœe similis regalibus ornat  
Muneribus, celebratque tuum sic dives Adonin.  
Namque illum juxta, quæcumque arbusta tulere,  
Poma jacent matura; leves stant mollibus horti  
In calathis septi argento; stant plena alabastra  
Assyrio unguento, quantum & miscere saporum  
Femineæ novere manus cum germine florum  
Omnigeno, Cerere & nivea; stat quidquid olivo  
E liquido, quidquid sit dulci e nectare mellis.  
Hæc adsunt, repuntque imo quæ gramine, quæque  
Alta volant: molli circum viridantia anetho  
Funduntur sublime exstructa umbracula; Amores  
Aligeri supra volitant, ut in arbore pulli  
Dauliados, tremulis quum tentant aëra pennis,  
Nunc hos nunc illos certant insidere ramos.

O ebum, o aurum, volucres o dente elephant  
E niveo insignes aquilæ, quæ cæcula supra  
Templa Jovi pulcrum Ganymedem ad pocula portant?  
Purpurei rutilant suprema in parte tapetes,  
Quos dicat somno mage molles & Samos omnis  
Et Miletus, opus genti mirabile utrique.  
Formoso torus alter Adonidi stratus, & alter  
Est Veneri: tenet hunc Cytherea, hunc pulcher Adonis  
Nondum bis decimo pubescens sponsus in anno,  
Sed minor aut binis, aut uno, en brachia tendit  
Sparsa rosis, tollitque labella, haud oscula pungunt  
Mollia flaventis primo vix flore labella.  
Nunc sponso Cytherea suo gavisa fruatur:  
Nos illum ad fluctus, dum ros per gramina candet,  
Litoris undisoni rosea cum luce feremus  
Agmine condensæ; vittisque in fronte solutis  
Demissisque peplis ad talos, nuda gerentes  
Pectora, luctifico dicemus carmen ab ore.  
Scilicet heroum, ceu fama est, solus, Adoni,  
Tu superas visisque auras, Acherontis & umbras;  
Non magno Atridæ, non hæc data munera forti  
Ajaci; non, bisdenos Cysseidos inter  
Maximus egregiæ natos qui floruit, acri  
Priamidæ, aut Patroclo, Pyrrhove ex urbe reverso  
Dardania victori; ipsis non, tempora prisca  
Quos tulerunt, Lapithis, aut Deucalione creatis,  
Non generi Pelopæo, aut Argi in honore Pelasgis,  
Sis bonus o, placidusque tuis; ac rursus, Adoni,  
Lætitiâ nobis alio fer redditus anno.  
Venisti lætus, redeas & lætus, Adoni.  
G. Praxinoe, quam mira auditu hæc carmina. felix,  
Tanta datum cui nosse; o felix, dulcia tantum

Carmina quæ fundit vates! sed tempus abire:  
 Impransus mihi, adhuc Diocliides: asper in ira,  
 Terribilisque furit. non illi accedere coram  
 Jejuno speres impune. vale, o vale, Adoni,  
 Atque iterum lætus nos lætas usque revise.

## IDYLLIUM XVI.

## CHARITES.

*Videtur hujusce Idyllii argumentum esse consueta poetarum nania, nimirum fructum, quem percipere sperarunt, non respondere votis; quod homines vel nimium avari sint, vel turpi inscitia teneantur, neque pervideant, quantam assequi gloriam potuissent ex poetarum laudibus. Demum in Hieronis laudes famamque bellicam excurrit Vates.*

HÆC habet & Musas, & semper cura poetas,  
 Carmine perpetuo divos celebrare, virosque  
 Eximios fama. Musæ sunt numina, cantu  
 Numina concelebrant; at nos mortalia secla  
 Mortales. quisnam vero, quas roscida spectat  
 Conjugis e roseo surgens Aurora cubili,  
 Nunc hominum e cœtu, patefacto limine, nostras  
 Accipiat cupide Charites, nec turpiter aſtas  
 Retrorsum potius cogat sine munere abire?  
 Illæ autem iratæ nudo pede testâ revisunt,  
 Meque etiam incusant quod longæ tædia jussil  
 Frustra ferre viæ. jamque iſtæ corda dolore  
 Mœrentesque gemunt, imaque in sede recumbunt  
 Genua reclinantes supra frigentia frontem,

Squallet ubi latebrosa domus; quod cessit in auras  
Spes omnis dilapsa, & cura fefellit inanis.  
Namque ubi nunc doctæ moveat quem gratia linguae,  
Haud equidem novi. neque enim præstantia facta  
Jam sua laudari quisquam cupit; omnibus hærent  
Corda lucro devincta, omnes amor urget habendi.  
Quisque sinu dextram condens, unde undique possit  
Congerere argentum, cupidus circumspicit, ipsas  
Et dare permetuit detera ærugine sordes,  
Continuo clamans: mage curvo tibia distat  
Ima genu; sit habere mihi quæcumque paravi,  
Cuncta uni: faciant vatem ditescere Divi.  
Quis jam alium curet? cunctis satis unus Homerus;  
Optimus ille quidem vatum est, qui præmia nulla  
Accipere extinctus dulci pro carmine sperat.

Heu miseri! prodest quid fulvi immensa metalli  
Vis intus congesta: hanc hic sapientibus auri  
Usus erat: tibi pars servetur, debita vati  
Pars alia est. partem seponere affinibus ipsis,  
Atque aliis hominum multis: sacra usque beatis  
Dis facias variis cumulans altaria donis,  
Nec parcas bonus hospitio, sociaque receptos  
Foveris ut mensa notos, sine rursus abire,  
Quandocumque volent. in primis curam poetas  
Sit colere, Aonidum pleni qui numine cantant;  
Ut Stygias etiam te fama sequuta sub umbras  
Digna sonet nigri gelidas Acherontis ad undas,  
Neve fleas sine honore, aliquis ceu fossor, adunco  
Cui squallet callosa manus durata ligone,  
Pauperiem queritur secum, miseroque relictam  
A genitore famem plorans & tristia damna,  
Multi & in Antiochi testis, & regis Alevæ

Menstrua præbebant epularum dona ministri:  
 Multi etiam Scopadum præsepia ad alta juvenci  
 Implebant resonis auras mugitibus una  
 Cornigeris cum bobus; & alto solis in æstu  
 Pascua mutabant Cranoniam mille Creondis  
 Errantes per prata greges, gaudentibus usque  
 Hospitio facili. non hinc tamen ulla voluptas  
 Afforet, horrentem postquam subiere carinam  
 Exanimes Stygiam jussi transire paludem.  
 Ignavi sine laude ulla, tantisque relictis  
 Frustra opibus post se, turbam vulgi inter inertem,  
 Atque inopes umbras per sæcula longa jacerent,  
 Clarus ni vates, & multa dædalus arte  
 Cælus arguto celebrasset pectine famam  
 Dulcisonæ impellens testudinis aurea fila,  
 Victurumque per ora nepotum sera dedisset  
 Ferre decus. magnus quin & victoribus ipsis  
 Partus equis honor est, qui sacro e pulvere sæpe  
 Læta coronati dominos in testâ tulere.

Quis procures nosset Lycios, quis pulcra comantes  
 Priamidas, Cycnum & formæ muliebris honore,  
 Ni prisca heroum cecinissent prælia vates?  
 Nec Laërtiades, qui centum ex ordine menses  
 Bisenosque super circum maria aspera vectus  
 Omnibus erravit terris, subiitque nigram  
 Vivus adhuc orcum, fugitque e rupe Cyclopis,  
 Ferret inextinctæ famæ decus: ipse subulcus  
 Eumæus tacita noctis premeretur ab umbra,  
 Atque boum servans armenta Philetius ille  
 Impiger, & magnus Laertes, fortis in ipso  
 Vel senio, ni fors juvisset Ionica musa.

A musis venit omne decus mortalibus: aurum



Quod fuit, absumit lætus vivacior hæres.  
Par labor est alto numerare e litore fluctus  
Quam multos ventus propellit ab æquore ad oras,  
Impurum aut laterem lucenti in fonte lavare;  
Ac hominis sperare inflectere pectus avari.

Ergo mihi valeat talis quicumque: sit illi  
Immensumque argentum aurumque; ac semper habendi  
Plura miser magno frustra teneatur amore.  
Ipse quidem contra famamque hominumque favorem  
Anteferam stabulis resonantibus agmine multo  
Quadrupedum; quæramque, olim cui gratus amicis  
Cum musis veniam: non prona aut trita sonantum  
Aonidum via nempe Jovis sine numine magni.  
Sed nondum menses & longos desiit annos  
Volvere sidereum cælum; multique sequentur  
Ducere equi volucresque rotas currumque tonantem;  
Nasceturque vir ille, meum qui carmen avebit  
Tanta gerens, quanta aut Ajax aut magnus Achilles  
Victor apud rapidum Simoenta, ubi marmore bustum  
E niveo phrygii consurgens tollitur Ili.

Jam nunc Phœnices procul hinc sub sole cadente  
In Libyæ extremis degentes finibus horrent;  
Jamque Syracusii clypeo protecta saligno  
Brachia habent, mediasque hastas in bella coruscant;  
Quos inter non ulli Hiero virtute secundus  
Heroum quondam magnorum armatur; equinæ  
Fundunturque jubæ, galeamque minacis inumbrant.

O pater, o magno Pallas prognata parente,  
Tuque tua cum matre, opibus quæ clara superbis  
Lysimeliæ ad aquas ephyreæ mœnia servas,  
Persephone, nostris per vos e finibus hostes  
O utinam mala fata procul Sardoa repellant

Per freta disiectos, sociorum ut damna suorum  
Conjugibus natisque ferant horrentia multo  
E numero jam pauci. utinam sua civibus alta  
Oppida, & antiquis cedant cultoribus urbes.  
Hostica quotquot atrox vastavit funditus ira;  
Et virides campi vigeant, & pingua campis  
Mille ovium late florentibus agmina balent,  
Turmatimque boves reduces e gramine plena  
Ad stabula impedian iter omne, & cedere fessum  
Sæpe viatorem cogant. ad germina læta  
Jam labor exercens exulta novalia scindat;  
Pastores sub dio observet nigra cicada,  
Quum resonat summis in frondibus arboris alta;  
Inque armis patulas extendat aranea telas,  
Ipsaque dediscant jam belli nomina gentes,  
At vates certent Hieronis tollere cantu  
Et decora & laudes Scythici trans frigida ponti  
Litora, & extremos fines, ubi maxima quondam  
Dicitur asphalto vinxisse Semiramis urbem.  
Unus ego quos inter ero; licet aurea musæ  
Progenies Jovis alti alios jam numine multos  
Respiciant vates, ardor quos incitat omnes  
Et Siculam celebrare Arethusam, & dicere cantu  
Indomito cum Marte Hieronem in bella ruentem.  
O Eteocleæ Charites divæ, Minyæum  
Quæ quondam Orchomenum Thebanis triste frequentes  
Incolitis, tacitus latebrosâ in sede morabor  
Haud accitus ego: contra si forte vocabor,  
Adveniam nostris cum musis impiger una,  
Vos etiam nec linquam. homini quid amabile namque  
Esse potest Charisin sine dulcibus? usque sequantur  
Me Charites, propiusque bonæ vestigia servent.

## IDYLLIUM XVII.

## ENCOMIUM PTOLEMÆI.

*Altius heic assurgit poeta, regemque Ægypti Ptolemæum  
Philadelphum præsertim ex generis nobilitate, ex  
immensa ditionis potentia, ex amplissima divitia-  
rum copia, regiaque munificencia laudat.*

**A**B Jovè principium, Jovè in almo carmina linem  
Accipiant; Musæ, quoties pater optimus ille  
Cæcolum tæhitur: mortales inter & omnes,  
Quippe aliis præstat, Ptolemæus laudibus usque  
Supremusque mihi imprimis mediisque feratur.  
Hæres; tulerunt quos olim sæcula prisca  
Semideum de gente, pares ingentibus orsis  
Invenere virum sapientum e carmine laudes.  
At mæstrum dulci Ptolemæum haud inscius ipse  
Aonidum cantu tollam: dii carmina curant,  
Carmina diis etiam virtutum præmia grata.  
Sed veluti arboreis qui nigræ in collibus Idæ  
Adstitit, ingentem cernens late undique sylvam  
Hæret inops animi, cœptet faber unde laborem;  
Sic ego quid primum dicam, quum millia multa  
Sint dicenda, quibus voluere excellere regem  
Hunc superi? qualis primæva ab origine patrum  
Ille fuit Lagides? magnum quam semper ad omne  
Fortis opus tentandum, animo postquam acre probasset  
Consilium non visum alii? sic maximus illum  
Æqualem superis genitor diis fecit, & olli

Ipsius in regis penetralibus aurea sedes  
Contigit. hunc juxta pacata in luce refulget  
Dius Alexander Persis grave numen in armis.  
Contra autem Alcida solido ex adamante coruscat  
Strata super sedes occisi tergora tauri  
Ducit ubi effusos inter convivia divos  
Aspiciens clara lætus de stirpe nepotes,  
Queis senium e membris deterisit Jupiter, ævoque  
Immortali una tranquilla in pace fruuntur.  
Ambobus generis nam filius Herculis auctor  
Hylus, & extremo deductus ab Hercule sanguis.  
Quare & odorato satiatus nectare quondam  
Conjugis ad sedes caræ quum tenderet, arcum  
Ferre alii, pharetramque dedit suspendere tergo,  
Ast alii indomitam nodoso robore clavam.  
Illi autem ambrosiæ progressi limina ad Hebes  
Arma simul thalamo, simul ipsum inducere gaudent.  
Qualis & eximias inter celeberrima matres  
Præstitit illa ingens Berenice cura parentum?  
Cujus diva, tenet quæ Cyprum, gnata Diones,  
Nascentis gremium manibus permulsit odoris  
Flexanimos fingens mores, queis altera numquam  
Nympha suo tantum fertur placuisse marito,  
Quantum ipsam semper caram Ptolemæus amavit  
Ille magis dilectus amata a conjuge. natis  
Jamque suis fretus totam permittit habendam  
Sponte domum, thalamum quoties ascendit amantis.  
Dulcis amans. quid nupta, mali cui pectore sensus?  
Namque alio illius mens usque ingrata vagatur;  
Nec faciles desunt partus, sed germina nata  
Degenerant patrum vultus oblita suorum.  
O Venus, o forma ante alias pulcherrima divas,

Illā tibi fuerat curā : te propter eandem  
Luētificum Berenice Acheronta haud lumine vidit ;  
Sed prius ad nigri venit quam gurgitis undas ,  
Tristis ubi cogit pallentes portitor umbras ,  
Abreptam in sublime sacrata in sede locasti  
Nec socii templi , proprii nec honoris avara .  
Et nunc illa quidem blandos mortalibus ignes  
Omnibus adspirat , curasque vocata resolvit .  
Lumine tu nigro spectanda argiva puella ,  
Quem timuit Calydon , fortem Diomedea partu  
Fudisti Tydeo commixta . at Achillea Peleo  
Aeacidæ dedit alma Thetis cursuque valentem  
Et jaculo ; Berenice autem te pulcra parenti  
Magnanimo Ptolemæo magnanime o Ptolemæe .  
Teque adeo puerum Cos ultro excepit amata  
Accipiens a matre , hausisti ubi parvulus auras :  
Namque ibi Lucinam curarum in vota petivit  
Antigonæ soboles uteri jam pondere pressa .  
Audiit orantem lenis , repulitque dolorem  
Artubus e cunctis ; vitæ est exortus in oras  
Assimilis genitori infans . mirata repente  
Cos plausit , natumque tenens ita voce loquuta est .  
Sis puer o felix , meque illo lætus honore  
Affice , cæruleam quo Delum affecit Apollo ;  
Et Triopis juga celsa eadem jam fama sequatur ,  
Vicinosque simul Dores , qua clara superbit  
Rhenæa auricoma dilecta ab Apolline rege .  
Insula sic postquam fata est , Jovis ales ab alto  
Insonuit tui voce ferens e nubibus omen  
Dextra bonum ; regis nam digni cura Tonanti est .  
Ille autem , quemcumque pater dignatur amore  
Nascentem primum , cunctis excellit , & ipsum

Innumeræ comitantur opes, & possidet amplas  
Multa per & terras, multa & per marmoris undas.  
Sunt variæ gentes, vastum sunt regna per orbem,  
Quæ segetes gignunt largas Jovis imbribus aucta;  
Ast humili Ægypto sese fœcundior ulla  
Præferat haud regio, quum diti gurgite Nilus  
Exundans late mollitos irrigat agros.  
Non alius tam multa virum generosa labore  
Oppida habet, clarasque urbes: sunt scilicet omnes  
Ter centum ter denæ olli terque ordine ternæ  
Triginta supra tria millia, quas regit unus  
Tot populis scepttisque potens Ptolemæus; & ipsum  
Phœnicumque Arabumque simul pars magna tremiscit,  
Et Syriæ, Libyæque, atque Æthiopum nigrantum.  
Pamphylios autem, & Cilicas, Lyciosque feroces  
Ingenti premit ipse omnes ditione, Cerasque,  
Cycladas & pelago sparsas: nam classibus æquor  
Velivolum validis complet, queis occupat omnem  
Et pontum, & fluvios, & vasti littoris oras.  
Quid memorem turmasque equitum, protectaque scutis  
Agmina, quæ densata fremunt, atque ære corusca  
Solis inardescunt radiis? longe antest omnes  
Divitiis reges ingentibus: undique rerum  
Quotidie aggeritur vis tanta in tecta, nec ullum  
Interea populis sollerti in pace beatiss  
Cessat opus. nemo piscosum invadere Nilum  
Scilicet, ac trepidis acies inferna pedestres  
Agricolis audet; nec quisquam Ægyptia raptat  
Prædo armenta bouum celeri per littora lembo  
Exiliens, thoraca indutus, & horridus hasta.  
Talis quippe sedet latis custodia campis  
Flavicomus Ptolemæus in hostem & spargere tela

Impiger, & patriis arcere a finibus arma,  
Tutarique, prior quæ regum est cura bonorum,  
Parta domi; mox Marte fero nova quærere regna.  
Nec vero congesta auri vis tanta sine usu  
Sedibus in plenis jacet usque, ut gaudet avarum  
Formicarum agmen parta occultare latebris;  
Sed multum hinc referunt delubra augusta deorum,  
Primitias ultro queis solvit, & insuper aras  
Muneribus cumulat largis; multumque reportant  
Et socii reges, & celsæ turribus urbes.  
Multa quoque & dignis semper donantur amicis,  
Nec sacra fert quisquam sese ad certamina Bacchi  
Suaviloquo doctus modulari gutture carmen,  
Quin pretium referat dignum arte. hinc tollere cœlo  
Musarum interpres vatum chorus omnis eundem  
Adproperat; neque enim diti præclarior ulla  
Res homini, quam cura insigni gloria cantu.  
Hæc manet Atridas tantum: bona cetera, & illæ  
Immensæ, capta Priami quas urbe tulere,  
Nocte premuntur opes cæca, nequit unde redire  
Pars ulla. hic veterum calcans vestigia patrum  
Solutus, adhuc calido signata in pulvere, vicit;  
Et matri caræ patrique halantia templa  
Condidit, atque ipsos ex auro & sæcto elephanto  
Insignes statuit, miseris mortalibus essent  
Auxilio ut faciles. multorum pinguis ad aras  
Exsta boum, circum revolutis mensibus anni,  
Rite litans incendit & ipse & candida conjux,  
Qua non ulla virum mage clarum amplectitur ulnis  
Idaliis flagrans in fratre & conjuge tædis.  
Talia connubia ac tales celebrare hymenæos  
Dii soliti, peperit Rhea quos regina futuros

Siderea reges cæli omnipotentis in arce ;  
 Junonique Jovique torum Thaumantias unum  
 Stravit adhuc virgo manibus bene olentibus Iris .

Salve, rex Ptolemæ : mihi celebrâre semper,  
 Semidei qua laude alii, nec vile nepotes  
 Credo equidem carmen dicent : te supplicè tantum  
 Ab Jove ne pigeat virtutem posceré voto :

## IDYLLIUM XVIII.

### HELENÆ EPITHALAMIUM :

*Virgines Spartanæ, uti mos erat in Græcia, in Menelai domum congregatæ, multa canunt in honorem conjugum .*

**S**PARTÆ olim flavi sede in celsa Menelai  
 Inuptæ juvenes hyacinthina sarta gerentes  
 Ad thalamum venere choro lætante recentem,  
 Bis sex delectæ prima de gente Lacedæ,  
 Tyndaris Atridæ qua tradita nocte minori est.  
 Carmen idem cunctis, choreas junctò pede cunctæ  
 Plaudebant : læto sonuit domus alta hymenæo.

Siccine, sponse, cubas jam hunc sub vesperis ortum ?  
 An tibi genua labant ? an totas stertere noctes  
 Te juvat ? an calices dormitum egere feraces ?  
 Saltem issès properè solus, si forte soporis  
 Indigus, & sineres nymphis colludere nympham,  
 Maternò hærentem lateri, dum fulgeat Eos ;  
 Vespere tota tibi, tibi mane erit uxor in annos.  
 Fortunatè, bonum tibi quisnam sternuit omen,  
 Sponse, procos inter primos cum mœnia Spartæ  
 Ingressus diæ peteres connubia natæ ?



Fortunate: socer factus tibi Juppiter uni,  
Nata Jovis magni tibi conjux contigit uni;  
Vincit Achæïadas forma quæ pulcrior omnes.  
Nascetur forma quiddam æquum cælitibus diis,  
Si matrem referet formoso filius ore.  
Sex decies quindenæ ævo florente puellæ  
Ungimur Eurotæ prope flumina more virorum:  
Harum nulla Helenæ possit collata probari.  
Nocte velut sacra primo sub vere decorum  
Flava caput ponti roseis attollit ab undis  
Exoriens aurora; omni sic illa micabat  
E numero æquales inter pulcherrima; firmis  
Viribus illa omnes, procero & corpore præstans.  
Sulcus ut in culto procurrit maximus arvo,  
Surgens pomifero celsa ut cupressus in horto,  
Thessalus ut sonipes currum fremit ante sonantem;  
Sic Lacedæmonias inter fuit illa puellas,  
Cunctis una decus, cunctis præstantior una.  
Nulla operum melior, lentos implere quasillos,  
Ducere vel radio varium subtemen acuto,  
Dædaleaque manu partiri ac pingere telas.  
Nulla ciet docto citharam sic pollice, festo  
Et Triviam celebrat cantu magnamque Minervam,  
Tyndaris ut blande flagranti dulcis oculo.  
Dia puella domus posthac tibi cura, tuæque  
Prolis erit: nos mane novo de more petemus  
Et stadium & rapidi lætæ certamina cursus,  
Carpentes prato in viridi benevolentia sarta,  
Usque tui memores, Helene, te sæpe vocantes,  
Sæpe vocant teneræ matrem ut balatibus agnæ.  
Nos loto ex humili primæ tibi rite coronam  
Umbrosa in platano figemus, nos tibi primæ

Sub plataho umbrosa stillabimus unguina ; in udd  
 Has Dorum & lingua scribemus cortice voces,  
 Quas legat aspiciens oculo properante viator .  
 Arbor sacra Helenæ sum : me venerare , viator .

Salve nympha , gener salve Jovis inclyte . prolem  
 Latona eximiam , sobolis Latona beatæ  
 Nutrix , det vobis ; Cypris , Dea Cypris amorem  
 Det fidum ; det opes divum rex Juppiter , & rem ,  
 Quæ maneat gnatis serisque nepotibus , amplam .  
 Vos modo dulce simul dormite , cupidinis ignem  
 Alter in alterius spirantes pectora ; somno  
 Aurora excutiat , memoresque amor incitet ambos .  
 Una omnes , plumosa dabit per colla sonoros  
 Gallus ubi cantus , nos prima huc luce reversæ  
 Certatim læta dicemus carmina voce .  
 Hymen o Hymenæe , Hymen gaude o Hymenæe .

## IDYLLIUM XIX.

### FAVORUM FUR .

*Ut apis , sic Amor pusillus est ; magnum tamen vul-*  
*nus infigit .*

**D**UM furtim alveolis subducit mella Cupido ,  
 In digito iratæ spicula sensit apis ;  
 Intumuitque manus , flevitque , actusque dolore  
 Tundit humum , matri & monstrat Acidaliæ ,  
 Quantula apis quantum fecisset vulnus . at illa  
 Subridens tales edidit ore sonos :  
 Quidni ? nonne apibus similis , tu nate , pusillus  
 Qui tenera figis vulnera magna manu ?

## IDYLLIUM XX.

BUBULCUS.

*Pastor quidam, quum in urbem venisset, voluissetque  
Eunice urbanam puellam deosculari, ab eadem re-  
pulsus fuit atque irrisus tamquam indignus. Qua  
de re Pastor in hoc Idyllio conqueritur.*

Oscula me nuper desigere blanda volentem,  
Eunice derisit, & hæc super addidit ultro  
Incepitans. abscede: mihi tun' ferre bubulcus  
Oscula sic audes! labris agrestibus ora  
Jungere non didici; mihi tantum urbana teruntur;  
Non pol! ne in somnis formosum os tangere speres,  
Quos oculos, miserande, geris? quæ verba proferis?  
Rusticus ut nimium ludis? vocemque palato  
Volvis ut infracto? ut rictum diducis hiantem?  
Vah tibi quam mollis barba est, pulcrique capilli!  
Ægrotant & labra, manus & sole nigrescunt,  
Et male oles. perdas ne afflatu, hinc ocyus ita.  
Hæc effata; suum ter conspuuit ipsa repente  
In gremium, totumque pedes lustravit ad imos  
Torva tuens mussansque. hinc fastu plena superba,  
Luxuriansque inter risus & spreuit amantem,  
Et repulit, mihi sanguis acerba efferbuit ira,  
Erubique dolore, rosæ ceu rore rubescunt.  
Jamque fugit miserum linquens. ego pectore vulnus  
Triste gero, quod me contempserit improba pulcrum.  
Dicite, pastores, num sim formosus; an ullus

E iij

Mutavit, fecitque alium deus? ante vigebam  
Eximius multo formæ florentis honore,  
Ornabatque meas, ceu truncos arboris ornant  
Pubentes hederæ plexu variante corymbi,  
Barba genas; similisque apio per colla fluebat  
Cæsaries; frons & splendebat eburnea nigro  
Alta supercilio: poterant certare Minervæ  
Glauci oculi, glauco quamvis Dea lumine pulcra est.  
Mollius os presso mihi lacte, & grata canoro  
Vox dulci mage melle mihi manabat ab ore.  
Suave cano, seu sumpta manu sit fistula, sive  
Tibia; respondent calami, respondet avena  
Flaventi cera compacta: omnesque puellæ  
Montibus in nostris forma præstante fatentur,  
Oscula nec renuunt mea ferre. hæc sola refugit  
Scilicet, ac sprevit sylvestrem urbana bubulcum.  
Quid? numquam audivit, Baccum pavisse juvencas  
Vallibus in gelidis; Phrygiis & Cyprin amasse  
Verticibus quondam, furiis immanibus actam,  
Pastorem? nonne illa suum per culmina Adonin  
Læta sequebatur? non sylvis flevit in altis?  
Endymion quis erat? non pulcher & ipse bubulcus?  
Et tamen hunc virides ducentem armenta per agros  
Cynthia dilexit, cælique e vertice sæpe  
In nemus umbriferum venit furtiva, nec inter  
Amplexus pueri longa requiescere nocte  
Abnuit. ipsa tuum pastorem candida ploras  
O Cybele; puduit nec te, Saturnia proles,  
Pro tenero pastore vagum olim errasse per antra.  
Sola Eunice odit, nil curat sola bubulcum  
Et Cybele melior, Cytherea & pulcrior, alma  
Et Luna. placito numquam o potiaris amore,

# IDYLLIUM XX.

71

Cypri, nec urbe, ipsis nec vana in montibus; usque  
Sola cubes viduis per noctem frigida stratis.

# IDYLLIUM XXI.

*Asphalion piscator vana spe inflatus narrat hospiti ve-*  
*cturnum visum de pisce aureo, quo capto, somnians*  
*juraverat, se divitem jam factum, piscandi finem*  
*facturum. Cui hospes auctor est, ut omissis nugis,*  
*artem suam exerceat, si quidem inter aurea somnia*  
*fame perire nolit.*

ASPHALION, HOSPLES,

**P**AUPERIES, Diophante, artes ciet una, laborem  
Una docet: nec enim longi indulgere sopori  
Cura inopem sinit alta virum; sed dulcia somni  
Dona ubi gustari prima sub nocte, quietum  
Sollicitat, morsuque animum pervellit acuto.  
Forte senes duo, squamigerum per litora nota  
Venari genus assueti, de more cubabant  
Strati corpora fessa simul vili super alga,  
Textilis exiguo tuguri sub culmine, ad ipsum  
Acclines textum ramorum, & frondea septa.  
Intorti funes, algosum rete, sagena,  
Et laquei, nassæque, & viminei calathisci.  
Pellisque, & fulta exiguis antiqua tigillis  
Cymba, caput subter stramen breve, triaue vestis,  
Tritus & ipse usus, vili de pelle, galerus:  
Omnis erant hæc nempe illis censusque laborque.  
Non ollamve, canemve habueret; ea copia iusto

E iiii

Major visa etenim piscantibus. una torique  
 Pauperies vitæque comes: vestigia nusquam  
 Ulla virum, aut vicina domus; sed limen ad ipsum  
 Late diffusi fluctus salis eludebant.

Nondum etiam bigas flectebat candida luna  
 Trans medium provecta orbem; piscator uterque  
 Excitus est operis studio, placidumque soporem  
 Expulit ex oculis; tum fari hæc incipit alter.  
*A.* Mentitur quicumque, dies quum Juppiter auget,  
 Arctari dicit noctes, fierique minores:

Tot numero innumero vidi jam somnia, necdum est  
 Aurora. an fallor? quid monstri hoc? quæ mora nocti?

*H.* Asphalion, pulchræ ætatis ne tempora culpa.

Non hæc tarda meat temere nox; cura quietem  
 Sed turbans tardamque facit longamque videri.

*A.* Dic mihi, conjectas tu somnia? somnia vidi  
 Nam bonæ; nec te, hospes, celarim: stat mea, captos  
 Partior ut pisces, partiri somnia tecum.

Mente vales acri: scrutari & pandere visæ  
 Optimus est, intus quem mens docet ipsa magistra.

Otia nec desunt sermoni accommoda. nam quid

Heic facias foliis male fultus litore in udo,

Et vigil hirsutis in frondibus, & sine lychno?

Lychnus enim semper succo præpinguis olivi

Pascitur, ut perhibent, Prytaneo in divite. *H.* Narra.

*A.* Fessum operis primo quum cœpit vespere somnus,  
 Nec dape corpus erat multa grave; nam breve quiddam,  
 Ut nosti, parce parci gustavimus ambo;

Me mihi sum visus piscantem cernere scabro

In scopulo; piscesque sedens speculabar, & escam

Fallacem quatiens demisi in arundine longa.

Grandior appetiit quam piscis: nam sibi cernit

Præsentem in somnis offam canis, ast ego pisces.  
Ille quidem hærebatque hamo, tepidoque fluebat  
Sanguine: mi curvata manus agitabat arundo,  
Concutiens motu tremulo. certaminis ergo  
Res fuit haud parvi, ferro retinere pusillo  
Et trahere ingentem. subiit quoque vulnus; &, heus tu,  
Men', inquam, series? ego te feriam male! jamque  
Luctando fessum arripui. sic omne peractum  
Est opus. ecce autem video, mirabile monstrum,  
Piscem auro e solido. subitus circumstetit horror  
Attonitum, ne forte patri sacer Eunosigæo  
Piscis, delictumve foret flavæ Amphitrites.  
Inde hamum eduxi paullatim cautus, ab auro  
Ne quid decideret, ferrove hæresceret unco;  
Et lino implicui, traxique ad litora victor.  
Hic, præda exsultans, juravi, cærule numquam  
Tacturum, in terra felicem auriq[ue] potentem.  
Sic sopor est pulsus. cura hæc disquire sagaci  
Visa, hospes. metuo juratus fallere divos.  
*H.* Ne metuas: nec enim jurasti, nec tibi piscis  
Aureus est umquam captusve aut visus. inanes  
Nocte volant rerum, veluti mendacia, formæ.  
Illa tamen vigilans loca si scrutabere, somni  
Spe ducto obtigerit fors piscis carneus, inter  
Auræa dura fames ne te jam somnia perdat.

## IDYLLIUM XXII.

## DIOSCURI seu GEMINI.

*Duas in partes hoc Idyllum de laudibus Pollucis atque Castoris divisum est. In prima parte Pollucis pugna cum Amyco Bebryciorum tyranno describitur, victoriaque celebratur, quam retulit Pollux. In altera vero parte Castorem inter & Lynceum certamen initum, Leucippi filiorum ergo, continetur. Vincit Castor.*

Vos, canimus, nati Ledaë, magnique Tonantis  
 Castor, & insignis pugilum in certamine Pollux  
 Brachia taurinis semper circumdate loris.  
 Vos canimus his terque satos Jove, mascula proles  
 Nymphæ Thestiadος, fratres duo lumina Spartæ,  
 Auxiliumque viris extrema in clade ferentes,  
 Turbatis & equis per sædos sanguine campos,  
 Et ratibus, quæ cælo ortumque obitumque timentes  
 Astrorum validis jactantur in æquore ventis;  
 Quum magnam a puppi tollentes flamine molem,  
 Aut etiam a prora, aut unde est sua cuique voluntas,  
 In navim insiliere, & utrinque labantia pulsan-  
 Per latera. effracto disrupta arma omnia pendent  
 Cum velo; sequitur sub noctem maximus imber  
 Præcipitans cælo; ac fremitu sonat æquoris unda  
 Ventorum & furiis, lapidosa & grandine pulsa.  
 Vos tamen e fundoque rates attollitis imo,  
 Retrahitisque ipsos nautas e faucibus orci.



Tum venti posuere: maris placida unda residit,  
Atque aliæ fugere alio per inania nubes,  
Apparentque ursæ reduces, atque inter asellos  
Sublucens præsepe viris læta omnia spondet.  
O dilecti ambo, faciles mortalibus ambo,  
Vos & equis citharaque & cæstu & carmine clari.  
Castoris, an laudes dicam Pollucis? utrumque  
Laudibus extollam; Pollux tamen ante canatur.

Jam concurrentes scopulos, atque horrida Ponti  
Ostia nimbiferi fugiens superaverat Argo,  
Bebryciasque, ferens divum genus, attigit oras.  
Nec mora; Jasoniæ conferti navis utroque  
Ex latere heroes descendunt pontibus altis,  
Egressique toros sternunt per litora, & igni  
Aptandos instant manibus versare lebetas.  
At procul a sociis abiere per avia soli  
Castor equis gaudens, & fusco lumine Pollux,  
Immensamque nigro spectantes vertice sylvam  
Invenere cavo præruptæ rupis in antro  
Dulcis aquæ fontem irriguum, quem subter ab ima  
Tellure exiliunt alii venâ ubere rivi  
Argento & pellucenti assimiles crystallo:  
Populæ circum frondes, pinusque virescunt,  
Et platani steriles, & coniferæ cyparissi,  
Atque ministrantes lætum per prata laborem  
Melligeris apibus quotquot nascuntur odori  
Vere sub extremo flores. heic ætheris axe  
Sub nudo immanis vir sedem fixerat, ore  
Terribilis; fractæ duris cui cæstibus aures,  
Convexumque tumet pectus, spatiosaque terga  
Obsita nigranti ferrugine, qualia magni  
Pulsibus ostentant durati ex ære colossi.

Summo autem ex humero præstant robusta lacertis  
 Brachia nodosis, teretes ceu sæpe videmus  
 Stare alveo in sicco lapides, torrentibus amnis  
 Quos vexit violentus aquis, longumque revolvit.  
 Tum collum dorsumque infra villosa leonis  
 Pellis obit, nexuque pedum suspensa tenerur.  
 Huic pugilum victor Pollux ita factus ab ore:  
*P.* Quisquis es, o salve: quæ gens has incolit oras?  
*A.* Ora ignota videns quæ salvus degere possim?  
*P.* Fide: nec injustos, nec iniquo e sanguine dices.  
*A.* Fido equidem: neque enim hoc abs te mihi discere cu-  
*P.* Efferus es, præcepsque furis, nimiumque superbis. (12.  
*A.* Talis sum, qualem cernis: non hæc tua tellus.  
*P.* Nostra in testâ veni, donisque oneratus abibis.  
*A.* Nec des ulla mihi, nec tu hinc tibi munera speres.  
*P.* Anne sitim hoc etiam prohibes extinguere fonte?  
*A.* Experiere, sitis si torqueat arida labra.  
*P.* Argento, pretione alio dabis inde rogatus?  
*A.* Tolle manus solum contra tu solus, & acer  
 Sta pugil adverso figens pede crura, oculosque  
 Arduus intendens non astu parce, nec arti.  
*P.* Quisnam est, quem contra cæstusque & brachia tollam?  
*A.* Heic prope cernis: eum haud vilem certamine nosces.  
*P.* Anne etiam pretium, pro quo certabimus ambo?  
*A.* Ipse tuus, tu noster eris, si vincere detur.  
*P.* Tales sunt pugnæ cristata fronte volucrum.  
*A.* Sive avibus mavis, seu forte leonibus essa  
 Assimiles, nobis hæc duræ præmia pugnæ.  
 Hæc Amycus; raucæque inflans curvamina conchæ  
 Jasonuit: fuis semper per colla capillis  
 Ad sonitum Bebryces platani venere sub umbram.  
 Nec minus heros celerans vocat ocyus omnes

Peliaca e navi Castor dux inclytus armis.

Illi autem, postquam taurinis fortia vinculis

Brachia cinxerunt, se circum & lora plicarunt,

In medio coeunt spirantes mutua fata.

Heic labor-ingenti nisu premit acer utrumque,

Quis rutili accipiat post tergum spicula solis,

Aversamque tegat faciem? tu corpore magnum

Arte virum Pollux prævertis; & ictus acuto

Contra Amyci totus fulgebat lumine vultus.

Ille furens animi non se tenet, altaque ad ictum

Brachia protendit veniens, cui summa ruenti

Tyndarides ferit ora manu. verum acrior ipse

Quam prius ad pugnam se suscitatur, & super instat

Incumbens, jam jam vasto ceu pondere terræ

Adlidat: læto Bebryces clamore sequuntur.

Parte alia heroes Pollucem hortantur, & ultro

Dant animos, pavidi, ne scilicet obruat illum

Vir Tityo assimilis campo congressus in arcto.

Tum vero ingeminans & læva & vulnera dextra

Hinc atque hinc raptim natus Jove versat, agitque

Præcipitem validam Neptuni e sanguine prolem.

Ebrius ille autem plagis, crassumque cruorem

Ore vomens stabat: superas it clamor ad auras

Heroum circum malas circum ora videntum

Ulcera dira, oculosque tumentis in fronte minores.

Fessum incendebat vanis assultibus heros

Undique proturbans: mox toto ut corpore sensit

Deficere, immani nares super irrui ictu,

Ac totam avulsit frontem tenuis ossibus: ille

Saucius in viridi jacuit resupinus arena.

Heic tamen exoritur, postquam tellure levavit

Sese Amycus, rursum pugna aspera; namque furentes

Cæstibus indomitis alterna in damna feruntur.  
Irrita sed contra jactabat brachia pectus  
Cervicemque extra Bebrycum dux; victor at alte  
Fœdabat Pollux indigno vulnere malas:  
Jamque labant collapsi artus sudore, viroque  
Parvus ab ingenti factus. viget ille laborem  
Usque ferens melior membris, meliorque colore.  
Qua tandem hoc monstrum natus Jove straverit arte,  
Dic dea; nosti etenim: tantum ipse interpretis ab ore  
Expediam, velut alma jubes, placitumque volenti est.  
Ille aliquod cupiens memorabile prodere factum  
Implicuit læva lævam Pollucis, ab ictu  
Declinans longe obliquus; subit inde, manumque  
E latere attollens dextro, lateri arduus instat.  
Fors & Amyclæum læsisset vulnere regem,  
Ni caput avertens exisset, & insuper acri  
Fregisset dextra tempusque humerumque sinistrum.  
Continuo diffusus hianti e tempore sanguis  
Emicuit; magno crepuetunt murmure dentes.  
Tum magis atque magis pugnorum grandine malas  
Vulnerat, ingeminans ictus, dum contudit ora,  
Ora ambasque genas. quo sævo turbine stratus  
Concidit exanimis, palmamque extendit utramque  
Detrectans pugnam jam letho proximus heros.  
Tu nihil indignum victor fortissime Pollux  
Contra ausus: spectans ille autem ad cærula ponti,  
Neptunumque vocans patrem, juravit, ab illo  
Hospitibus numquam fore sese tempore durum.  
Hæ sat Polluci laudes: te nunc ego dicam,  
Castor equum domitor, thorace insignis, & hasta.  
Tyndaridæ fratres binas abducere raptas  
Leucippi instabant gnatas: Aphareo patre nati

Hos propere gemini fratres, quæis utraque pacta,  
Pone sequebantur, Lynceus, & maximus Idas.  
Ut vero sublime Apharei tetigere sepulcrum,  
Desiliere ad pugnam altis e curribus omnes  
Armati jaculis, protecti & corpora scutis.  
Tum subito galea Lynceus exclamat ab alta:

Quis furor armorum? quæ mens tam dira puellas  
Non vestras propter sævire, & stringere ferrum,  
O miseri? nobis longe ante prioribus istas  
Pollicitus pater est; nobis connubia pacta  
Firmavit magnâ testatus numina voce:

Vos aliena tori nunc fæde in jura ruentes,  
Raptantesque unde unde boves armentaque equorum  
Divitiasque alias animum pervertere nostis  
Leucippi, & nostros donis furari hymenæos.  
Certe ego sum, quamvis haud suetus plurima fari,  
Hæc eadem vobis ambobus sæpe loquutus:

Indignum est tantos heroes ducere, amici,  
Uxores, pacto jam sunt quæis fœdere sponsi.  
Est ingens & Sparta, ingens atque Elis equestris,  
Arcadia est ovibus fœcunda, & Achaïca tellus,  
Messeneque, Argosque, atque omnis Sisypbis acta,  
Innumera patriis innuptæ in sedibus illic  
Nec forma indecores florent nec mente puellæ.

Ex illis virgo vobis quæcumque petatur  
Cedet digna: bonis quis enim socer esse recuset?  
Heroes vos autem omnes excellitis inter,  
Et vestri patres, patriusque ab origine sanguis.  
Quare agite, ac lætum sinite hoc procedere nobis  
Conjugium: vobis aliud curabimus una.

Hæc ego dicebam. rapidi sed dicta per undas  
Diripuerunt noti, nec gratia verba sequuta est;

Namque estis duri atque immites, nunc quoque tandem  
Parete o moniti; noster patruelis uterque es.  
Quod si animus gliscit pugnare, & sanguine oportet,  
Consertaue odium ancipiti decernere pugna,  
Idas, & consanguineus, vis martia, Pollux  
Spectantes cessent; soli pugnabimus armis  
Castor egoque una, florenti ætate minores.  
Sic nostris & luctus erit genitoribus asper  
Iste minus, tristisque unum sat funus in una  
Triste domo: sociis reliqui solatia vivant,  
Exstinctumque loco potiantur sponsi hymenæis.  
Præstat clade levi magnam componere litem.

Dixit; nec facturus erat deus irrita verba.  
Nam qui præstabant annis, e fortibus arma  
Deponunt humeris, terraque infixæ reclinant;  
At clypei summo Lynceus hastile sub orbe  
Fulmineum quassat, paribusque it Castor in armis  
In medium: nutant utrique in vertice cristæ,  
Ac primum congressi infestas eminus hastas  
Direxere, alter nudatam sicubi partem  
Corpore in alterius videat. sine vulnere cuspis  
Utraque dissiluit, clypeoque infracta repulsa est.  
Illi autem propius strictis mucronibus instant,  
In cædemque ruunt: requies sit nulla pericli.  
Multa super clypeo Castor galeamque comantem  
Vulnera dat; multa & Lynceus non segnis ad ictus,  
Atque acies ferri cristas micat inter ahena.  
Illius & sævo subeuntis poplite Castor  
Ense metit dextram, cedens pede: saucius ipse  
Abjicit extemplo ferrum, cursuque citato  
Ad tumulum præceps ferrat genitoris, ubi Idas  
Cognatæ adclinis spectabat prælia pugne.

Sed melior cursu per & ilia trajicit ense  
Perque uterum Castor, dissectaque viscera ferro  
Intus agens spargit. subito cadit ille volutus  
Ad terram, durusque oculos sopor urget inertes.  
Nec tamen e gnatis miseranda in sede paterna  
Laocoossa alium reducem ad connubia vidit. (bat.  
Namque columnam, ingens Apharei quæ membra tege-  
Avulsam e tumulo dum vult Messenius Idas  
Cædis in auctorem fraternæ emittere, portans  
Juppiter auxilium manibusque e marmore molem  
Excutit, atque ipsum flammato fulmine srernit.  
Usque adeo cum Tyndaridis contendere durum;  
Sunt ipsi fortes, forti & genitore creati.

Salvete o Ledaë gnati; decus addite nostris  
Æternamque hymnis famam. cari usque poetæ  
Tyndaridis, Helenæque, aliisque heroïbus, alta  
Pergama qui exciderunt, flavo socia arma ferentes  
Atridæ. vobis, o reges, Chius honorem  
Jam peperit magnum vates, Priamæïa dulci  
Mœnia concelebrans cantu, navesque Pelasgas,  
Iliacasque acies, pugnantum & Achillea turrim.  
Vobis ipse etiam musarum hæc suave canentum,  
Qualia dant divæ, quorum & mihi copia parta,  
Dona fero: melius nullum diis carmine donum est.

## IDYLLIUM XXIII.

## AMATOR INFELIX.

*Tragicus omnino hujuscæ miserandi hominis est exitus ,  
qui quum se contemni crederet , laqueo mortem qua-  
sivit . Nec minus tragice ab Amore animadversum  
in eum est , à quo se ille contemptum putabat .*

**P**ERDITUS ingratum vir quidam ardebat ephebum  
Formosum vultu , sed formæ haud moribus æquis .  
Nulla inerat pietas animo , verum asper amantem  
Oderat heu miserum ; nec , quis foret ipse Cupido ,  
Scibat adhuc , quantusque deus , nec fortibus arcum  
In manibus qualem teneat , quam spicula dira  
Torqueat in pueros ? non mitia verba , nec ulla  
Gaudia in affatu molli : sæva omnia ubique .  
Nulla aderant flammæ solatia ; non jocus oris ,  
Non oculorum ardens jubar alnum , non roseus flos  
Suave genis ridens , non illita nectare lingua ,  
Non & suaviolum magni lenimen amoris .  
At fera sylvestri ceu trux observat ab antro  
Venantes , sic ille hominem servabat : in ipsi  
Sævities labris horrebat ; lumina torvo  
Obtutu , semperque malum minitancia stabant ;  
Tum facies atræ maculis circum obsita bilis ,  
Discolor & fastu pariter squallebat & ira .  
Sic tamen & formosus erat : quare acrius ipsum  
Infelix ardebat amans , nec pectore in imo  
Jam tenuit veneris curas , ast actus amore



Processit, subiensque invisā ad limina flevit,  
Osculaque infigens hac voce silentia rupit.

Sæve puer, diro nutritæ o lacte lænæ,  
Saxee, deliciis indigne & Cypridis igne,  
Ultima dona ferens veni tibi scilicet, ipsum  
Hunc laqueum: neque enim frustra tete amplius ullis  
Sollicitem precibus, pignantem aut vincere sperem.  
Ecce abeo, quo me iampridem abscedere cogis  
Damnatum: sequar illud iter, commune levamen  
Heu miseris lethæa ubi fertur amantibus unda.  
Sed licet & mergam stagnanti in gurgite labra,  
Hauriam & humorem totum, restinguere mentis  
Vim cupidæ haud possim. jam jam vale dicere longum  
Vestibulo foribusque tuis, sine; quæque futuri  
Præcius effabor, tu ne, puer improbe, spernas.  
Pulcra rosa est, parvo sed tempore tabida languet,  
Et violæ sunt pulchræ in vere, statimque senescunt  
Decidua; niveo fulgent & lilia vultu,  
Marcidaque ad terram lassa cervice feruntur;  
Candida nix etiam est, vitreus sed liquitur humor;  
Crevit ubi in glaciem: sic & puerilibus annis  
Pulcra quidem forma est, at parvo tempore durat.  
Adveniat tempus, quum tu quoque mæstus amabis,  
Torridus & sparges nequidquam fletibus ora.  
Quin age et extremum morituro hoc munus amanti  
Redde, puer: quando linquens tua limina meme  
Videris in foribus suspensum, haud præpete saltu  
Præterea oro miserum; paullisper at atro  
Turbatus visu consiste, & mollibus imbrem  
Ex oculis vel parvum effunde. hinc vincula solve  
Lacrymulas libans collo super, & mea membra  
Veste tuo rapta de corpore contege, & ori

F ij

Os jungens suprema labris precor oscula fige .  
Saltem etiam extincto tribuas hæc dona , nec ullus  
Sit timor , his valeam ne rursum adquirere vitam ;  
Non , si mutatus repetita per oscula clames .  
Tum facito tumulum , nostrum qui condat amorem ,  
Quumque abiens cedes , ter tristi voce supremum  
Dic , o amice jaces ; & ni piget , adde ; sodalis  
Mi bonus heu periit ! carmenque hoc marmore sculpe ,  
Lineolis distinctum his rite quod ipse notavi .  
Hunc amor occidit : propius consiste , viator  
Præteriens ; & dic : crudelem est nactus amicum .

Sic fatus lapidem ingentem , qui forte jacebat  
Proximus , admovit foribus : quo nixus ab alto  
Limine suspendit restem , collumque voluto  
Injiciens laqueo substantia fulcra removit  
Calcibus , & fracta moriens cervice pendit .  
At puer egrediens tectis exsanguè cadaver  
Vestibulo vidit pendens , nec motus acerba  
Sorte , nec interitum miseranda cæde recentem  
Flevit ; at extincti contactu polluit omnes  
Funereo vestes , petiitque adsueta palæstræ  
Munera . quin etiam caro se in fonte lavare  
Dum cupit , iratum venit , quem læserat ultro ,  
Ante deum ; nam forte basi super arduus alta  
Stabat Amor cernens subjectas aliger undas .  
Exiliit subito simulacrum , atque impete magno  
Perculit infandum juvenem . de vulnere sanguis  
Purpureus fluxit , nigroque innare lavacro  
Ultima vox audita , ita cæco murmute dicens :  
Vos , quos torret amor , felices vivite , vosque  
Diligite o dilecti ; en qui malus oderat , æquo  
Jam periit letho : scit justa rependere numen .

## IDYLLIUM XXIV.

HERCULISCUS sive HERCULES ADHUC PUER.

*Describitur Herculis, quum adhuc puerulus esset, im-*  
*menta vis, qua duos immanissimos dracones mor-*  
*tem sibi inferre parantes in cunis noctu interfecit.*  
*Subjicitur & Tiresia de eodem vaticinium. Ali-*  
*quid in fine Idyllii desideratur.*

**A**LCMENE Mideatis ut ævi mense vigentem  
 In decimo Alciden, atque una nocte minorem  
 Iphiclum lavit; saturatos nectare lactis  
 Imposuit scuto, quod quondam insigne superbam  
 Amphitryo retulit Pterela in certamine cæso,  
 Hinc eadem mulcens puerorum colla superne,  
 O nati dormite, inquit; sopor almus utrumque  
 Excipiat. vos o gemini, fortissima fratres.  
 Germina, felices mea vita o carpite somnum,  
 Carpite, & auroram felices visite rursum.  
 Sic effata ingens scutum concussit: at illos  
 Texit blanda quies, mox vero ut Oriona juxta  
 Tendentem latos humeros se Parrhæsis ursa  
 Vertit ad occasum media jam nocte, dracones  
 Cæruleis geminos horrentes corpora squamis,  
 Monstra infanda, malum Juno meditata sub ipsa  
 Limina tectorum, surgunt ubi cardine postes,  
 Immisit, jussitque minans discerpere parvum  
 Alciden. illi sinuantes cæcula in orbem  
 Terga solo, cupidos expleri sanguine ventres

F iij

Volvebant ambo: dirus micat ignis euntum  
Ex oculis, atque ora vomunt lethale venenum.  
Jamque ubi lambentes linguis vibrantibus ora  
Adstiterunt pueros juxta, sopor ilicet ambos  
Liquit. & ingenti ( Jove cuncta vidente ) refulsit  
Luce domus, tollit clamorem Iphiclus, ut atra  
Monstra super scutum vidit, dentesque minantum  
Horrificos, ardensque fugæ mollissima calce  
Tegmina disjecit. contra autem adversus utrumque  
Corripuit manibus, nodoque innexuit arcto  
Alcides fera colla premens, ubi clausa venena  
Noxia stant colubris, quæ divi odere vel ipsi.  
Illi autem magnis torquentes corpora spinis  
Circumdant puerum crescentem tempore tardo,  
Lactantemque, suæ nec suetum spargere fletus  
In gremio nutricis. ut autem fessa labore  
Terga gravi frustra sensere, ingentia rursus  
Vincula solverunt, laxis e corpore spiris,  
Nequidquem validos conati evadere nexus,  
Audiit Alcmene clamorem, atque excita prima,  
Surge, ait, Amphitryo, trepidam metus occupat ingens:  
Surge age, nec soleas pedibus supponere cures,  
Clamantemne audis natorum ætate minorem.  
Atque intempesta nonne omnia nocte per ædes  
Collucere vides, quin aurea fulgeat Eos?  
Certe aliquid, vir care, domi hæc portenta minantur,  
Dixerat. ille toro surgit, dictoque monentis  
Paret, & ardentem sese convertit ad ensem,  
Olli qui thalamoque fixus pendebat ad ipsum  
Usque caput: læva capit apto cingula loro,  
Ac dextra tollit vaginam e loto opus ingens.  
Interea rursus caligine inhorruit atra

Parietibus latis thalamus, famulosque vocavit  
 Amphitryo jucundum efflantes ore soporem.  
 Ferte focus ignem, famulantum o fida meorum  
 Pectora, ferte cito correptum, & pandite firma  
 Limina: surge operum patiens captiva juvenus.  
 Hæc ille; & famuli lychnis ardentibus adsunt,  
 Continuoque impleta domus properantibus omnis;  
 Atque iidem, Alciden videre ut colla draconum  
 Augentem teneris manibus nodoque tenaci  
 Stringentem, trepidi clamarunt. ille prehensos  
 Ostendat colubros genitori, atque exilit ardens  
 Læticia puerili, extinctaque monstra retorquens  
 Ipsius ante pedes jecit genitoris amati.  
 Læta metu exanimum gremio complexa recepit  
 Alcmena Iphiclum: villosa in tegmine contra  
 Amphitryo Alciden posuit, thalamumque petivit  
 Dulcia jucundi capturus munera somni.  
 Jam volucrum cantu pars ultima noctis abibat  
 Pulsa procul veniente die, quum sedula vatem  
 Tiresian semper vera omnia voce profantem  
 Exciit Alcmena, natiq̃ue recentia facta  
 Expediit, jussitque ferant quid talia monstra  
 Dicere. nec divum si quid mens læva minatur,  
 Me veritus celes, neque enim mortalia corda,  
 Quod miseris nerunt parcarum stamina, possunt  
 Effugere, Everida, inquit: tibi maxime vatum  
 Haud ignota loquor. sic fata ubi regia conjux,  
 Ille refert: fide, o mulier clarissima prole  
 Magnanimi sanguis Persei: per lumen ademptum  
 Hoc ego dulce meum juro tibi, Achæides olim  
 Ad genua agglomerent manibus dum mollia fila,  
 Te passim sero celebrabunt vespere, teque

Nomine clamabunt; ibit tua fama per Argos.  
Hic vir hic astriferum quondam ascensurus olympum,  
Progenies tua certa, heros fortissimus omnes  
Ipse feras hominesque invicto robore vincet.  
Ac postquam duro peraget bisseña labore  
Prælia, fatale est Jovis olli in sede manere,  
Quodque habuit mortale, pyra id Trachinia tollet.  
Quin' etiam divum gener ipse vocabitur, illum  
Qui contra tenerum monstra excidere nefandis  
E latebris, venientque dies, quum ledere parceret  
Hinnuleum cernens lupus asper rupis in antro.  
Verum age jam regina, adsit vis ignea præsto  
Sub cinere, aspalathique jube super arida ligna,  
Et paliusi, & sævo agitati flamine acherdi,  
Atque rubi conferre: hoc secto in robore agresti,  
Quum puerum voluere tuum male perdere, nocte  
In media colubros incende. hinc mane coorto  
Una ex ancillis cineres deportet ad amnem  
Collectos, spargatque procùl rapientibus auris  
Per cautes subter præruptas, testaque visat  
Haud usquam conversa retro. tum sulfure puro  
Cura domum primum suffire, ac spargere deinde  
Fontis aqua niveo sale mixta & fronde virenti  
Rite coronata, ceu mos lustrare penates;  
Cælicolumque marem regi mactare memento  
Sponte suæ, semper vobis vincantur ut hostes.  
Dixit, & abscedens currum conscendit eburnum  
Tiresias longo frustra tardatus ab ævo.  
At ducti sub matre, virens velut aïbor in horto,  
Alcides crescebat, ab omnibus Amphitryonis  
Creditus argivi verum genus. inclyta Phœbi  
Progenies senior Linus illum nosse docebat

Litterulas, gnavus comes usque ac pervigil heros: .  
Arcum autem torquere ac certam aptare sagittam  
Eurytus, a proavis longe ditissimus agri.  
Mox etiam cantare, manuque impellere utraque  
Texta Philammonides docuit testudinis aureæ  
Eumolpus. quotquot vero generosa per Argos  
Invenit pubes genuum curvamina, & astus,  
Calce premens valeat quibus hostem vincere; quotquot  
Et pugiles sævis armati cæstibus artes  
Exercent stantes, ad terram aut pondere proni,  
Omnia ab Harpalyco duræ hæc inventa palæstræ  
Edidicit Phanopeo, cujus nec cernere vultum  
Sustineat quisquam media pugnantis arena:  
Tale supercilium metuendo horrebat in ore.  
Jungere sed curru bijugos, & flectere junctos  
Alipedes metam circum, ne fervidus axis  
Impete frangatur, radiosque in pulvere spargat,  
Ipse suum docuit natum pater, auctus in Argo  
Muneribus quondam largis; certamine equestri  
Quippe leves currus agitavit sæpe, nec umquam  
Indoluit fractas, quas olim victor agebat,  
Ille rotas, longo laxis jam tempore vinclis.  
Ut vero jaculum vibrare, ac terga corusci  
Protegere objectu clypei ferriquo minacem  
Evitare aciem, bellantumque agmina campis  
Instruere, ac cæcos obsidere milite saltus  
Conveniat, turmasque hortari, & currere in hostem,  
Castor eques docuit, profugus quum venit ab Argis,  
Tempore quo regnum late ditione solumque  
Vitifera Tydeus a magno accepit Adrasto;  
Ledæus Castor, quo non præstantior heros  
Ante fuit, vires quam fregerit ægra senectus.

Sic puerum instituens Alciden candida in omni  
 Arte parens formabat; & illi mollia nocte  
 Exuviae cæsi præbebant strata leonis  
 Magnanimum juxta patrem. tostis ignibus armi  
 Prandia erant, Dorumque in morem educta canistris  
 Crassa Ceres, qua fossor & ipse expletus abiret:  
 Post tenuis rursum finita luce sine igni  
 Cæna aderat; mediasque super fluitantia suras  
 Tegmina pendebant facili contexta minerva.

## IDYLLIUM XXV.

AUGIÆ OPULENTIA, *vel* HERCULES  
 LEONIS INTERFECTOR.

*Ad Augiam Hercules profectus primum audit a quodam  
 pastore, deinde præsens ejus immensas admiratur  
 opes. Phineo tandem, quo cum in urbem processit,  
 cadem leonis a se victi narrat. In Idyllii initio  
 pauci, qui desunt, versiculi adjuncti sunt, ut sen-  
 tentia constaret.*

**A**MPHITRYONIADES ingressus in Elidos oras  
 Ibat, & ingentes pecudum miratus in agris  
 Passim errare greges armentaue pingua gressum  
 Sustinuit, subitoque senem, quem forte laborem  
 Juxta exercentem vidit, sic primus amicis  
 Affatus verbis; dic o mihi protinus, inquit,  
 Quisquis es, o pastor, cui regi maxima parent  
 Hæc armenta boum, quove hæc via ducit? an alta  
 Ad stabula Augiæ, quem sol pater aspicit æquus



Ante alios opibus cumulans ingentibus auctum?

At senior, cura quod tum tractabat agresti,  
Intermisit opus, placidoque ita reddidit ore.

Ultro, hospēs, tibi fabor ego, quaecumque requiris,

Mercurii veritus grave numen, sāvior omnes

Cælicolas inter qui surgere fertur in iras,

Ferre viatori quisquam male durus egenti

Si neget auxilium. non isdem in saltibus herbas

Attendant omnes, nec in una sede morantur

Lanigeræ pecudes Augiæ regis; at illæ

Irriguas propter ripas Elisuntis aberrant,

Illæ autem Alphæi sacrata ad flumina ludunt,

Buprasique aliæ prope consita vitibus arva,

Heic quoque sunt aliæ: cunctis sua ovilia surgunt.

At vero quamvis latos effusa per agros

Exsuperent armenta modum, tamen omnibus una

Hæc loca dant eadem viridantia pascua semper

Menii apud stagnantis aquas. nam roscida dulces

Prata ferunt herbas & læta uligine circum

Pabula, cornigeris augent quæ robor bobus.

Ad dextram tollunt sese stabula ardua: tota

Ecce tibi apparent placidi trans fluminis undas;

Qua platani densæ viridisque oleaster inumbrant

Sponte solum, ramisque tegunt frondentibus, hospes,

Marmoreum Nomio, quo non præsentior alter

Divus adest, Phæbo positum de more sacellum.

Nec non & recto surgentia tramite cernis

Agricolis sua tecta, duci custodia fida

Immensas quæ curat opes, & semina mandat

Terque quaterque unus proscissis vomere glebis.

Circum autem plantasque serunt, & bacchica dona

Fossores ad præla ferunt, quum præterit ætas

Fervida, & expresso spumat vindemia musto.  
 Sunt etenim, quæcumque vides, hæc divitis arva  
 Augiæ, segetique bona arboribusque ferendis  
 Omnigenis tellus longe porrecta sub ipsos  
 Irriguos scatebris, extrema cacumina, montes;  
 Quæ loca nos semper lustramus, ut exigit usus,  
 Assidua vernas qui cura exercet agrestes.  
 Sed mihi tu contra (quod & ipsi profore credo  
 Jam tibi) dic referens, quænam huc te caussa venire  
 Impulit? Augias, famulantum an quæritur ullus  
 Illius ad nutum qui stant? ego dicere gnarus  
 Nam possum tibi cuncta. mala es de gente nec ortus,  
 Nec similis tute ipse malis, velut ista decoris  
 Signa docent manifesta tui: immortalia præstant  
 Germina mortales inter tanto oris honore.

Huic autem Alcides proles Jovis inclyta reddit:  
 Ipsum equidem Augian regem, ceu reris, Epeum  
 Visere nunc, senior, cupio; veni illius ergo.  
 Qui si inter cives patria forte urbe moratur  
 Prospiciens plebi rectique atque arbiter æqui;  
 Dic aliquis famulantum hinc me deducat in urbem  
 Hoc animis alios inter qui præstat in agro,  
 Quique meas voces audire, & reddere contra  
 Multa queat: dii nos voluere, opis indigus alter  
 Vivat ut alterius. sic ille, ac talia dius  
 Ore refert senior: non lævo huc numine divum,  
 Credo equidem, venisti hospes; perfecta videbis  
 Astutum, quæcumque foves sub pectore vota.  
 Huic etenim Augias solis clarissima proles  
 Magnanimo Phyleo cum nato venit ab urbe  
 Hesternæ sub luce, suas hæc providus ipse  
 Inspecturus opes, quarum illi est maxima ruræ

Copia. sic placitum quondam est & regibus ipsis  
Res ultro curare suas, meliusque putare,  
Si videant, salvas. sed jam celeremus ad illum:  
Monstrabo dux ipse viam, quæ ducit in altum  
Hinc stabulum, farique tibi cum rege licebit.

Sic dicens præit ipse, & multa in corde volutat  
Exuviumque feræ aspiciens, nodosaque clavæ  
Robora quæ dextram implebant; unde hospes hic esset,  
Quisve genus? jam jam gradientem & poscere aiebat,  
Sed tenuit sese, vocemque in gutture pressit  
Effugere instantem, metuens ne incautius ore  
Excideret dictum properanti: haud noscere pronum  
Quippe homini alterius mentem sensusque repostos.  
At vis fida canum, stabulo propiora tenebant  
Quum loca, continuo venientem sensit utrumque  
Atque pedum a strepitu atque emisso e corpore odore:  
Incendunt rabidis latratibus aëra, & acres  
Alciden contra diversa e parte feruntur  
Diversi; contraque seni gannitibus instant  
Undique adulantes, quos saxis protinus ille  
Terruit e campo raptis, ac vertere fecit  
Terga fugæ, increpuitque minans, nec non tamen intus  
Gaudebat, fidens animi, custodibus illis  
Omnia tuta domi se absente, ac talibus infir:  
Quale animal superi faciles, quam pectore fido  
Hoc dederunt socium mortalibus! o modo & ipsa  
Mens foret, ut nosset, cui irasci debeat, & cui  
Parcere, non illi quodquam contendar honore:  
Nunc temere nimium furiis ardescit & ira.

Dixerat; atque ambo gressus in septa tulere.  
Interea sol vertit equos devexus ad oras  
Hesperias, seraque donum jam luce redibat

Pingue pecus linquens florentia gramina, & una  
Post alias aliæ veniebant agmine vaccæ  
Innumero. nubes ut aquosæ sæpe feruntur  
Threïcii boreæ vi pulsæ, aut flatibus euri;  
Non numerum quisquam cæli per inania certum  
Nosse modumque valet; quot namque prioribus usque  
Agglonierant rapidi violento flamine venti,  
Imponuntque alias aliis: tam multa redibant  
Usque armenta boum latis cedentia campis.  
Implentur turba venientum atque omnia prata  
Atque viæ, collesque sonant mugitibus ihti  
Undique: stramineis nivæ præsepibus agnæ,  
Flexipedesque boves sua sese in septa receptant,  
Heic immensa licet diversa ad munera staret  
Turba virum; non ullus erat, quem lenta tenerent  
Otia cessantem. bene secto hic tergoe loris  
Aptat vincla pedum vaccis, atque ubera mulget  
Plena manu; hic fœtus submittere matribus instat,  
Ut dulci de lacte bibant, quo turgida pastæ  
Ubera distendunt: alter mulctralia gestat,  
Lac niveum premit alter, & alba coagula densat,  
Aut intus tauros matrum e congressibus arcet.  
Augias circum gradiens obit omnia, & acri  
Invigilat cura lustrans, quas quisque parasset  
Pastor opes: gaudens comes olli it filius una,  
Herculis & virtus sapiens; junctique sequuntur  
Visentem sua regna opera inter agrestia regem.  
At licet indomitam vim firmo in corde foveret  
Amphitryoniades, & eodem robore semper  
Septum animum; tamen ille videns tot millia circum  
Multra boum, numero tanto turbatus, & hæsit,  
Et stupuit, neque enim sibi quisquam inducere possit

In mentem domino pingues errare tot uni  
Læta per arva greges; denis quia diceret illos  
Regibus esse æquo plures, quos noverit ullus  
Ante alios pecorum fama viguisse per oras.  
Hoc genitor nato munus concessit habendum  
Eximium sol ipse, ut agresti vinceret omnes,  
Quot fuerunt, pecudum gaza; semperque novata  
Ipse armenta olli præsens augebat, & atram  
Morborumque luem, sæva & contagia longe  
Arcebat duro pastorum inimica labori.  
Ergo plura boum semper melioraque in annos  
Agmine crescebant omnes, fœcundaque matrum  
Ibat agris soboles vitulæ fortesque juvenci.  
Stabant tercentum lunatis cornibus una  
Matribus admixti candentes pingua crura,  
Biscentumque alii rufi, delecta Juventus  
Ad venerem. quos inter erant capita alta ferentes  
Bisseni niveo præstantes corpore cynis;  
Phœbo qui sacri lætisque ex agmine toto  
Pabula tondebant soli viridantia, & inter  
Sese exultantes mugitibus arva replebant;  
Quumque feræ e densis armenta agrestia contra  
Prodibant sylvis in campos, agmine facto  
Primi illi cursu furibundo in sæva ruebant  
Prælia terribili fremituque, ipsoque minantes  
Aspectu cædem. Phaëton hos maximus inter  
Robore præstabat membrorum ac fortibus armis  
Atque animo: quem pastores, quod clarior omnes  
Ante alios gradiens campis splenderet, astro  
Assimilem dixere. ille ergo ut fulva leonis  
Tegmina conspexit, magno irruit impete contra  
Impavidum Alciden, laterique inpingere frontem

Lunatumque caput voluit conatus. at heros  
Illius instantis lævum cornu ilicet acri  
Corripuit læva, robustaque colla retorsit  
Inflexa cervice solo, retroque repulsi  
Terga gravis pressit: nequidquam ille arduus armos  
Erigit intendens, pedibusque assurgit in auras.  
Miratus vires rex ipse, & martia regis  
Progenies Phyleus, circum mirantur & omnes  
Pastores, tanto coram certamine viso.

Sed jam acer Phyleus & virtus Herculis una  
Rura relinquentes tendunt vestigia ad urbis  
Mœnia. ubi primum, confecto tramite, parvus  
Tenditur a stabulo qui vites inter, & atro  
In nemore obscurus serpit per opaca locorum;  
Sunt iter ingressi latum, tunc pone sequentem  
Augides dictis Jove natum affatur amicis,  
In dextrum inclinans humerum caput. ipse ego de te,  
Nunc animo ut repeto, jampridem audisse recordor  
Quædam, hospes, narrata: olim nam venit ab Argis  
Æquoream linquens Helicen vir achivus, ut ore  
Monstrabat, viridi florens ætatis in ævo;  
Atque hic tunc multos inter narrabat Epæos,  
Ut quidam argivum sese præsentem necasset,  
Attonitis monstrum agricolis immane leonem  
Horrendumque ferumque, cavo qui insederat antro  
Sacra in valle Jovis Nemeæi. nec tamen ipse  
Scibat, an egregius foret heros natus in Argo,  
An potius clara in Tiryntho, aut urbe Mycene.  
Sic ille, atque ipsum Persei genus esse ferebat,  
Si recte memini. nunc vero haud credere possim  
Ægialo e magna quemquam te præter id ausum,  
Namque & pellis obit, quæ te latera ardua circum,

Indicium eximæ manifestum est laudis. at ipse  
Dic age nunc referens tu primum, an fallor, an ille  
Tute heros, quem jam multis præsentibus olim  
Ex Helice veniens nobis narrabat Achivus,  
Auguror ut reputans? dic & quibus artibus usus  
Exitiale malum stravisti; unde excita pestis  
Irrigua in Nemea sedit? nusquam Apidos ora  
Tales alma feras, cupidus licet avia lustris,  
Progenerat; sed enim tantum genus acre luporum  
Fert eadem pinguesque apros ursosque feroces.  
Quare etiam res visa magis miranda; nec omnes  
Credere dicebant dignum, quod forte viator  
Narrabat; vanumque etiam sub corde putabant,  
Dulcibus & captos quærentem fallere dictis.

Sic ait, ac medio deflexit tramite Phyleus,  
Exciperet pariter gradientes semita ut ambos,  
Et melius posset verba exaudire loquentis  
Alcidæ, tali retulit qui voce sequutus.

Quod primum cupiens, Augia o nate, rogasti,  
Tutemet expensum bene nosti: cetera dicam,  
Quando poscis, ego. tantum nescire fatebor,  
Millibus e multis quod certo nullus Achivum  
Dixerit, unde furens tulerit sese horrida pestis.  
Solum aliquem Divum vexare Phoronidos arva  
Conjicimus monstro hoc voluisse, quod impia divos  
Læsisset gens illa. etenim velut amnis inundans  
Omnes Pisæos late vastabat, & acer  
Ante alios passis infandum Bembiniæis  
Terror erat, circum loca qui vicina tenebant.  
Hoc me certamen primum tentare coëgit  
Eurystheus, sævo cupiens me perdere letho.  
Ergo manu flexumque arcum gravidamque sagittis

Accipiens pharetram pariter, clavamque rigentem  
Cortice adhuc viridi, quam duro e stipite olivæ  
Inventæ celsi sacrata Heliconis in umbra,  
Evulsæque ab humo ipsis cum radicibus olim  
Feci habilem, his contra processi interritus armis.  
Sed loca ubi horribili tetigi propiora leoni,  
Corripiens arcum, nervumque ad flexile cornu  
Intendens, volucris ferrum lethale sagittæ  
Applicui supra. vigili tum luminæ circum  
Omnia collustrans specularar, forte videre  
Si possim prius ipse ferum, quam cernar ab illo.  
Jam medio currum sol altus agebat olympo,  
Illius & nulla vestigia parte notare,  
Nec potui rugitum audire. haud ullus in agris  
Pastor erat, durumve opus exercebat arator,  
Poscere quem valeam: tutis incluserat omnes  
Pallidus in stabulis captos formidine terror.  
At non ipse prius pedibus frondosa quievi  
Lustra sequi per montem, illum quam denique vidi,  
Ac subito vires sum contra expertus. in antrum  
Ille suum veniens sera jam luce redibat  
Noctem ante umbriferam cæsorum sanguine pastus,  
Tergoribusque boum. fœdaverat undique multa  
Cæde júbas, rictumque informem, & squallida tabo  
Pectora: tum longam exertans e gutture linguam  
Mentum horrens lambebat. ego nemoralibus umbris  
Abditus e specula venientem, donec adiret  
Me propior, tacitus servabam, atque ocyus ile  
Intorsi in lævum gradientis cominus arcu  
E resono telum frustra, quod dura subire  
Haud valuit sub membra, virenti & gramine retro  
Concidit absiliens. ille autem exterritus ictu,



Protinus a terra fulvum caput extulit alte,  
Et circumvolvens flammantia lumina paullum  
Substitit, ostenditque in hianti gutture dentes.  
Hinc etiam subito nervo stidente sagittam  
Triste ferens, quod prima volasset vana per auras,  
Emisi, ac medium direxi in pectus, ubi ipsa  
Pulmonis sedes; sed nec tum pertulit ictum,  
Irrita sed frustra cecidit lethalis arundo.  
Jamque animo graviter commotus tela parabam  
Tertia, quum torquens oculos me bellua contra  
Aspera conspexit, longamque hirsuta revolvens  
Ad genua immanis caudam se ad bella parabat.  
Continuo rabie tumuere horrentia colla,  
Arrestæque comæ fulva cervice stetero  
Ira ardescenti; seseque inflexit in arcum  
Attollens dorsi spinam, curvatus ab imo  
Inguine per lumbos supra. ceu quando per artem  
Multa faber gnarus caprifici fissile robur  
Flectit, agitque domans prius igni, ut curribus aptet  
Ille rotas teretem circum volventibus axem,  
Sæpe manu robur durato cortice flexu  
Effugit in medio, & toto procul impete fertur  
Exiliens protensum: ita me contra incitus acri  
Prosiliit ferus ore leo, discerpere membra  
Discupiens correpta. ipse autem e corpore amictum  
Opposui duplicem prætendens, telaque læva  
Rapta manu, dextraque elatam ad tempora clavam  
In caput impegi. violento protinus ictu  
Dissiluit vis dura olæ, geminasque pependit  
In partes infracta horrendo in vertice. at ille  
Concidit ex alto, prius ipsum desuper urgens (sic  
Quam steterim, ad terram; pedibusque trementibus hæ-

Vertice nequidquam nutans: nox presserat ambos  
Atra oculos, penitaque excussum in sede cerebrum.  
Vulnere quo exanimem cernens victumque dolore,  
Ante quidem in sese redeat quam vivus, & auras  
Accipiat rursum, ferii restantia colli  
Indomiti vincla ipsa, abjecto flexili & arcu,  
Inflexa & pharetra in terram; dorsumque superne  
Vi manuum valida pressi, ne versus acutis  
Unguibus arreptos laniaret corporis artus.  
Tum super assistens impressis calcibus arvo  
Crura pedum postrema affixi, & utrinque revinxi  
Incumbens genibus latera ægra jacentis, ut armos  
Solveret exanimis. non vis, non ullus in ore  
Spiritus: extincti raptum in sublime levavi  
Corpus ego, horrendamque animam niger abstulit orcus.  
Atque heic hærebam dubius, queis artibus usus  
Detraherem monstri fulvam de corpore pellem,  
Durum opus expertus: neque enim vel cedere ferro,  
Vel poterat saxo, vel acuti robore ligni.  
Tunc aliquis divum credo fuit auctor, ut ipsis  
Unguibus extincti longis, si vincere possim,  
Tentarem. his facile detraxi aggressus, & altis  
Exuvias humeris posui tutamen in armis.  
Hoc fuit, o Phyleu, Nemæi triste leonis  
Excidium, multas qui clades intulit olim  
Gentibus & pecori late bacchatus in agris.

## IDYLLIUM XXVI.

LENÆ seu BACCHÆ.

*Pentheï supplicium hoc in carmine continetur, atque immanis illa Baccharum savities, qua furebant adversus omnes, quos Deo Libero invisos putabant.*

**I**NO atque Autonœ cumque his soror addita Agave  
Pomicolor, ternæ montes egere sub altos  
Tres thiasos; quernasque hirsuta ex arbore frondes  
Carpentes, viridamque hederam, & nascentia passim  
Asphodeli per humum folia atra in limite puro  
Bissenas struxere aras de cespite molli  
Tres Semelæ, Bacchoque novem. tum rite precatæ  
E plena manibus ceperunt munera cista,  
Libantesque supra sparsere altaria, Bacchus  
Ceu docuit quondam, fierique ipse auctor amabat.  
Aërio celsæ rupis de vertice Pentheus  
Omnia spectabat, lentisco ut forte latebat  
Abditus in veteri, qui circum plurimus exit.  
Prima autem Autonœ lustrantem ut vidit, ad auras.  
Extulit horrendum clamorem, ac cœpta furentis  
Turbavit pedibus procurrens orgia Bacchi,  
Orgia, quæ licitum nulli vidisse profano.  
Ipsa ruit furibunda, ruit simul excita raptim  
Turba furens comitum. trepidans fugit ocyus altos  
Per scopulos Pentheus; illæ sed voce sequuntæ  
Horrida suras cingebant tegmina supra,  
Tollebantque sinus alte. quid denique, matres,

G ii]

Vultis, ait Pentheus? jam jam experiere, reponit  
Autonœe, prius ipse queas quam discere verbis.  
Interea nati capite e cervice revulso  
Talem mugitum mater dedit effera, qualem  
Fœta lea attollit quondam. super irruit Ino,  
Cum scapulaque humerum vellit, ventremque superstans  
Prosubigit pedibus. furor idem concitat ipsam  
Autonœen; reliquæ discerpunt cetera matres,  
Ac repetunt Thebas maculatæ sanguine, in urbem  
Planctum infelicem non Penthea monte ferentes.

Non ego, non alius curet sentire furorem,  
Numen & infensum Bacchi, graviora vel istis  
Si quis erit passus, sit nonum ingressus in annum,  
Aut decimum. pius ipse agitans sine crimine vitam  
Usque piis placeam securum agitantibus ævum.  
Jupiter augurium multo hoc dignatur honore,  
Atque bonos bona certa sequuntur, & impia contra  
Germina. nunc vero mihi gaudeat Ævius Evan,  
Nimboso in Dracano quem quondam e matre solutum  
In femur ipse suum Saturnijus abdidit intro.  
Gaudeat & Semele formosa, unaque sorores  
Laudatæ a multis, Cadmi genus, heroinis,  
Quæ furiis actæ Bacchi culpabile nulli  
Hoc facinus fecere; quis arguat acta deorum?

## IDYLLIUM XXVII.

## DAPHNIS &amp; PUELLA.

*Colloquium hoc totum amatorium est, in quo inter Daphnidem pastorem & puellam quamdam nuptiæ conciliantur. Carmen est quam suaviter, tam parum castigate scriptum.*

- D.** ILLAM Helenen claram pastor Paris abstulit alter;  
 Clarior hæc Helene, quæ me sinit oscula ferre.  
**P.** Oscula vana, ferunt: ne tu, Satyrisce, superbi.  
**D.** Vana quidem, sed vana placent tamen oscula nobis,  
**P.** Illa ego jamque spumam, deterasque labra lavabo,  
**D.** Sicne lavis tua labra? iterum sine dulcia libem.  
**P.** Ferto mage hæc vitulis, quam castæ virginis ori.  
**D.** Ne tumeas; fugiet, sopor ut, flos iste juventæ.  
**P.** Uva placet vel passa, arens rosa servat odorem,  
**D.** Huc age jam succede oleastro, unaque loquamur.  
**P.** Haud veniam: ante etiam decepta audisse recordor.  
**D.** Audituram meam syringa hæc side sub ulmo.  
**P.** Ista tibi placeat: non tristi carmine lætor.  
**D.** Ah! taceas ah virgo, ac respice Cypridis iram,  
**P.** Jam valeat Cypris, modo me Latonia servat.  
**D.** Ne dicas, ne te feriat, neu retia tendat.  
**P.** Ut libitum, feriat: Dictynna haud lenta juvabit;  
 Tolle manus: quod ni, discerpam protinus ora.  
**D.** Haud fugies, virgo quem nulla effugit, amorem.  
**P.** Effugiam per Pana; jugo tu pressus acerbo es.  
**D.** Deterior, metuo, ne te sibi ducat habendam.

- P.* Multi me petiere; inflexit pectora nemo.  
*D.* Unus ego e multis tua nunc connubia posco.  
*P.* Quid faciam; dilecte? ferunt connubia curas.  
*D.* Non curas, non damna, choros connubia ducunt.  
*P.* Nonne suos perhibent nuptas trepidare maritos?  
*D.* Illas imperium penes est: quem nymphea tremiscat?  
*P.* Cura premit partus; gravis est dolor Ilithyæ.  
*D.* Sed partus Diſtynna levat, tua Diva, dolorem.  
*P.* Gignere & horresco, pereat ne corpore forma.  
*D.* Si gnatos paries, gnatos nova lumina cernes.  
*P.* Annuero si forte, dabis quæ munera digna? (bebis.  
*D.* Pascuaque hæc, omnemque gregem, nemora omnia ha-  
*P.* Jura ergo, invita quod nusquam infidus abibis.  
*D.* Pana tibi adjuro, non, si vel pellere tentes.  
*P.* Vin thalamos, vin septa mihi, vin condere sedes?  
*D.* Stabunt jam thalami; pulcras tibi pascimus agnas.  
*P.* Quanam grandævum patrem qua voce movebo?  
*D.* Nomen ubi audierit, connubia pacta probabit.  
*P.* Dic nomen: vis blanda ipso est in nomine sæpe.  
*D.* Daphnis ego, Lycidas pater est, materque Nomæ.  
*P.* Clara es gente satus: nec gens mea cedit honore.  
*D.* Haud nimium celebrata; pater tibi namque Menalcas.  
*P.* Jamque ostende nemus, tua stant ubi condita septa.  
*D.* Huc age: florentes viden' alta mole cupressus?  
*P.* Dum viso pastoris opes, vos pascite capræ.  
*D.* Pascite vos tauri, dum nymphe hæc pascua monstro.  
*P.* Quid facis, o Satyrisce? manu quid tangere certas?  
*D.* Hæc tua nunc primum noscam flaventia mala.  
*P.* Obstupui per Pana: sinu citus extrahe palmam.  
*D.* Quid tremis? ah nimium timida es: mea fide puella.  
*P.* Me jadis in sordes, formosæque tegmina fœdas.  
*D.* Vestibus ecce tuis subſterno e vellere strata.

IDYLLIUM XXVII. 105

P. Heu! heu! & mitram removes. cur vincula solvis?

D. Hæc Paphiæ primum supplex do munera divæ.

P. Exspecta: venit ecce aliquis; sonus impulit aurem.

D. Garrula sylva tuos memorat cyparissina amores.

P. Jamque adeo sum nuda: scidisti heu sævus amictum.

D. Ipse dabo hoc alium meliorem munus amictum.

P. Nunc spondes mihi cuncta; salem post forte negabis.

D. Ipsam animam sic o! tibi nostram immittere possim.

P. Ne sævi, Dictynna: tua est infida sodalis.

D. Bos Veneri cadet ictus, Amori intacta juvenca.

P. Adveni huc virgo, modo nupta in testâ redibo.

D. Quin mater natorum altrix, non denique virgo.

Sic illi alternis inter se mollia dictis

Gaudia carpebant furtivo in cespite strati.

Nymphaque ubi exiliit, capras per gramina visit,

Sparsa pudore oculos, atque intus corde micanti;

Ille autem voti compos armenta petivit.

IDYLLIUM XXVIII.

COLUS.

*Theocritus colum Syracusiam, quam proficiscens Miletum Theugenidi Nicia amicissimi hominis uxori munus hospitale deferre statuit, ingeniose alloquens; ejusdem optime matrisfamilias probitatem & industriam, itemque Nicia doctrinam & humanitatem collaudat.*

**P**ULCRA colus, lanæ cultrix, magnumque domorum  
Auxilium; quam casta bonis, memorabile donum, :

Matribus inventam fertur donasse Minerva;  
En age Mileti mecum alta ad mœnia perge:  
Cypris ubi in viridi canneto pulcra sacellum  
Obtinet. huc facilem cursum det Juppiter, oro:  
Nicia ut aspectu nostro latetur, & æque  
Læter ego, amplectarque virum, fudere venustæ  
Quem Charites partu felici suaviloquentem.

Illic te nivei progeneram dente elephanti,  
Hospitis uxori comitem, famulamque dicabo,  
Ipse manu tradens: quicum tu multa virorum,  
Multa puellarum facies velamina, vestem  
Omnigenam, ventos contra munimen & imbres.  
Pinguia nam late pascentes prata, quotannis  
Bis teneræ agnorum tondentur vellera matres  
Theugenidi pulcræ: tam parvo tempore ponit  
Finem operi; partemque domus non negligit ullam,  
Curans quod dignum cumque est sapiente bonaque,  
Non ego te ignavas dominæ cessantis in ædes  
Tradiderim, dulcis patriæ mihi fœdere junctam.  
Namque tibi patria est, Siculis Ephyræus heros  
Quam posuit campis præstantem prole virorum.  
At nunc testâ viri servans, cui Phœbus Apollo  
Scire dedit morbos, morbisque inventa fugandis  
Pharmaca, Mileto patriam mutabis opima,  
Et Sicula antiquos versaberis inter Ionas;  
Pulcra colo ut pulcra cunctis præstare feratur  
Theugenis; utque animo numquam vetus excidat hospes,  
Hospes cui Musæ, cui dulcia carmina cordi.  
Quippe aliquis forsân te cernens: munere, dicet,  
Gratia in exiguo non parva est; spernere nec fas,  
Pendere nec parvi, quidquid donavit amicus.



## IDYLLIUM XXIX.

## AMORES seu LUSUS PUERILES.

*Hoc Idyllium non ut cetera versibus exametris scriptum est, sed sapphiciis pentametris, uti vocant, seu pentametris dactylicis: porro eadem versuum ratio ab interprete servata est. Quod attinet ad argumentum, in eo poeta conqueritur de cujusdam adolescentis inconstantia, amicitiaque dirempta.*

VINUM fertur, amice puer, mera veritas,  
Ac nos veridicos decet esse vel ebrios:  
Effabor, penito latitant mihi quæ sinu.  
Me non ex animo integro amas; equidem scio:  
Nam vitæ hoc mihi dimidium, quod adhuc manet,  
Tuo vivit ab ore; aliud periit male:  
At si forte velis, similem superis agam  
Vitam; si renuas, tenebris premar horridis.  
Quonam hæc conveniunt modo, amans tibi tædio est?  
Nunc si me audieris juvenis mage te senem,  
Laudabis quoque me, utilius tibi consulens.  
Fac unum stabilem unica in arbore nidulum,  
Quo non improbulo subeat pede reptile:  
Tu ramum hunc hodie insiliens, alium tenes  
Cras, rursusque inhians alium ex alio petis.  
Nam quisquam simul ac nitidum decus extulit  
Tete conspiciens, magis ille, triennio  
Quam qui carus erat, colitur: prior excidit  
Amans, vixque loco numeratur in ultimo.

Non hic mos placeat malus; ista superbia est:  
 O vivas ita, semper ama similem tui.  
 Id tu si efficies, bene ab omnibus audies,  
 Et lenem faculam experiere cupidinis,  
 Qui mentes hominum subigens facile domat,  
 Meque ex ferro adeo dedit esse tenerrimum,  
 Et mollem mage cera. utinam referam modo  
 Amplexusque tuos, tuaque additus oscula!

## IDYLLIUM XXX:

### IN MORTUUM ADONIDEM.

*Totum hoc carmen & metro & ipso genere est Anacreonticum, in quo iudicium Veneris de apro, qui Adonidem morsu occiderat, instituitur. Quamplurimi non esse Theocriti opinantur; sed cujus poeta sit, nequit omnino statui.*

**A**DONIDEM Cythere  
 Ut vidit interemptum,  
 Et squallidos capillos,  
 Et pallidum os habentem,  
 Ad sese agant ut aprum,  
 Jussit citos Amores.  
 Illi statim volantes  
 Late nemus per omne,  
 Videre turbulentum,  
 Visumque colligarunt.

Unusque vincla neſcens  
Post ſe reum trahebat ;  
Pone inſequens & alter  
Suo incitabat arcu .  
Aſt ille triſtis ibat  
Sævam timens Dionem .

Cui ſic Venus loquuta :  
Nequiſſima o ferarum ,  
Tunc hoc femur petiſti ,  
Tu mi virum abſtulisti ?

Fera autem ei reponit :  
Juro tibi , o Dione ,  
Per te , per & maritum ,  
Has compedes per ipſas ,  
Perque alites puellòs ,  
Virum hunc tuum venuſtum  
Non mens erat ferire ;  
At intuens nitentem ,  
Signum ut ſacrum deorum ,  
Magnum ferens nec ignem ,  
Femur , quòd albicabat ,  
Male inſtiti oſculari :  
Id perdidit furentem .  
Ergo hos cape , o Cythere ,  
Hos plecte tu ſecaque ;  
Nam quid feram ultra amoris  
Dentes inauſpicatos ?  
Hi ni ſatis , labra ipſa  
Cum dentibus recide .

Dixit : miſerta Cypris ,  
Amoribus , relaxent  
Ut vincula , imperavit .

Ex hoc deam sequutus  
Haud in nemus rediuit;  
Atque ignibus ministros  
Furoris ustulavit.

THEOCRITI IDYLLIORUM  
FINIS.



## MOSCHI SYRACUSII

## IDYLLIUM I.

## AMOR FUGITIVUS.

*Venus inducitur Amorem quarens per compita; a qua  
& pramia proponuntur iis, qui aut visum nun-  
cient, aut captum reducant. Porro ut puer agnosci  
possit, ab eadem signa indicantur.*

**I**NCLAMANS gnatum quærebat Cypris Amorem.

Errantem in triviis si quis conspexit Amorem,  
Ille erro meus est. index, tu munus habebis,  
Munus suaviolum Veneris. si forte reduces,  
Non modo suaviolum, sed majus munus habebis.  
Plurima signa insunt puero: cognoveris ipsum  
Bisdenos alios inter, non candidus albet  
Corpore, at assimilis flammæ est: stant ignea semper  
Lumina lustrantis; mens est mala, dulcia verba.  
Namque puer non sentit idem, quod fatur: ab ore,  
Ut mel, vox manat. sed quando irascitur, ardet.  
Aspera mens, fraudem & mendacia fingere docta:  
Vera odit vaser usque, joco & crudelis in ipso est.  
Crispa coma est capitis, trux pulcro aspectus in ore,  
Exiguæque manus, sed longe spicula jactat,  
Usque acheronteas jactat sua spicula ad undas,  
Umbrarumque ferit regem. stat corpore nudus,

At mentem tegit ipse; & avis velut, insilit alis  
 Nunc hos nunc illos supra, matrumque virumque  
 Visceribus penitis hærens gravis insidet hostis.  
 Flexilis in læva sonat arcus: parvus & arcus,  
 Et parvum est jaculum super arcu; at in æthera fertur.  
 Inque humeris pendet pharetra aurea; & intus acerbi  
 Sunt calami, queis sæpe etiam me sauciat ipsam.  
 Omnia, sæva quidem sunt omnia; sed mage multo  
 Sævior illa potens fax urere parvula Solem.  
 Duc age duc vinctum, si ceperis: haud miserere,  
 Seu videas olim flentem, cave fallat; eundem  
 Seu videas ridentem, huc o! trahe. si oscula blanda  
 Ferre volet, fugesis: sunt ipsa & labra venenum.  
 Quod si etiam dicet; cape tela hæc, omnia dono;  
 Nil capias, fallax donum est: igne omnia tincta,  
 Ille gerit quæcumque puer secum improbus, arma.

## I D Y L L I U M II.

## E U R O P A .

*Narrat in hoc Idyllio poëta, ut Juppiter in tauri formam  
 mutatus Europæ rapuerit, abduxeritque in Cretam.*

SUAVE olim Europæ visum dea candida Cypri  
 Immisit, noctis quum pars extrema rubentem  
 Jam vocat auroram, jam nectare dulcior hyblæ  
 Affusus per membra sopor tegit almus ocellos,  
 Veraque noctivagis pascuntur somnia formis.  
 Nam thalamo recubat dum testi parte sub alta

Filia

Filia Phœnicis, tum virgo, Europa videbat  
Terrarum geminas pro se contendere partes,  
Asidaque, oppositamque. os virginis utraque habebat;  
Una peregrinæ similis tamen, altera formæ  
Indigenæ, natamque suam sibi jure petebat  
Hæc potiore; a se genitam memorabat, & annis  
Nutritam a teneris. at fortior illa sequentem  
Hinc validis atque hinc manibus complexa trahebat:  
Scilicet Europen, fatorum lege suprema,  
Ab Jove promissam dicens, sibi munus ut esset.

Nympha metu perculsa extemplo prosilit alto  
E thalamo; veras ut res nam somnia vidit,  
Tum trepidans, tum muta diu consedit: utramque  
Effigiem vigilans præsentī in imagine cernit,  
Ut vero attonitæ longo post tempore cessit  
Ille stupor, virgo sic fata. quis o mihi divum  
Obtulit hæc visa, aut quænam hæc me somnia terrent  
Suaviter irriguo perfusam membra sopore?  
Quæ fuit, in somnis quam vidi, illa hospita? quam cor  
Perculit ejus amor; quanto suscepit & ipsa  
Me studio! blandis ceu gnatam aspexit ocellis.  
O mihi jam faciles bene vertant somnia divi.

Sic ait; & socias surgens compellat amatas,  
Unanimes, ætate pares, & sanguine claras;  
Cum quibus illa jocos semper miscebat, iniret  
Seu choreas, puro ablueret seu corpus Anauro,  
Candida odoratis legeret seu lilia campis.  
Convenere citæ: stant florigeri calathisci  
In manibus, celerique petunt pede roscida prata,  
Prata mari vicina, simul quæ semper adibant  
Et florum studio captæ & resonantibus undis.  
In mediis calathum incedens Europa ferebat

H

Aureolum, visu mirum, Vulcani opus ingens;  
Quem Lybiæ dederat, petiit quum nympha cubile  
Neptuni; illa dedit formosæ Telephæssæ,  
Sanguine quæ fuerat sibi juncta; hæc munus habendum  
Præbuit Europæ genitrix gnatæ. inclyta in illo  
Gesta faber varia cælarat Dædalus arte.

Auro namque inerat sibi nondum reddita, nondum  
Corpore mutato, sed adhuc bos Inachis Io,  
Percita adhuc æstro, tendens per cærule gressus  
Assimilis nanti; liquidis color additus undis  
Cæruleus. gemini juvenes stant desuper ora  
Litoris in summa, vultuque immotus uterque  
Miratur per salsa bovem maris æquora euntem.  
Juppiter heic inerat mulcens humentia colla  
Æquoræ vitulæ; cui mox sua cornua demit  
Propter aquam, propter septemplicis ostia Nili  
Virgineam reddens converso corpore formam.  
Concolor argento Nili color ibat; ahena  
Bos erat, ex rutilo fulgebat Juppiter auro.  
Circum autem, summa calathi sub parte rotundi,  
Ipse videbatur Maja generatus, & illi  
Proximus Argus erat centeno lumine clarus.  
Cujus purpureo volucris de sanguine nata  
Plaudebat pennarum hilari gavisæ colore,  
Expandensque decus caudæ, ceu carbasa picta,  
Aureoli extremum calathi circumdabat orbem.  
Tale opus, ac tali se munere læta gerebat.

At nymphæ postquam venere ad florea prata,  
Captæ aliis aliæ gaudebant floribus: ungui  
Narcissum hæc tenero mollem legit, illa hyacinthum,  
Hæc violam, aut halans serpillum, lapsaque passim  
Et folia & frondes verna tellure jacebant.



Nec minus errantes aliz decerpere flavum  
Instabant in sertâ crocum. media ipsa legebat  
Puniceam regina rosam, formosior una  
Tanto aliis, quanto Charisin Venus aurea præstat.  
Sed neque erat florum studio, neque virginis illa  
Nomine læta diu mansura. ut vidit ab axe  
Namque deum genitor nympham, penetrabile telum  
Sensit Acidaliæ Veneris, quæ sola vel ipsum  
Vincere sueta Jovem, magno succendit amore.  
Ille quidem effugere & rabiem Junonis iniquæ,  
Fallere & incautæ cupiens cor molle puellæ,  
Occuluit numen, mutato & corpore sese  
Induit in taurum: non ad præsepia qualis  
Pascitur, aut curvo terram proscindit aratro;  
Non qualis ludit pecora inter agrestia campo  
Luxurians; nec qualis item, stridentia multo  
Edomita cervice trahit qui pondere plaustra.  
Numquam alius talis fuerat conspectus: ut auro,  
Corpore flavebat toto; sed candidus alte  
Fronte bovis media splendebat circulus. olli  
Glauci oculi, & blando fulgebant igne corusci;  
Tum paria hinc atque hinc surgebant cornua celso  
E capite: haud aliter, quam quum nova Cynthia cælo  
Invehitur, curvaque nitet nondum integra fronte.  
Jamque aderat: veniens pavidas non ille puellas  
Terruit aspectu; sed cunctæ accedere gaudent,  
Sed placidum manibus taurum contingere, cujus  
Dius odor prati vernum superabat odorem.  
Europæ stetit ante pedes, collumque superne  
Lambebat mulcens; pariter formosa puella  
Contingitque ipsum, niveasque abstergit ab ore  
Læta suis manibus spumas, atque oscula figit.

Mugiit hæc inter bos lene: audire putarès,  
Mygdonia argutam fundit quam tibia, vocem;  
Molliaque inflexit crurum curvamina, & herba  
Procidit in viridi, nympham cervice reflexa  
Aspiciens præbensque adstanti grandia terga.  
Tum virgo tali voce est affata sodales:

Dilecta o sociæ properate: insidere tauro

Jam placet. ille quidem dorsum substravit, & omnes  
Ceui ratis excipiet. quam visu est lenis, & ore  
Quam blando! haud aliis similis. mens insidet illi,  
Mens hominum facilis, solius & indiga vocis.

Dixerat; ac ridens tergo consedit in alto;  
Dumque aliæ attingunt sese, jam virgine amata  
Exsiluit rapta taurus, gressuque volucris  
Se freta proripuit citus ad Neptunia. at illa  
Deserta mæsta conclamat voce sodales,  
Brachiaque incassum tendit: non ulla sequendo  
Cursum æquare valet. namque ocyor ille relinquens  
Litora, ceui rapidus delphin, maria alta secabat.

Grandibus at phocis investæ gurgite ab imo  
Nereides venere omnes, atque agmine pulcro  
Implicuere choros. summas perlabitur undas  
Neptunus pater ipse rotis, magnoque tridente  
Sternit iter fratri. circum glomeratur in orbem  
Humida gens ponti, Tritones; lætaque conchis  
Carmina raucisonis, lætosque canunt hymenæos.

Nympha Jovis magni taurino in corpore sidens  
Hæc tenet incurvum cornu bovis, aurea at illa  
Dædaleæ collecta manu velamina vestis:  
Ima tamen spumat canenti fimbria fluctu.  
Ast humeros circum fluitantia lina tuebant,  
Ceui navis quum vela tument, nymphamque levabant,

Quæ postquam patria longe a tellure recessit,  
 Nec jam usquem apparet litus, nec culmina celsa  
 Vertice frondifero; cælum undique, & undique fluctus  
 Se circum ut vidit, tales dedit ore loquelas:

Quo divine vehis bos raptam? quisnam es? & o qua  
 Arte viam carpis, gravibusque insistere ponto  
 Haud horres pedibus? maris unda est pervia pandis  
 Navibus; horrescunt fortes vaga cæcula tauri.  
 Hæc tibi qui potus dulcis? quæ pabula in undis?  
 An deus es? divos at cur quod dedecet, ultra  
 Ipse facis? lucis nec delphin curvus in altis,  
 Sylvicolæ nec tauri errant in gurgite ponti:  
 Tu terraque ruis pelagoque; dat ungula remos,  
 Fors etiam volucris sublimis in æra nisu  
 Effugies, summumque petes novus ales olympum,  
 Me miseram! longe patris quæ sede relicta  
 Haud ulla timui insidias, taurumque sequuta  
 Rapta per undisonos temere vagor avia tractus,  
 Tu facilis Neptune, maris cui tradita eura est,  
 Adsis o propiusque juves: da visere tandem  
 Te comitem cursusque ducem. sine numine divum  
 Non ego sic placidas ponti feror acta per undas.

Hæc illa; hæc taurus contra tum corniger infit:  
 Sumne animos, virgo; pelagi nihil unda nocebit.  
 Namque ego sum, quamvis videar bos esse tuenti,  
 Juppiter: in quodcumque volo, me vertere possum,  
 Nunc adeo tuus altus amor pulcherrima tauræ  
 Assimilem longum fecit metirier æquor.

Te Creta incolumem capiet, quæ me quoque parvum  
 Nutriit. ipsa illic mecum jungere hymenæo,  
 Magnanimosque dabis gnatos, qui ditia regna  
 Sceptraferi in cunctis magna ditione tenebunt.

Sic fatus, fecit rata dicta. apparuit undis  
 Creta; aliam in formam se Juppiter induit, & jam  
 Connubium celebrat, circum famulantibus Horis.  
 Illaque, virgo prius, magni tum sponsa Tonantis  
 Progeniem dedit, & gavisata est nomine matris.

# IDYLLIUM III.

## EPITAPHIUM BIONIS.

*Deflet poëta mortem Bionis Smyrnæ vatis bucolici, qui  
 veneno propinato haustoque supremum diem obierat.*

**T**RISTE mihi saltus, triste ingeme Dorica lympha,  
 Et fluvii optatum frustra lugete Bionem;  
 Nunc arbusta mihi vos flete & frondea lustra;  
 Aridulis flores nunc o spirate corymbis,  
 Nunc, rosa, triste rubeto, & triste rubeto, Anemone;  
 Nunc foliis signa illa tuis heu heu, Hyacinthe,  
 Ingemina: dulcem tulerunt fata aspera vatem.

Rumpite Sicelides jam questus, rumpite musæ.  
 Dauliades nemorum ramosa in sede gementes  
 Ite agite, & sicularum Arethusæ dicite lymphis:  
 Occidit ille Bion pastor bonus, occidit una  
 Jucundum & carmen, Pastorum & Dorica musa.

Rumpite Sicelides jam questus, rumpite musæ.  
 Strymonii lugete ad tristia flumina cygni,  
 Et querulo mæstum nunc fundite carmen ab ore,  
 Quale Bion quondam resonabat gutturali vestro.  
 Dicite & Oeagriis, & nymphis dicite late  
 Bistonibus: dulcis periit jam Doricus Orpheus.

Rumpite Sicelides jam questus, rumpite musæ,  
Ille gregi carus non amplius inflat avenas;  
Non recubans viridi cantat sub tegmine quercus;  
Flumina sed queritur propter letinæa sub umbris.  
Cuncta silent juga muta; vagæ per prata juvencæ  
Cum tauris lugent, nec roscida gramina curant.

Rumpite Sicelides jam questus, rumpite musæ,  
Ipse tuum funusque, Bion, deslevis Apollo,  
Et Satyri flevere, & nigra in veste Priapi;  
Cum gemitu Panes quærent tua carmina, & altis  
Najades in sylvis lacrymas pro flumine fundunt.  
Flens Echo sub rupe dolet, quod muta silescit,  
Nec simulat tua labra. tuo quin funere lapsa  
Quæque sua passim jacuere sub arbore poma,  
Et lassi flores putruere, oviumque reliquit  
Ubera lac niveum, liquitque favos bene olens mel;  
Tabidus in cera mellis liquor aruit. haud est  
Alterius nunc mellis opus, te melle perempto.

Rumpite Sicelides jam questus, rumpite musæ,  
Non tantum æquoreo delphin in litore flevit,  
Nec gemuit tantum philomela in rupibus unquam,  
Quæta nec est tantum juga per sylvestria hirundo,  
Nec tantum Halcyone mœrens Ceyca dolebat.

Rumpite Sicelides jam questus, rumpite musæ,  
Nec tantum in glaucis ploravit Cerylus undis,  
Vallibus eois nec tantum Memnonis ales  
Circum busta volans flevit Titanide natum;  
Quantum omnes raptum deploravere Bionem.

Rumpite Sicelides jam questus, rumpite musæ,  
Illius & numeros miratæ, & mollia doctæ  
Carmina, ramorum densis philomela sub umbris  
Hæc residens, illic contra soror altera Progne,

Alternæ ingemuere; cohors vaga responsabat:  
Vos etiam Paphiæ vos o lugete columbæ.

Rumpite Sicelides jam questus, rumpite musæ.  
Ecquis erit, qui suave tua moduletur avena,  
Admoveatque tuis audax qui labra cicutis?  
Garrula adhuc spirat tua vox, atque halitus ille  
Dulcis; adhuc intus cantum depascitur Echo.

Pan habeat, Pan ipse tuis adjungere labra  
Fors renuet calamis, referat ne dona secunda.

Rumpite Sicelides jam questus, rumpite musæ.  
Flet cantus Galatea tuos, quam sæpe solebas  
Te prope compositam mulcere in litoris ora.  
Non tua vox Cyclopi erat: fugiebat ab illo,  
E pelago te blanda tuens Galatea petebat.  
Et mare nunc oblita in sola mœret arena,  
Pascit & ipsa tuos per tristia prata juvencos.

Rumpite Sicelides jam questus, rumpite musæ.  
Omnia musarum tecum una munera rapta,  
Rapta puellarum perierunt oscula, & ipsa  
Labra etiam puerorum; & triste queruntur Amores  
Ad tumulum nunc ecce tuum, te voce vocantes:  
Te multo mage Cypris amat, quam dulcia nuper  
Oscula quæ rapuit morientis Adonidis ore.  
Hic dolor est alter, fluviorum o maxime cantu,  
Hæc nova cura, Mele: tibi primum est funere raptus  
Mæonides, os illud amabile Calliopæ,  
Teque ferunt querulis gnatum deflesse sub undis,  
Et gemitu complesse tuo freta. tristis ademptum  
Nunc alium fles gnatum, alio nunc funere mæres.  
Fontibus ambo almis dilecti: hic fonte bibebat  
Pegaseo, sicutis Arethusæ e fontibus alter.  
Ille quidem cecinit te pulcro, Tyndari, vultu,

Et magnum Thetilis genus, & flavum Menelaum.  
Hic vero non bella sonans, lacrymosa nec arma,  
Panaque pastoresque levi dicebat avena,  
Pascebatque greges cantans, ceraque cavatos  
Jungebat calamos, suavem mulgere juvencam,  
Ac teneros gaudens puerorum dicere lusus:  
Semper amor comes illi, & Cyprin semper amavit.

Rumpite Sicelides jam questus, rumpite musæ.  
Omnes te claræque urbes atque omnia lugent  
Oppida. te gravius, carum quam fleverit Ascra  
Hesiodum, flet mœsta; haud tantum est Pindarus oris  
Bœotum optatus, nec Lesbo Alcæus; & urbi  
Flebilis heu Cejum vates suus. acrius optat  
Te Paros Archilochum quam fortem; proque sonanti  
Sapphus voce, tuo Mitylene carmine gaudet.  
Omnes, quotquot habent facundæ munera linguæ  
Bucolici, tristi lugent tua funera versu.  
Fama Sami flet Sicelides, interque Cydonas,  
Cui fuerant risusque prius, cui gaudia in ore,  
Nunc lacrymas fundit Lycidas, civesque Philetes  
Inter Triopidas te luget propter Halenta,  
Inque Syracusiis bonus ille Theocritus. hæc &  
Ausonii luctus cape dona, ignarus & ipse  
Haud ego bucolici cantus, te rite docente  
Doridos hæredes musæ quem scire fatemur:  
Divitias liquisti aliis, mihi carminis artem.

Rumpite Sicelides jam questus, rumpite musæ.  
Heu! heu! quum rignos malvæ periere per hortos,  
Aut apium viridans aut flos bene olentis anethi,  
Post etiam redeunt, vivos novus excipit annus.  
Nos magnum, nos forte genus, doctasque per artes  
Excultum, semel ut fati vis horrida mersit,

Occupat obscuros tenebris tellure sub ima  
Longa quies immensa, & nulli obnoxia fini.  
Tuque jacens sub humo taciturna in nocte silebis;  
At placet heu Nymphis, ut semper garrula cantet  
Rana; nec invideo, quando mala carmina fandit.

Rumpite Sicelides jam questus, rumpite musæ.  
Heu tua ad ora, Bion, venere, heu dira venena  
Sensisti; quinam potuere attingere labrum  
Illa tuum, subito nec sunt ea dulcia facta?  
Quisve adeo immitis, qui vel miscere venena,  
Vel misero præbere jubens, tua carmina fugit?

Rumpite Sicelides jam questus, rumpite musæ.  
Pœna manet sua quemque. at me juvat usque gementem  
Fundere in hoc luctu lacrymas, fatoque dolere.  
Quod si etiam possem, ceu quondam Thracius Orpheus,  
Nigra Erebi qui stagna adiit, vel durus Ulysses,  
Alcidesve prior; jam nunc Plutonis & ipse  
Limina te propter solum visurus adirem:  
Nosse, an adhuc cantes Diti, atque audire liceret  
Quos numeros cantes? Sicula quin pastor avena  
Persephonæ modulare aliquid, quod mulceat aures:  
Ipsa etiam Ætnæo Siculoque in litore ludit,  
Doricus ipsi etiam placuit sonus, haud sine merce/  
Cantus erit: prius Euridicen ut reddidit Orpheo  
Dulcia threicio resonanti carmina plectro;  
Sic quoque te nostris reddet bona montibus; & si  
Fas mihi sit tantum, non hæc mea fistula & ipsi  
Abnuat umbrarum regi cantare sub orco.



## IDYLLIUM IV.

## MEGARA.

*Uxor Hæculis Megara heic inducitur a pœta colloquens  
cum Alcmena ejusdem Herculis matre. Hinc utra-  
que de acerbissimis casibus, quos ille heros fortis-  
simus variis in locis pertulit, miserandum in mo-  
dum vicissim conqueritur.*

QUID mea sic mater cura tabescis acerba  
Triste gemens? curnam primus rubor ora reliquit  
Pallida, curve animum tantis mœroribus urges?  
An quod inexhaustis, tua proles inclyta, gnatus  
Casibus heu premitur, nihili servire coactus  
Usque viro, velut hinnuleo leo fortis inerti?  
Heu miseram cur me cœlestia numina tantum  
Dedecorant, fatisque adeo genuere parentes  
Invisam? tētigi quæ postquam nupta cubile  
Egregii sine labe viri, tam semper amavi,  
Quam lumen jucundum oculorum ipsumque verebor;  
Atque colam, toto vereor ceu corde coloque,  
Nunc etiam nullo fortunæ exterrita casu.  
Illo autem infelix nemo est magis ortus in auras,  
Hauserit usque adeo diras qui pectore curas.  
En etiam sævo, quem Phæbus præbuit, arcu,  
Phœbus, Parcarumve aliqua, aut crudelis Erinnyis,  
Ipse suos gnatos letho dedit, ille per ædes  
Cæde furens dulces animas demisit ad orcum.  
Vidi egomet diro genitoris vulnere fixos

Concidere; horrendum facinus, quod somnia nulli  
Vana vel ipsa ferant; nec sæpe vocantibus ipsis  
Nequidquam matrem, ferre ullum perdita quivi  
Auxilium; vis nulla aderat vitabilis arte.  
Ac veluti amissos queritur sua germina fœtus  
Tristis avis, coluber ramosa in sede latentes  
Quos rapuit, nigrisque implumes faucibus hausit;  
Illa volat circum ramos, atque implet acuto  
Cuncta gemens stridore; nec ullam ferre peremptis  
Audet opem, sævo metuens accedere monstro;  
Sic ego flens miseranda meæ fata aspera prolis  
Huc furiis per tecta atque huc incensa ferebar.  
Atque utinam o Diſtynna, regis quæ mollia matrum  
Pectora, natorum cecidissem in funere & ipsa,  
Fixa venenato penitus præcordia telo!  
Nos ubi deflessent, cari tunc rite parentes  
Communemque rogum struxissent, lectaque in auro;  
Non sine muneribus posuissent ossa, ubi primum  
Hausimus ætherii vitales luminis auras.  
Nunc illi Aonios vertentes vomere campos  
Longe tecta colunt generosis ardua Thebis;  
Ast ego Tyrintho sterili Junonis in urbe  
Lustibus heu doleo multis, & semper eodem  
Pressa modo; lacrymisque datur non ulla medela.  
Scilicet exiguo dilecti conjugis ora  
Tempore fas miseræ mihi sola in sede videre;  
Usque novi subeunt casus, durique labores,  
Quos terra pelagoque errans fert undique, saxo  
Ille gerens rigido aut præduro pectora ferro.  
Tu vero miseranda parens, ut jugis aquæ fons,  
Ab Jove quoque eunt noctesque diesque, liquescis  
Fletibus assiduus; alijs nec sanguine junctus

Ullus adest, dictis qui me soletur amicis.  
Testa habitant diversa Isthmi trans litora longe  
Piniferi cognati omnes. nemo mihi præsto,  
Respiciens quem corda queam recreare dolore  
Femina, tristis, inops, cunctis deserta; sorore  
Pyrrha una excepta: tamen hæc quoque saucia curis  
Conficitur, caroque gemit pro conjuge & ipso  
Prole tua: miseros nam te magis omnibus unam  
Effudisse reor gnatos hominique deoque.

Talia dicebat. lacrymæ volvuntur abortæ  
Ex oculis, roseosque rigant vultusque sinusque,  
Gnatorum dum cura subit pariterque parentum.  
Nec minus & fletu malas Alcmena rigabat,  
Tristiaque ex imo ducens suspiria corde  
Voce nurum placida sic est affata gementem.

O nata, o prole infelix, cur talia mentem  
Fata agitant? sævo cur ambas perdere luctu  
Heu properas, memorans tot dura atque aspera rerum,  
Quæ non, ah miseræ! nunc primum flevimus una?  
An varii casus, nobis quos quæque ministrat  
Lux, satis haud fuerint? lugendi ægrescit amore,  
Qui cupiat nostras numero comprehendere curas:  
Fide animo; non hæc data sors a numine nobis.  
Ipsa tamen video te, cara o gnata, dolere  
Infandum; ignoscoque tibi, quum nulla supersit  
Lætitiæ jam caussa, & frustra gaudia quæras.  
Quin graviter miseretque tui me, nata, doletque,  
Fortunæ in partem nostræ quod sorte vocata  
Mœsta gemis, plorasque adversi numinis iram,  
Aspera quæ nostris longum cervicibus instat.  
Persephone nunc alma sciat, crinesque decenter  
Testa Ceres, quas qui nostris ex hostibus ultro

Fallere tentarit, perjurus tristia damna  
Sentiat; haud aliter tu cara hoc pectore vivis  
Quam si utero e nostro prodisses lucis in oras,  
Maternisque fores in sedibus ultima virgo;  
Necte, credo equidem, fugit hæc pia cura merentem.  
Quare, dulce meum germen, ne dicere pergas,  
Oblitam nunc esse tui, licet acrius ipsa,  
Quam Niobe quondam flevit pulcherrima, plorem.  
Nec certe culpanda parens, si propter acerba  
Damna fleat gnati. prius ipsum lumine vidi  
Quam gremio venientem exacto temporis orbe,  
Sæva decem matri tulerunt fastidia menses.  
Ferreaque horrendi tetigi prope limina Ditis:  
Difficili ipsum adeo sic partu enixa dolebam.  
Nunc vero longinquus abest, certamina tentans  
Heu nova; nec reducem patria num sede revisam  
Ipsa ignara scio, lugebo an perdita semper.  
Præterea dulcem per somnum tristia terrent  
Visa animum; timeoque, infestæ noctis imago  
Exitium gnatis ne quod portendat acerbum.  
Namque mihi in somnis durum retinere ligonem  
Visus utraque manu Alcides, quo scilicet altam  
Impiger egesta fossam tellure cavabat  
(Conductus merced' velut) florentis in agri  
Limite, cujusdam postremo: nuda gerebat  
Membra, sine & læna, sine cincta ad pectora palla.  
Ut vero cœptum perfecit rite laborem,  
Firmaque vitifero prætendit septa novali,  
Tunc alto in sulco defigens pone ligonem  
Induere, assuerat queis vestibis ante, parabat.  
Ecce autem subitus tellure effulsit ab ima  
Ignis, & horrendo vis flammea vortice circum

Sævit, ille pedes citus & vestigia retro  
 Torquet agens, rapidam si flammam evadere possit;  
 Et clypei in morem præ se quatit usque ligonem  
 Huc illuc oculis lustrans vigilantibus, ulla  
 Incautum ne parte furens comprehenderet ignis.  
 Iphicleus cui ferre volens, ceu mœsta putabam,  
 Auxilium, ante suo quam fratri accederet, udam  
 Concidit in terram lapsus; nec surgere rursus,  
 Nec potuit rectis pedibus consistere, fixus  
 Membra immota solo; ceu qui sine viribus æger  
 Labitur invitus senior cogente senectâ.  
 Ille jacet defixus humi, dum forte viator  
 Præteriens dextra languentem attollat amica,  
 Aspectumque senis veritus barbamque nivalem.  
 Haud secus Iphicleus resupinus & ipse jacebat  
 Nequidquam clypeum quassans. ego territa gnatos  
 Auxilii expertes flebam, dum lumina somnus  
 Liquit, & eoïs aurora emersit ab undis.  
 Hæc mihi sollicitæ per noctem somnia mentem  
 Terruerant; sed cuncta petant Eurysthea nostris  
 A domibus. vates illi sit dira malorum  
 Mens mea, nec quidquam nobis fortuna minetur.

## IDYLLIUM V.

*Saavis est ac plenus illecebrarum placidi maris aspe-  
 ctus, sed contra ingrata ac periculi plena est na-  
 vigatio, ubi vi tempestatis exitum mare estuat.  
 Proinde satius in terra degere.*

CÆRULA quum leni zephyrus freta flamine crispat,  
 Nescio quid trepidam mentem jubet ire per altum;

Nec jam musa placet; rapit acrius æquoris unda  
 Strata procul. Sed quum resonant spumantia ponti  
 Marmora, volvunturque incurvi ad litora fluctus,  
 Respicio terram, plantasque, atque æquora damno  
 Effugiens. tum terra mihi mage fida videtur,  
 Frondiferæ & nemorum rident mage suaviter umbræ,  
 In quibus alta canit valido vel flamine pinus.  
 Heu male piscator vivit, cui cymbula testum,  
 Cui labor in pelago, cui pisces subdola præda!  
 At mihi sub platano dulcis sopor occupet artus:  
 Fontis amem murmur vicinum audire sonantis,  
 Qui mulcet strepitu, fessum non turbat agrestem.

## IDYLLIUM VI.

*Docet poeta, amorem mutuum esse debere, ut sit felix; idque exemplis ostendit.*

PAN vicinæ Echus, Satyri resonabilis Echo  
 Saltantis, Satyrus Lydæ flagrabat amore.  
 Echo ut Pana suum, Satyrus torrebat & Echo,  
 Et Lyda hunc ipsum: suberat vis mutua amoris.  
 Ut vero ex ipsis aliquis spernebat amantem,  
 Spretus & ipse dolebat amans, pœnamque ferebat.  
 Hæc documenta damus cunctis ab amore alienis:  
 Dilige, ut alterno dilectus amore fruaris.

## IDYLLIUM VII.

*Ad Vesperum poeta loquitur, ejusque lumen implorat,  
dum noctu ad amicum pastorem properat.*

**H**ESPERE, spumigeræ tu lumen amabile divæ,  
Cæruleæ noctis sacrum decus, Hespere, tanto  
Inferius Luna, quanto præstantius astris,  
O salve dilecte; mihi & pastoris amati  
Dum propero ad lusus, pro Luna suffice lumen;  
Illa hodie incipiens, sese cita condet in æquor.  
Non ego ad insidias tacita ferus hostis in umbra,  
Non ad furta feror; sed mollis flamma medullas  
Urit: quisquis amat jucundo est dignus amore.

## IDYLLIUM VIII.

*Tanta est amoris potentia atque vis, ut etiam fluvium  
per medios maris fluctus transire coegerit e Græcia  
in Siciliam. Hac de re etiam Virgilius Æn. lib. III.*

**N**ON procul a Pisa Alpheus postquam alta subivit  
Æquora, trinacrias Arethusæ fertur ad oras  
Lætus agens lymphis oleastrum, donaque frondes  
Formosas, floresque, & sacri pulveris agmen.  
Ille imos fluctus subter fluit, & mare salsum  
Inferior findens, undas non miscet in undis,  
Nec tacite subter labentem cæcula norunt.  
Sic gravis ille puer, mala quæque atque ardua suadens,  
Amnem etiam docuit propter se nare Cupido.

## EPIGRAMMA.

*Hoc carmen est in Amorem arantem, interque venustissima ab omnibus semper est habitum.*

**D**EPOSITA faculaque arcuque, accepit acutam  
Virgam Amor, & pera cinxit agreste latus.  
Et paribus nexis juga subter panda juvencis  
Frugifera Cereris munera sevit humo;  
Hinc cernens sublime: fove, inquit, Juppiter agrum;  
Ne cogam Europæ te juga ferre bovem.

MOSCHI IDYLLIORUM

FINIS.







Circa illum complentque canes ululatibus auras ,  
 Et nymphæ lacrymantur Creades: ipsaque Cypris  
 Sparsa comas, solis mœrens in saltibus errat,  
 Errat inops ac nuda pedes: rubus asper euntem  
 Vulnerat, & sacro depastus sanguine rorat,  
 Fertur at illa tamen per longas anxia valles  
 Assyriumque vocans sponsum puerumque requirens .  
 Huic autem saliens patulo de vulnere sanguis  
 Pube tenuis, pectusque alte fœdavit & ima  
 Ilia: costarum candentia texta rubescunt. (res.  
 ? Heu miseram, heu Cyprin; lugubre queruntur Amo-  
 Formosum simul illa virum, simul oris honorem  
 Amisit: formosa fuit, dum vixit Adonis;  
 Forma Dæ periit, simul ac ipse occidit. heu, heu!  
 Heu repetunt juga cuncta, heu moto vertice quercus.  
 Et fluvii Veneris luctum flent tristibus undis,  
 Et fontes lacrymantur Adonin montibus altis.  
 En flores luctu rubuere; omnesque querelis  
 Flebilibus Cypris valles implevit & urbes.

Heu miseram, heu Cyprin; periit formosus Adonis:  
 Echo & respondet; periit formosus Adonis.  
 Quis dirum non ploret amorem Cypridis? heu, heu!  
 Ut vulnus vidit crudele, ut Adonidis atrum  
 Purpurea aspexit circum latera ima cruorem,  
 Brachia pretendens flendo clamavit: Adoni,  
 O, mane, Adoni miser; supremum ut perdita visam,  
 Complectarque ulnis, jungamque labella labellis!  
 Evigila paullisper, Adoni; extremaque fige  
 Oscula: dum vivunt, delibans oscula fige  
 Usque mihi. donec, si quis super halitus errat,  
 Ore legam fugientem, & dulcem tristis amorem  
 Exsugamque bibamque. Extrema hæc oscula semper

Servabo, infelix quoniam tu linquis amantem ;  
Oscula semper erunt , extrema hæc oscula , Adonis .  
Ah fugis hinc Acheronta petens , regemque tremendum  
Innitemque hominum votis : ego perdita vivo ;  
Sum Dea , nec tecum mihi fas descendere in orcum .  
Accipe tu , nostra major cui parva potestas ,  
Sponsum diva meum Proserpinæ : quidquid ubique  
Formosum est carumque ad te devolvitur unam .  
Ipsa queror , doleoque , & acerba saucia cura  
Nequidquam extinctum ploro , te , magna , tremiscens .  
Sic moreris , mea cura ? abeunt ceu somnia , abivit  
Noster amor . Cypris vidua est , orbantur Amores ;  
Et Cestus periit . cur ah venatibus audax  
In nemora , & cæcos voluisti irrumpere saltus ,  
Tam formosus & ipse feras tentare minaces ?

Sic Dea plorabat ; chorus una & plorat Amorum .  
Heu miseram , heu Cyprin ; periit formosus Adonis .  
Mœsta Vequs tantum lacrymarum effudit , Adonis  
Sanguinis ipse gravi quantum de vulnere fudit :  
Et cruor & lacrymæ terra florescere visæ :  
Nata cruore rosa est , lacrymis nata est anemone .

Incipite o questus ; periit formosus Adonis .  
Ne misera in sylvis jam plores , Cypri , maritum :  
Heic torus , heic thalamus bene cultus Adonidi ; in iis  
Ecce tuis recubat stratis extinctus Adonis ,  
O Venus : extinctus licet ipse heu lumina clausit ,  
Est formosus adhuc ceu vinctus membra sopore .  
Illum ipsis deponere in vestibis , in quibus olim  
Tecum in nocte jacens assuevit carpere somnos  
Aurea strata super : sit quamvis tristis , amare  
Ne pigeat visu tristem Dea tristis Adonin .  
Serta illum floresque inter deponere ; sed omnis

Heu puero extincto tabescit copia florum !  
Myrti rore levi spargens , & olentibus herbis ,  
Et myrrhæ succo circum line : sed male & ipsa  
Jam pereunt unguenta , tuo jam perduto Adoni !

Puniceo recubat compostus tegmine Adonis  
Ab ! tener , & flentes circum lacrymantur Amores ,  
Flaventes tonsi crines . hic spicula calcat ,  
Ille arcum , pharetramque alius defringere gestit ;  
Alter vincla pedum solvit , fontemque lebere  
Aureolo gerit alter , & undis vulnera tergit ,  
Pone alius puerum leviter dum frigerat alis .

Ipsam heu ! heu ! Cyprin lugubre queruntur Amores .  
Jamque faces extinxit hymen in limine , & ipsa  
Pronuba dirupit male sarta : haud amplius Hymen ,  
Amplius haud Hymen circumsonat undique , at heu ! heu !  
Triste sonas , o Adoni , sonas triste heu , Hymenæ !

Flent Cyniræ gnatum Charites ; formosus Adonis  
Heu periit , dicunt alterna voce querentes ;  
Dicunt voce magis resona , quam tu ipsa , Dione .  
Flent etiam Parcæ , Parcæ lacrymantur Adonin ,  
Et revocant cantu : nequit ille audire vocantes ,  
Non quod nolit , eum sed quod Proserpina frænât .  
Ergo modum lacrymis nunc pone , epulisque paratis  
Indulge , Cythetea : alio plorabis & anno .

## IDYLLIUM II.

*Amor in avem conversus puerum quendam venatorem  
ludificare beic a poeta lepida fictione dicitur.*

**I**MPUBES venator adhuc dum forte volucres  
In nemore inquit, profugum conspexit Amorem  
In buxi ramo sidentem. nec mora: gaudens,  
Namque ingens volucris visa est, conjungere certat  
Inter se calamos omnes, & servat Amorem  
Nunc huc nunc illuc salientem præpete penna.  
Post etiam iratus, curam quum novit inanem,  
Ipse senem, calamis projectis, mœstus adivit  
Scindentem glebas, docuit qui callidus artem;  
Remque omnem narrat, sidentem & monstrat Amorem,  
At senior quassans canentia tempora risit,  
Et fuge, ait, tales venatus; neve sequare  
Hanc volucrem: fuge, nate, procul; fera sæva volucris,  
Lætus eris, donec profugam non ceperis. ævum  
Grandius attigeris si deinde, ille ocyus ultro,  
Qui fugit ac resilit nunc avius arbore opaca,  
Adveniet, domitaque super cervice recumbet.

## IDYLLIUM III.

*Poeta fugit se, quum esset a Venere jussus cantum ejusdem  
filium Amorem docere, ab eo didicisse res amatorias.*

**M**AGNA Venus, quum somnus adhuc mea membra riga-  
Adstitit, ipsa manu tacitum Dea candida Amorem (ret,

Defixumque solo ducens, ac talia fata est.

Accipe, & hunc puerum mihi tu cantare doceto.

Hæc effata abiit. quæcumque ego carmina agresti

Ludere suetus eram calamo, cantare docebam

Ah! demens, puerum, ceu discere vellet. Amorem:

Ut curva a Pane est, ut recta a Pallade facta

Tibia, Mercurio testudo, & garrula Phæbo

Fiſta olim ut cithara est, referebam. ast ille docentem

Nil curans teneros contra cantabat amores

Calicolumque, hominumque, & dulcia facta parentis.

Tunc oblitus ego puerum quæcumque docebam,

Edidici lusus, docuit quoscumque Cupido.

## IDYLLIUM IV.

*Amorem esse maximum ad musarum cantus incitamentum docet poëta hoc brevi in carmine.*

**M**usæ nil metuunt agresti pectore Amorem.

Quin & amant, & pone ejus vestigia servant.

Si quis & ingenio duro, nec amoribus apto

Præditus accedat frustra; fugiuntque, nec ipsum

Carmina grata docent. sin molli saucius igne

Quis canat, ultro omnes veniunt adstantque canenti.

Quæ ne vana putes, testis sum maximus ipse:

Nam si alium quencumque hominemve deumve celebro,

Cessat lingua mihi, resonat nec dulcis ut ante.

Sed quum vel Lycidas canitur, vel forte Cupido,

Ambrosio manat jucundum carmen ab ore.

## IDYLLIUM V.

*Quum breve datum sit hominibus ad vivendum tempus ,  
aliquando suum labori imponere , curisque modum  
facere omnes debent .*

**S**I mea pulchra nitent hæc carmina , ferre vel ipsa  
Laudem sola queunt , quæ jam mihi fata dedere .  
Sin horrent ingrata , quid ah ! miser usque laborem  
Nequidquam ? nam si nobis duo tempora vitæ  
Seu divûm pater ille catus , seu Parca dedisset ,  
Unum tempus uti læta inter gaudia agatur ,  
Ast aliud curas inter ; post reddita tristes  
Lætitia exciperet casus mortalia secla .  
At quoniam dederunt vitæ unum numina tempus ,  
Angustusque brevisque mage usque est terminus ævi ,  
Ah ! miseros quam longa ciet nos cura , laborque  
Sollicitus ? cur tantum animos per lœra per artes  
Lassamus , partisque opibus super addere multo  
Majores certamus opes ? nos nostraque morti  
Debemus ; cæcosque fugit tamen , invida Parca  
Quam breve vivendi nobis concesserit ævum .

## IDYLLIUM VI.

*Eas esse bonas amicitias , quæ semper fidæ sunt , brevi-  
ter docet exemplis poëta .*

**F**ELIX quisquis amat , quum fido & amatur amore .  
Felix Pirithoo Theseus : licet horrida Ditis

Limina perrupit, socio tamen usus amico est.  
 Felix, Axenosque inter comitatus Orestes  
 A Pylade in quascumque iret procul avius oras.  
 Æacides quoque letus erat vivente sodale,  
 Et latus moriente, necem quando ultus acerbam est.

## I D Y L L I U M VII.

*Ceteris anni partibus, commemoratis commodis omnium  
 & incommodis, ver præferendum esse a Myrson  
 cum Cleodamo colloquente docemur.*

CLEODAMUS & MYRSON.

VERE magis gaudes, an bruma, an divite, Myrson,  
 Autumno, anne æstu? quidnam præsentius optes?  
 Dulcior anne æstus? labor omnia perficit æstu.  
 Dives an autumnus? saturis tum copia manat.  
 Brumane difficilis? brumæ quoque tempore multi,  
 Ignis ubi in medio est, ignava per otia gaudent.  
 An tibi purpureum ver gratius? eja age, Myrson,  
 Quid malis, mihi fare: vacant sermonibus horæ.  
 M. Haud homini fas est discernere facta deorum:  
 Omnia enim sacra sunt, jucundaque, sed tamen optas  
 Id quoniam, fabor, Cleodame, & vota docebo.  
 Nolim æstum: radiis nam sol ardentibus urit;  
 Et nolim autumnum: vis est sua morbida pomis.  
 Brumam ferre grave est: timeo glaciemque nivemque.  
 Ver mihi jucundum: ver toto floreat anno,  
 Quum neque sævit hyems, neque Syrius æstuat igni.  
 Omnia vere tument, pubescunt omnia vere,  
 Parque dies homini, par nox data munere divum est.



## IDYLLIUM VIII.

## EPITHALAMIUM ACHILLIS CUM DEIDAMIA.

*In hoc Idyllio seu potius fragmento poëta inducit pastorem Lycidam a Myrsone rogatum narrare Achillis nuptias cum Deidamia.*

MYRSON & LYCIDAS.

VISNE mihi, Lycida, jucundum carmen avena  
Nunc aliquod Sricula modulari; & amabile carmen  
Et dulce & tenerum, Lycida, cane: quale solebat  
Dicere Trinacrio Galatæ in litore Cyclops.  
L. Id placitum licet esset, age o, quæ carmina dicam?  
M. Scyria quæ resonat pubes, dic oscula blanda,  
Furtivam & Venerem, furtivum & Achillis amorem:  
Ut puer indutus peplum est, mentitus & oris  
Molle decus natus inter Lycomedis; & ipsum  
Deidamia diu non notum aversa refugit.  
L. Quondam Helenam pastor rapiens abduxit in Idam,  
Oenoni grave vulnus. eum indignata repente est  
Sparta quidem contra, pubemque excivit Achivam.  
Græcia tota furit; cuncti liquere Mycenæ,  
Elidaque, & validis regnata Laconibus arva,  
Juraruntque nefas sociis ulciscier armis.  
Solutus Pelides aberat, Lycomedis in aula  
Ille latens gnatas inter; lanamque columque  
Virgineosque manu nivea pro fortibus hastis  
Doctus erat radios tractare; ac texere telas  
Nata videbatur: natarum artesque sequutus

Et studia & mores primo vernabat in ævo.  
In teneris eadem florebat purpura malis,  
Incessuque puellari gaudebat, & aureos  
Flammeolo crines molli vittisque tegebat.  
Sæva intus vis Martis erat, flagrabat & igni  
More maris, quem torret amor. surgentis ab ortu  
Solis ad occasum semper comes additus ibat,  
Deidamia, tibi. nunc & dare dulcia palmis  
Oscula gaudebat, pulcrosque extollere vultus;  
Nunc gemitus laudabat, & ora mendacia fletu.  
Semper mensa eadem fuerat; nec virgine tantum  
Ulla lætus erat, quantum hac sibi compare; & una  
Vellet amans longa cupidus requiescere nocte  
Communi in thalamo, sic illi & fatus ab ore est.  
Cur aliæ junctæ recubant in sede sorores;  
Sola ego sic maneo, tu sic & sola recumbis,  
Quum simus forma æquales vernante puellæ?  
Nec minus heu solæ disjungimur; una nec umquam  
Est miseris sedes. ah cur male distinct ille  
Nos paries, sociisque ferus congressibus arcet?  
Ipsa, licet mollis tacitæ mihi lumina somnus  
Componat, tete nequeo deponere mente  
Immemor, aut placida sine te requiescere nocte.  
Cura premens agitat, teque amplectorque per umbras  
Insomnis, teneoque; tua hæret pectore imago,  
Quam video dum læta, mihi jucunda voluptas  
Nescio qua subita spargit dulcedine mentem,  
Et varia illudunt optatis gaudia formis.  
Oh ego sim, talis quondam cui nympha marito  
Contingat, vel nata fores tu dispare cultu!  
Forte tori alterno nos fœdere jungeret ardor.  
Sexus obest. ergo nobis quæ sola relicta

Spes datur, hanc cupidæ per furta alterna sequamur:  
Jungamur thalamo interdum, communis & ambas  
Excipiat lectus, foveatque puella puellam.  
Nulla vetant quod jura, quid o vetuere parentes?  
Talia factus erat Pelides; & rosa qualis  
Mane novo, quam vincta super Tithonia conjux  
Luce rigat cupidis in sarta halantia nymphis,  
Exarsit juvenis, fixitque in virgine vultus  
Suspirans, fuditque oculis ardentibus imbrem.  
Quo fletu commota, imo suspiria traxit  
Nympha sinu, sensitque novas in pectore flammæ,  
Oscula nec juvenis fugit, velut ante solebat.  
Jamque etiam in thalamum invitat, quaque arte parentem  
Fallere & excubias possit, prior edocet. ergo  
Per tacitas ædes ubi discessere sorores,  
Et stratis cubuere suis, citus ille cubile  
Deseruit notum, ducente Cupidine, teque  
Deidamia, petens subiit furtivus eandem  
In sedem, vacuaque tori se parte locavit.  
Ah quid agat? metuit deceptæ Virginis iram,  
Et simul ardet: amor jubet has effundere voces.  
Ecce adsum soror ipsa tibi, sponsusve futurus,  
Deidamia: utrum mavis, nunc elige nomen;  
Spondeo utrumque tibi. sed si mea vota valerent,  
Si tua fors etiam, tacito quæ pectore condis,  
Sponsus adesse velim. nam quid jam fingere, & ignem  
Dissimulare juvat, penitus quo semper aduror?  
Non ego sum, qualem mentito corpore reris:  
Ignaram cultus te fallit, & oris imago,  
Impubesque genæ fallunt, ni dura resistis,  
Pelei eris & divæ Thetidis nurus. atque ita dicens  
Oscula certatim roscis infigere malis,

Et petere amplexus cœpit . nova pectore flamma  
Subditur , & propior longis spes addita votis .  
Obstupuit primum virgo ; dein gaudia , & ipsos  
Insuetos mutata ut motus hausit : id , inquit ,  
Id fuerat , quod sæpe tuas ego territa laudes  
Extimui , fugique manus , atque oscula tersi .  
Cara quidem fuerant , quæ tu mihi cumque ferebas ,  
Munera ; blanditiæ caræ , gemitusque fuere  
Dilecti , fateor , queis me tentare solebas ,  
Mollibasque animum ; sed quæ mihi dona placebant ,  
Sæpe eadem ne vana forent , ignara timebam .  
Nunc factis manifesta fides . mihi fama per aures  
Attulerat , falsa sub imagine virginis acrem  
Heroem latitare , Phrygum qui verteret arces .  
Sed quis tam pulcro te corpore crederet illum ?  
Tu Pelei , Thetidisque genus ? tu clarus Achilles  
Æacidum flos ille , parens quem diva subegit  
Nere manu tenerum , ne dardana Martius ardor  
Feret in arma inter cædes Lyciasque sagittas ?  
Cedo equidem , nec vota moror : non rustica tantum  
Deidamia tua est . tu posthac sola voluptas ,  
Solus eris furor ipse mihi ; tua tempore in omni  
Dicar ego : nostris adsit non invida votis ,  
Quæ regit Idalium dea magna , ac cœpta secundet .  
Nec plura his . gaudent animis concordibus ambo ,  
Atque inter sese iuncti sua gaudia dicunt  
Conjugium ; nec furta putant , sed jura Diones .  
*M.* Tale tuum carmen , Lycida pulcherrime , quale  
Molle apium per prata gregi florentia , qualis  
Sibilus & zephyri fessis messoribus æstu .  
Nunc satis : evolves alias , ut bella sequutus  
Pelides , astu vafri detectus Ulysei ,  
Liquerit exanimem deserto in litore amicam .

## IDYLLIUM IX.

*Contra Venerem vates inuebitur, quod cum ipsa diis  
hominibusque acerba sit, tum acerbiorum etiam Cu-  
pidinem pepererit.*

**A**LMA Venus, magno Jove nata atque æquoris undis,  
Cur adeo gravis usque homines divosque fatigas?  
Parva loquor: cur & sævisti infesta, malumque,  
Omnibus heu pestem, peperisti mater Amorem,  
Dirumque, immitemque, & pulcra pectus habentem  
Diversum a forma? cur & super addere pennas,  
Et voluisti armare procul jaculante sagitta,  
Effugium ipsius nullum ut superesset ab ira?

**FINIS.**









C

005652073

Digitized by Google

